

ПЕТӖ 1926 ВОСЯНЬ  
ЛЭДЗӖНЫ: КОМИ ГИЖЫСЬ КОТЫР, ПЕЧАТЬ ДА ЮӖР СЕТАН КОМИ  
РЕСПУБЛИКАСА АГЕНТСТВО

# ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

## 5 ОДА КОРА (МАЙ) 2008



### ТАЙӖ НОМЕРЫН:

|                                           |   |
|-------------------------------------------|---|
| Алёна ШОМЫСОВА. Кывбуръяс .....           | 3 |
| Андрей ВЛАСОВ. «Ми — войтыр!» Висьт ..... | 8 |

### МЕДВОДДЗА ГИЖӖДЪЯС

|                                                      |    |
|------------------------------------------------------|----|
| Татьяна КИРПИЧЕНКО. Кывбуръяс .....                  | 17 |
| Николай ЛОБАНОВ. Нянь лун. Кык юкӧна ворсантор ..... | 20 |

|                                            |    |
|--------------------------------------------|----|
| Геннадий БЕЛЯЕВ. Шаньӧн вӧлі Архипыч ..... | 29 |
|--------------------------------------------|----|

### ЛИТЕРАТУРА ИСТОРИЯЫСЬ

|                                                 |    |
|-------------------------------------------------|----|
| Владимир ШИРЯЕВ. Он вун тэ, Озъю. Повесьт ..... | 33 |
|-------------------------------------------------|----|

### МИЯН КАЛЕНДАРЬ

|                                             |    |
|---------------------------------------------|----|
| Михаил ИГНАТОВ. Аслыссяма морт. Висьт ..... | 49 |
|---------------------------------------------|----|

### ВОЯС ДА ЙӖЗ

|                                                     |    |
|-----------------------------------------------------|----|
| Леонид ЛЫТКИН. Разведкаӧ локтӧны ӧтчдысь. Очерк ... | 58 |
|-----------------------------------------------------|----|

### ЫДЖЫД ВЕРМӖМЛЫ — 63

|                                                                     |    |
|---------------------------------------------------------------------|----|
| Кино ВАСЬ. Пулемӧтчик Ветшеслав. Батълӧн казъты-<br>лӧмъясысь ..... | 68 |
|---------------------------------------------------------------------|----|

Обложка вылын снимокыс Николай Лютоевлӧн.

© «Войвыв кодзув» («Северная звезда»), 2008 г.

СЫКТЫВКАР

# СЕВЕРНАЯ ЗВЕЗДА



***Ежемесячный  
литературно-художественный  
журнал***



**Учредители:**

**СОЮЗ ПИСАТЕЛЕЙ РЕСПУБЛИКИ КОМИ**

**АГЕНТСТВО РЕСПУБЛИКИ КОМИ ПО ПЕЧАТИ  
И МАССОВЫМ КОММУНИКАЦИЯМ**



## ***РЕДАКЦИОННАЯ КОЛЛЕГИЯ:***

Главный редактор

ЕЛЬКИН М.А.

БЕЛЯЕВ Г.В.

Зам. гл. редактора

КОЗЛОВ Е.В.

Ответственный  
секретарь

ПОЛУТРУДОВ А.В.

ТИМИН В.В.

УЛЬЯНОВ А.В.



Алёна ШОМЫСОВА



\* \* \*

Усьö медводдза лым —  
Небыдик, кокныдик.  
Кöсйö сайöдны  
Еджыд эшкыннас  
Арся няйтсö.  
Но оз дыр кeжлö:  
Бара зэрö,  
Бара дöзмöдчö няйт.  
Сідз жö олöмас  
Венласьö  
Еджыда-сьöдаыс,  
Бұрыс и лёкыс,  
Сöмын веннысö некод оз вермы.

\* \* \*

Тэ мелі кань моз  
Радейтан ме дорö  
Ниртчыштны, мургыштны...  
Жаль, тэ абу кань!  
Ог вермы тэнö босьтны аскöд  
Кузь туйö петігөн.

\* \* \*

Ме вунöдла киськавны  
Гортса дзоридзьяс...  
Гашкö, тэ менö сідз жö коркö  
Вунöдан да эновтан  
Косьмыны, чусмыны...

\* \* \*

Тэ менсьым коркө юалін:  
«Тэ менө радейтан?»  
А ме эг куж вочавидзны...  
Өні ачым пыр юася  
Тэнсьыд та йылысь.  
Сьökыд, вөлөм, радейтнытö.  
А кык пөв сьökыд лоö торъявны.

\* \* \*

Ме чайті,  
мый ог куж бөрднысö,  
мый сьölөмöй  
дзикөдз чорзьöма,  
пөртчöма ловтöм изйö да  
вөйтчöма гудыр ва пыдöсö.  
А тэ судзöдін сійöс,  
Ловзьöдін!  
Өні ме бөрдла.  
Аттö тэныд, мусаöй!

\* \* \*

Асывнас кор садьман  
да шонді югөръясыс  
мөдасны ворсөдчыны  
тэнад синъяскөд,  
тайö ме мөвпала  
тэ йылысь  
выль лун пансигөн.  
Луннас кор небыдик төвруыс  
дзугыштас рудов юрситö,  
тайö ме көсья тэкөд  
аддзысьлыны.  
Рытнас кор öшинь кузяыд  
мөдасны исковтны  
гырысь зэр вөйтъяс,  
тайö ме гажтөмтча тэысь.  
Войнас кор унмовсян,  
вөтад уськөдчыла  
косьмөм дзоридзөн.

\* \* \*

Пемыд. Сöмын пуыслөн  
сьöд мыгöрыс  
сулалö.  
Көдзыд төвся рытö.  
Гажтөм. Сьökыд мөвпъяс пытшкө  
пöда ме  
өтнам.

\* \* \*

Ме, кӧнкӧ, воддза олӧмас  
вӧлі лӧбачӧн.  
Сэтшӧм окота мукӧддырйи  
лӧбзъывны,  
волыны мӧд муӧ.  
Но бордъяс эз на чужны.  
И лӧбавнысӧ кадыс  
эз на во.

\* \* \*

Ичӧтик, мусаник  
кагук кодъ жӧ тӧ,  
кор садъман.  
Муртса на потыштӧм  
синъясад  
ылькйӧ шуд,  
банийштӧм чужӧмыд  
кагуклӧн кодъ мелі,  
шань.  
И очсалан сэтшӧм чӧскыда...  
Жаль, тадзи овлӧ сӧмын  
асывнас.

\* \* \*

Ичӧт сьӧлӧмӧй —  
тӧдтӧм дітор.  
Кӧсьян кӧ,  
овмӧдчы,  
паськӧдчы,  
примитас кӧ.  
А оз кӧ...  
Ачыд гӧгӧрвоан.

\* \* \*

Менӧ эз велӧдлыны  
лоны меліӧн,  
лоны восьсаӧн.  
Ӧні верма гижны:  
«Мамук, мусаӧй,  
ме тӧнӧ радейта!  
Помнитан, коркӧ ичӧтдырйи  
Тӧ веськавлін больничӧ.  
Сэки ме гусьӧник бӧрдлі,  
Окавлі тӧнсьыд платтьӧастӧ  
Да кевми Енмыслысь,  
Мед ӧдйӧджык локтан.

Гортö волігөн кор  
    кыла  
        мелі гөлөстө,  
шызьöм вежөрöй  
    пыр жö  
        лөнбө.  
Мамук, ме тэнö радейта!»  
Но шуны тайö кывъяссö  
    эг на велау.

\* \* \*

Ме пузьöда ва  
    öдвa ловъя плита вылын.  
Тэ чайтін,  
    мый ме сійö жö ва мозыс  
        дыр ог шонау.  
Да, вöлі сідз.  
Но кöдзавны ва мозыс  
    ог нин кууж.

\* \* \*

Төвся кöдзыд асылö  
    рисуйта кынмысь  
        öшинь вылад  
Шоньд лолысь петан  
    мелі кывъяс.  
Видзöдлы öшиньöд,  
    лыдды, казялан кö,  
Сэсся петавлы  
    кöдзыд ывлаас,  
Шонтышт паськыд  
    морöс бердад:  
Турді нин лолöс восьтігөн.  
А он кö казяу,  
    дзормöм кыз пуөн  
        кынма керка весьтад.  
Эн сэсся виччысь мясянь  
    мелі кывъястö!

\* \* \*

Тэ локтан, локтан,  
    локтан, локтан!  
Тэ аски локтан!  
Ме зэв рад!  
Кузь поезд дорö воа  
    скачөн —  
И синмös куня:  
    Аддзан он?

Тöда, аддзан,  
    öд миян сьöлöмным öти,  
    öтар джынйыс вöлі тэ дорын,  
        мöдарыс — ме дорын.  
Кор сывъясям —  
    шуднымла,  
        муслунла  
Кыпöдчылам енэжöдз!  
Дзонь вежон öд эгö  
    аддзысьлöй!

\* \* \*

Керка пытшкысь кö идравны  
                                ставсö,  
мый сыысь кольö?  
Сідз жö мейн нинöм  
                                оз коль,  
став кылöмыс вошö,  
    кор янсöдча тэкöд  
        дыр кежлö.

❖ ❖ ❖

### **Дона лыддысьысь !**

*Эн вунöд судзöдны «Войвыв кодзув» журналтö.*

#### **Доныс:**

##### Редакция пыр

1 төлысь кежлö — 12 шайт.  
3 төлысь кежлö — 36 шайт.  
6 төлысь кежлö — 72 шайт.

##### Пошта пыр

1 төлысь кежлö — 25 шайт 02 ур.  
3 төлысь кежлö — 75 шайт 06 ур.  
6 төлысь кежлö — 150 шайт 12 ур.

## «Ми — войтыр!»

В И С Ъ Т

Төвся лунё Печать керкаё пырис Меркулов Степан, «Марья-моль» газетса корреспондент: неыджыд тушаа, тэрыб восьласа том морт. Пөрччис кепысьсё, зыралыштис кынмём кинас кодзыдысла гөрдөдём чужомсё да збодера шыасис дежуритысь дорё:

— Чолём!.. Век на узян?!.. Редакцияын кодкё эм абу?..

Паськыд чужома, арлыда морт вуграліс стеклоа чомъяс. Сійо дышпырысь восьтыштис гудыр синсё да муртса нюмуніс:

— А-а, Меркулов!

— Шёрсаным эм абу?— стөчмөдөмөн юалис Меркулов.

— Ог төд... Мун, ачыд видзөдды!— веськодя мурөстіс кыз гөлөснас дежуритысь да синсё кунигмоз чөвтис:— Мыйкё бара керин?..

Но Меркулов нинём эз вочавидз, сьёкыда ышловзис да веськөдчис вывлань каян послань.

Поскыс вөлі мича, зумыд: важся стрөйбаясад овлө татшөмыс. Паськыд перилөсё да лөсьыдик шылыыд сюръясё мавтөма югъялана еджыд краскаөн. Кыпыд руа кадъясё Меркулов радейтліс лэччывлыны перилөодыс: сувтліс перилө бердас, чошкөдліс пельсё, кывзис, локтё оз кодкё, сэсся өдйө пуксьывліс да исковтліс мөд судтаөдз... Татшөм здукъясё сійо казътывліс школасё, медводдза велөдысьсё Тамара Васильевнаёс, ныв-зон ёртъяссө... Гажа кад вөлі... Медся ёна кажитчис, кор мөд сменаө велөдчигас кусліс би. Мыйлакө тай тшөкыда кусліс-а? Тамара Васильевна öзтыліс карасина лампаяс, и сэки стенъясас, география карта да нималана гижысьяслөн портретъяс вылө петалісны сьод вуджөръяс. Татшөм здукъясё Меркулов думнас пөртчыліс пиратө либө ылі муясё ветлысьö. Класс жырйыс вөлі бригантинаөн, а Тамара Васильевна — атаманныс — повтөма тышкасис вөрөгъяскөд, чуткаліс ёсь шпага-указканас кыз рушкауа глобуссө...

Но талун Меркулов вөлі дзик мөд руа. Иславны эз вөв окота: төрыт, дзик виччысьтөг, звөнитіс Зина, шөр редакторөс вежысь, да тшөктіс быть пыравны...

Редакцияын, кытчö пырис Меркулов, пыр вөлі сідз шусяна творческой идөртөмлун. Орччөн сувтөдөм кык пызан вылын ыджыд чукөрөн куйлісны быдсяма кабаляыс, журнальяс да кывчукөръяс. Веськыдвылын — папка тыра шкаф да гардероб. Шуйга стенас өшалісны мича рамаясын да стеклө сайын почёт грамотаяс да дипломъяс — Прокопий Ивановичлөн тшапитчанторйыс. Прокопий Иванович вөлі ветымын арөса, кыз вир-яя

---

мужичёй. Быд асыв, нельод судтао кайом бёрын, кабинетас пыромон сийо сьокыда лолалис, косодис ныр чышкөднас пөсялом чужомсө, сэсса сийон жө чышкалис грамота-дипломъяссө. Найо ошалисны эз стен шөрас, а неуна шуйгавывланьджык: водзвыв думыштөмон вылясыслы местасө кольома.

Сэн жө, пельөсас, сулалис ыджыд, важ да ёна парсассьом сейф. Оздөссө некор эз восьтывлыны: ключыс важон нин вөли кытчөкө вошөма. Коркө сейфыс сулалис бухгалтерияын: видзисны сьом да будсяма колана «лөпсө», но олан лад вежсьом бёрын сейфсө шуисны нуны көрт сдаитанино. Прокопий Иванович эз сет, пыртөдис ас динас кабинетыслысь төдчанлунсө петкөдлом могысь. Мед пө сулалө, дай гашкө пө олөмыс бергөдчас на...

Корьяскө, могөн либө сідз, варовитыштны, сы дорө пыравлисны мукөд газет-журналысь ёртъясыс да шмоньпырысь юавлисны: мый нө пө сейпад видзан? Прокопий Иванович шөйөвоштана вочавидзліс: «Эм мый...» Сэсса кежөдліс сёрнисө мөдлао...

Удж вылас сийо тапъялис гортса небыд тяпинас, а көмсө кольлис пызан дорас. Мед төдмавны, места вылын-ө көзяиныс, оз и ков пырны кабинетас: муртса восьтышт өздөссө, и көмыс кө синмад шыбитчө, сідзкө Прокопий Иванович тані...

Өздөссө коставлом бёрын Меркулов өні эз казав көмсө да кокныда ышловзьөмон пырис... Зина вөли места вылас.

— Слабог, мойвиис!— долыда шыасис Меркулов.

— Йөйтавныд кор дугдан?..— стрөга юалис Зина кутшөмкө гижөд мыччөдігмоз.— Мыйла тайөс гижин?

Меркулов босьтис кабаласө да кельдөдис... Тайө вөли шеф йывсыс вөйдөрлун гижөм шмонь... «Кыдзи нө сийо татчө веськаліс?.. Сорсьөмон, буди, статья чукөрнас вайсьөма?!»

— Аттө дивө,— шөпкөдис Меркулов.— Но и но... Сэсса нө мый?

— Сэсса?!— нерыштіс Зина.— Сэсса ссылкаө мөдөдчан!.. Прокопий Иванович правдайтчыны медбөръя позянлун сетө!..

— Мыйысь? Тайө өд сөмын шмонь!

— Вот и мунан командировкаө Войвылө, мусир перъян выль вышка йылысь гижны. «Кукурузникон» лэбан. На, со тані став колана кабалаыс, билет да сьом. Мөдөдчан аски.

Зина мыччис Меркуловлы пакет да нимкодъпырысь, тешкодъ видзөдліс ёрт вылас. Меркулов сылы кажитчис: бур уджалысь, өкуратнөй, ставсө удитө ас кадө, но... Вөли ыджыд «но», и шефныс шуис нетшыштны тайө «носө» вужнас. Зиналысь отсөг корис: кыкөн пө босьтчам да велөдам мортсө олөм вылас лючкия видзөдны. Сылөн пө век на челядьдырыс... көнкө эстөн. Отсыштам пө том мортлы веськыд туй вылө петны, гашкө пө коркө ме местаө пуксяс, кутас газетон веськөдлыны...

Зина эськө ставсө гөгөрвоис, но жалитис ёртсө: быд мортлы өд Енмыс сетө ас, торъя видзөдлас да сям, и «нетшыштны» либө вежны сийөс некыз оз позь ни он вермы...

Мөд луннас урчитөм кадө Меркулов пукаліс нин «кукурузникин». Самолёт тыр вөли сөвтөма быдсяма кламсө: ящикъяс, бөчкаяс, мешөктяс. Бордъя сарай тур-тар котөртис кын му веркөсөд да кыпөдчис сынөдө... Мыйтакө лыбөдчис, пөрөдчис веськыд бок вылас, босьтис колана нырвизь да бөр веськөдчис...

Керкаяс, туйяс, машинаяс — ставыс коли бөрө,— заводитчис помтөм-дортөм лымъя вөр.

Регыд лоис ыркыд.

«Эк!— мөвпаліс Меркулов.— Бур, мый тюниаси да ватнөй гач пасыталі!.. Коркө Прокопий Иванович ышнясис: ватнөй гачыд пө өні некодлы оз ков!.. А ме чайта, төвнас коми мортлы ватнөй гачыд — муса мамук кодь!.. Мед ышнясьö! Карса мортыд нинөм оз гөгөрво!.. Сійөс кө Войвылө моднөй гачнас мөдөдны, регыд и клён-клён пидзөснас керас... А менам со!— Меркулов нюм-пырысь клопнитіс асьсө бекъясас.— Некутшөм Көдзыд пөль оз босыт, көть лым вылын узы!..»

Но регыд гажа руыс вежсис: самолёт пырис кымөръясö. Мөс туйөд мунысь вөв телегаөс моз, заводитіс тракйөддыны. То гуранө быттьө усыласны, то краж вомөн чеччыштасны...

Дыр тадзи Меркулов эз вермы кутчысьны — сійөс кутіс шөгөдны. Кынөмыс гудыртчөмөн гудыртчис... Ящика-бөчкаяс костөд кызкө матыстчис лётчикъяс дөрө, но съөд ускаыс шуис, эн пө весиг думайт татчө восны, став салонсö пө нювны тшөкта!..

Меркулов бөр пуксис аслас пуклөс вылө, вомсö кинас топөдөмөн мыйтакө кутчысис на, сэсся чеччис да восьтіс өдзөссө...

Зэлыд көдзыд төв швачкис чужөмас, пырис пась улас, мөдіс нетшкыны ортсö... Меркулов шөрипөв кусынгчөмөн чургөдчис өдзөсөдыс и... виччысьтөг пөрис...

— А-а-а-а!..

Здук мысти йизьөм коз лыс лөкысь швачкис чужөмас, мыйкө чорыдакодь тувкис бокас. Меркулов мышнас грыпкысис толаө, и съөкыд лым пласт топөдіс сылысь морөссө...

Вөр ю берегас томиник коз улын лунйис көч. Көть и узис, но ставсö кыліс. Кыліс, кызди джуджыд коз йылас ур чөсмасис коз кольясөн, кызди посни кайяс гажа кельөбөн пуксисны кызд пу тутан йылө, чипсөмөн корсисны гаг позъяс, көдзисны лым вылө косьмөм кырсьторъяс... И лэбисны водзö.

Көч кыліс и лунвывсянь матыстчысь төдтөм шы. Пыр гораммис и гораммис, и друг көнкө дзик матын мөдісны чегласыны увъяс, сэсся мыйкө шлопкысис керөс бокө, турбылытчис гөра улө кынмөм юөдзыс да лөнис...

Тешкодь лэбачлөн шы ньөжйөникөн лөнис, а көч думыштіс: «Рытнас колө ветлыны төдмавны, гашкө, пипу чегис да? Ок и чөскыд пипу кырсьыд!..»

Пондіс рөмдыны. Көч лэптіс кузь пельсö, бергөдлыштіс өтарө-мөдарө — нинөм лөксö эз кыв, и надзөник, кокныдыка чеччалөмөн кутіс матыстчыны коланаинөдз пушыд вөльд вывті. Локтіс, а сэні некутшөм пипу абу и пөрлөма — коль сора лыс да чегөм коз йыв куйлө, и увлань, юланьыс, бөрөзда кодь лэччө. Көч исыштіс бөрөзда доръяссö — морт дук кылө. «Вай жө лэччыла, гашкө, мыйкө чөскыдтор сюрас?»— мөвпыштіс көч, но эз удит чеччыштныс... «Ха-ха-ха!— кыліс ю дорсянь.— Ме ловъя! Самолётысь уси, а ловъя!.. Ха-ха-ха!...» Көч мый вынсьыс йөткыштчөмөн чеччаліс-кайис керөс йылө да садьтөгыс уськөдчис вөрө. Воськов сө котөртөм бөрын ланьтөдчыліс здук кежлө, сувтліс бөръя кок йылас, кывзысьыштіс,— юладорсянь век на кыліс повзьөдчана «ха-ха-ха» шыыс...

Меркулов, лымйын пукаліг, серам сорён равзис вөр пасьталаыс. Кутшөмкө тōдтөм радлун пырис весьөпөрлөм мортлы сьолөмас. Сійө өні ньөти эз тōждысь водзө мыйкө лоөм вөсна. Весиг некутшөм полөм тōдтөм вөрысь петөм вөсна эз майшōд сійөс, кōть и ёна доймис став вир-яйыс. Меркулов кураліс кинас лымсө, шыблаліс вывлань, туплясис да сераліс синва петмөныс...

Рөмдіс өдйө. Пемыд енэжсянь лөня усис гырысь лым. Меркулов сувтіс, мөдіс пыркөдчыны. Ковмис пөрччысьлыны дөрөмөдзыс... Лымйыс вөлі быдлаө пырөма, весиг быд зептө. Пасьтасьом бөрас сійө бөр пуксис, кыскис коксьыс тюнисө, пыркөдіс и сэтысь лымсө да бөр көмасис...

«Кытчө и мунны?.. Вөрө оз позь, лымйыс джуджыд... Ю вывтйыс колө... Но кытчань — вывлань али увлань?.. Юыс сідз нин векныд, сө воськов оз ло, кутшөмкө нюрө петан... Муна увлань: коркө өд кутшөмкө оланінө пета жө!.. Став коми войтырыс ю дорын нэм чөж олөны да...» — тадзи мөвпалігмоз Меркулов мөдіс лэччыны тōдтөм ковтыслань.

Восьлавсис сьөкыда: лымйыс джуджыд нин вөлі, местаясөн пидзөсөдзыс, дай кокыс юкаліс на... Воис пөрөм пожөм дөрө... «Бур бипур артмас! Öгыръясөн пожөмыд оз лыйсьы, ломтысьө жара... Татчө и сувта да войковта!..» Меркулов помнитіс Ромө пөльыслысь велөдөмсө: некор пө вой кежлө эн пукты бипурад коз пес: сотчан узигад!..

Бипур ломзьөдіг да коз лыска узянін лөсьөдігкості дзикөдз пемдіс. Мудзөм мортыд шоныд бипур дорад өдйө и унмовсис. Но эз дыр кежлө, коркө вой шөрнас садьмис.

Вөлі көдзыд — лымъявны дутдөма. Меркулов чатөртліс юрсө енэжлань да чуймис: «Но и но! Дзик тай нө тōдтөм кодзувъяс!.. Некод Ошкыс абу, Юрийв кодзув оз тыдав!.. Юсь ни Орион оз мыччасьны и?!..» Майшасьомөн сувтіс кок йылас, петіс ю шөрлань да көповтіс видзөдласнас матігөгөрсө... «Дзик тōдтөм енэжыс! Да и кодзувъясыс мыйлакө зэв гырысьөсь?! Буракө, ёна шковгыси юрөн: өд самолөтысь усьны да ловъяөн кольны оз быдөнлы мойви!.. Гашкө, ас садьө эг на весиг во?.. Но мед, кадөн воөдча!» — юрсө гыжъяліг мөвпыштіс Меркулов. Сэсся бөр бергөдчис бипурлань, чукөртіс сотчөм ув помъяссө, содытыштіс выльөс, водіс да регыд крепыда унмовсис...

Асывнас садьмис пельпомөдыс йөткалөмысь. Сы водзын сулаліс важөн нин кувсьөм Ромө пөльыс... Чужөм пасьталаыс сылөн югзис долыд нюм.

— Чолөм, Стөпук, чолөм! Со и аддзысим!.. Мустөммис али мый му вылад олөмыс? Татчө локтін, мөдар югыдас?..

— Мөдар югыдө?! — паськөдіс синсө том морт. — Ме мөй мөдар югыдын?!

— Көн нө, тэ серти кө? Мөдар югыдын, дерт. Тэ өд, Стөпө, внук менам! А ме тэнад пөльыд, Ромө... Но?.. Төдін?.. Ачыд на отсасін менө дзебигөн!

Меркулов топыда кунис синсө, сэсся здук мысти бөр восьтіс.

— Йөюк, — серөктіс пөльыс. — Нинөм, регыд велалан...

Ромө пөльыс матыстчис бипур дөрө, пуксис, нюжөдіс онялан билань косіник кияссө:

— Вай чеччы, вөр керкао мунам. Тані матын и эм. Ме нарошно аслым вөр керка лэпті. Ачыд од төдан — вөр-ватог овны ог вермы. Окурат сәні и сёрнитам. Тэрмасыны некытчо, надзёникон мөдөдчам... Ок, Стёпук, Стёпук! Зэв эськө тэ том на да! Но мый вочан? Енмыд төдө, кодос босытны... Тані од өти луныс — быттьо сюрс во, а сюрс воыс — өти лун!

Меркуловлы лёк лоис. Видліс пöльыслысь кисö, пельпомсö, малыштис чужомбансö. Чужомыс вöлі важонкодъ бритлытом, чуткасяна тошка. Ромö пöль вөрзёдіс внуксö киöдыс:

— Мөдөдчам.

И найö сёрсьон-бёрсьон мөдісны пöльлөн вөр керкалань. Мунігмозныс Ромö пöльыс паніс сёрни:

— Стёпук... Воодчам, да ачыд ставсö аддзан... Эн чуймав! Чайтан, ме тані отнам?.. Абу. Ыджыд котырөн олам... Дась няньтö огö жö сёйöй — муывыса олысьяслы отсаям... Тöда, тэ выль президент вöсна гөлөстö сетін... Öнi тэ абу откөн... Олөмыс кö бурмас, верман шуан: «Таын и менам пайыс эм»; лёкмас кö — бара жö президентыд абу отнас мыжа: тэ мыжаон жö лоан... Ми — войтыр!.. — лэптіс кабырсö пöль. — Тiян демократия, а миян некутшöм демократия абу. Монархия тані... Ставнас Ен веськөдлö!..

Воисны местаөдз. Гөгөр ставыс мича: стрöйбаяссö сёлөмсянь вөчөмаось. Ю дорын дзоля пывсян, а вөр керкаыс — джуджыд берег вылас, пожөмъяс пөвстын. Сәні жö өти кока тшамъя. Керка пытшкөсас шоныд, югыд.

Пөрчысьом бöрын Ромö пöль мыччөдіс внукуыслы кутшөмкө кабала.

— Тайö Енлы корөм, мед му вылас атомнöй война эз вöv. Лыдды. Со мыйта кырымпас нин чукөртöма миян... Тэ, Стёпук, öнi миян олысь да, чайта, кырымасян жö?

Меркулов син пырыс нуөдіс кабалаö — ставыс төдса ов.

— Кырымалан, сэсса Педөр Аннаясö кабаласö нула. Сійö од йөзтö ёна радейтліс, унаос висьöмысь мездыліс.

— Ме сійөс бура төда. Мисянь матын оліс. Кык во сайын кувсис...

— Гашкө, сёйыштан? Пражитөм чери эм, нянь-сов. Сэсса чай юам? — вөлөгасö пызан вылө лэпталігмоз юасис пöльыс.

— Ог на. Мыйкө Педөр Аннаыс дум вылө усис...

Меркулов мөвпалана ланьтис.

— Мый нö казтыштін? — шыасис коркө Ромö пöльыс.

— Колян во тайö вöлі... Ён, гажа бушколөн уськөдчис сэки Выхгорт сикт вылө тулысыс. Öти здукөн керкаяс дорын сыліс лым, косьмыштісны лунвылө видзөдысь чойбокса муяс. Вөлөк туй вывтi мунігөн кок улысь лэптысис бус...

Вöлі асыв. Шонді кайис вылө да прамöя нин шонтіс бан бокъяс. Туйдорса бербаяслөн виж баляяс гажөдісны синтö, а туйбердса канаваөдыс шурыда больгис-визувтис сылом лым ва. Туйвомонса труба петанінас ваыс чукөрмөма джуджыд, паськыдкодъ тыөн. Сувтöма шойчыштны, вын заптö, мед уськөдчыны сэсса трубаөдыс туй мөдар бокö, паськыд эрд вылө.

А сәні-i-i!.. И истанъяс нора чирзөмөн вильыша тювкъялөны

сöstөм енэжын, и уткаяс шутьялөмөн вундалоны векни, тэрыб бордьяснас руалөм сынөдсө, и юсыяс лым тупыльясөн пукалоны карьер ва веркөсас, ылысянь шыбитчоны синмад...

Гортысь петөм бөрын час джын мында восьлалі да кежи шуйгавыв, пыри важ шойна вылө. Сэні, пемыд коз тіль пөв-стын, вөлі ыркыд да лөнь. Көнсюрө куйліс на лым, сөмын шондіаинъясас гу гөрбьясыс пондөмаось неуна косьмыштавын, кельдыны... Матын морт некод эз вөв...

«Мыйла ме татчө локті?» — юалі ассьым...

А тшук сійө войнас Педөр Аннатө вөтаси. Вөтын сійө и юаліс: кызди пө олан, гижысь ёрт?.. Ме садьмөмла нинөм вочавидзны эг удит. Унмөй, дерт, воши. Чеччи, петі ывлаө, пукси кильчө помө... «Мыйла юаліс?.. Мыйла воліс?..»

Уна во сайын менө сы ордө неминуча вайөдліс... Ёрткөд ветлім вуграсьны. Зэр бөрын туйыс вөлі зэв вильыд. Машинанымөс шыбитіс туйбердса гуранас. Ок и ноксим!.. Коркө-й петім жө сэсся туй вылө, но машинатө йөткаліг коскөй, тыдалө, вөрзис: ни копыртчыны, ни веськөдчыны ог вермы. Сэсся төдысь йөз мөдөдісны Педөр Анна ордө. Сійө пө кужө бурдөдны... И бурдөдіс өд! Тьпу-тьпу-тьпу... Öні на некыті оз вись...

Мөдысь сы дорө юр висьмөмөн шыасьлі... Бара на отсаліс!..

Мөдысьсө бурдөдчөм бөрын Педөр Анналы кывбур гижі: *«Игөт старушка, спину гнөт, Тяжёлой жизни груз несөт...»* Эг ачым ну, гөтырөс ысті. Сэсся гөтыр висьталіс: Педөрөвна пө өна радліс, рөдвужыслы ошйысьны весиг котөртліс...

Тадзи вочасөн и ёртасим. Сёрнитім олөм-вылөм йылысь, кыкысь на ветлім турипувла — Гаръя туйөд да Көрткерөслань. Сэки, машинанад муніг-локтіг, сійө өтторъя Енлы юрбитіс. Ог төд, мый кевмис, но пыр тай лючки-ладнө ветлім...

Нюрө пыригөн состөм ыж ку тужуркасө вөлі өшөдө пожөм ув йылө. Ми гөтыркөд шмонитам: «Педөрөвна, гусяласны дублөнкатө!» А сійө воча: некод пө оз босьт, лөк йөз нюрө оз ветлыны!.. Збыльысь, некод эз и босьт. Да нөшта и петіганым ылісянь вөлі адзам «дублөнкасө» да сы серти стөча и петам ордым вылө...

А вотчигас пыр мыйкө вомгорулас сьыліс... Сувтан, веськөдчан, зыралыштан костө, видзөдлан гөгөрбок — некод абу, а гөлөсыс кылө!.. Ляпкыдик тушаа: копыртчас вутшьяс костө — оз и тыдав... Нюмъөвтан аслыд да водзө вотчан...

Шмонитны зэв радейтіс... Помнита, мөдісны өтчыд Людмилакөд мөс галанкала. Сэки совхоз на вөлі, да лым улө уна буртор кольліс, сөмын эн дышөдчы! И капуста, и картупель, и мөс галанкаыд — тыр! Оз ков комбикорм ньөбны... Нывбабаяс өдйө тыртөмаось кык мешөктө, а гортө кыскыны оз вермыны. Сэсся друг адзөны — «Москвич» локтө. Педөрөвна пө радлө: «Но, öні машинаөн гортөдз лэччам!» А Людмила воча: «Карса мортыд сьөмтөгыд оз на и босьт...» «Босьтас! — шуө пө Педөрөвна, — аттьө на шуас!» Шоперыс оз на удит кабинасьыс петны, а нывбабаяс машина дорын нин сулалөны. «Тэрмасьышт! — повзьөдас сійөс Педөрөвна. — Бригадир татчө котөртө, көсйө миянөс штрафуйтны! Му помас бедьла муніс, регыд бөр воас!» Мужичөйыд машинасө бөр кутас бергөдны, а Педөрөвна бара: «Миянөс энө кольйө!» Шоперыд бабаястө көс-

йысьома нин босьтны, а найо бара на короны: миян по куст улын кык мешок эм, отсыштэй багажникад сөвтны...

Ме найос горт дорысь нин казялі... Сулалоны туй шорас кык мешок да кык нывбаба, да гогъяснысө кутөмөн сералоны... «Аски бара мунам ог?»— юалө Людмила, а Педөрөвна вочавидзё: «Тачкатө босьтам, друг некод аски машинааыд оз лок!..» Сэсся нөшта нагылджыка серөктисны...

Коркө модысь Педөрөвнакөд мөсьясөс вөлөк туй вомөн вуджөдөм, мед машина улө эз веськавны. Друг сийө асфальт шорас сувтөмөн, ойзиг, рушкуас кватитчис... Ме повзи!.. Мый нө, мися, лои?.. А сийө серөктис: трусик көвийөй по ори-ис!.. Сэки и чужис менам «Микул Васылөн көвъяс» висьтөй... Öнi со мөвпала: бурджыка кө казтыштны — менам дзик быд висьтын Педөрөвналөн лолыс эм...

Со өд, кызди кадыс лэбө! Быттө неважөн на и босьтчи гижны, а дас во нин коли... Журналъясын йөзөдча, висьтъясөс кык чукөрө босьтисны... А некутшөм радлун таысь абу... Важөн нин окота вөли нимөс печатайтөмөн адзыны, а öнi дзик веськодь. Öнi дзик мөдтор колө — уджавны, мыйкө гижны... Да не прөста, а мед сьөкыджыка сетчис... Сөмын сэки долыдлун воө. Мыйла тадзи? Ог төд... А Педөр Анна йылысь коли öти кывбур, öти карандаша серпас да паметь...

— Эн шогсы, адзылан на Педөр Аннатө!— сьөлөм сетис Ромө пөль.

Меркулов бара видзөдлис кырымпасъяс вьлө.

— Ыджыд мам нө тані жө?

— Тані. Гортын пукалө, кыө-печкө да гортса дзоридзяс быдтө!— дөвөля шуис пөльыс.

— Турков Иван Страторович татөн и?— чуймөмөн юалис Меркулов.— Мый нө көть вөчө?

— Ваньө дядьыд часі дзоньталө да баянөн ворсө! Став рөдвужным тані...

— А зэв важся олысьяс эмось? Шуам, дас нэмсайсаяс либө ылыссаджык на?

— Эмось, дерт.

— И позьө адзысьлыны?

— Позьө.

— Зэв эськө окота төдмавны, IV нэмын Коми муө збыльысь гуннъясыс волісны али эз? Волісны кө — кутшөмджыкөсь найө?.. Сэсся кытысь коми войтырыс локтис? Либө тані нэм-нэмөн олісны?..

— Удитан на! Эн тэрмась! Висьталі тай, мися, тані кадыс мөд ног мунө,— паськыда нюмъөвтис Ромө пөль, сэсся юалис: — А гуннъясыд нө тэнад кодъяс лооны?

— Гуннъясыд?.. Войвыв Китайын овлөм войтыр! 377 воын мөдөдчасны рытывывлань да войвывлань, коркө-некоркө воөдчасны Рейн ю дорөдз да Балтикаөдз, а лунвывланьсө петасны Мушөрсә саридз дорө! Ставсө гөгөр сотасны, унаөс виасны. Сэки налөн Аттила сар юралысьнас вөлөма. Кор Аттилаыд кувсяс, сэки и гуннъяс бырасны...\*

---

\* Н.М.Карамзин. История государства Российского, т. 1.

— Стöча нимтылöмаось — гундырьяс!.. Гун войтыр!..— усьöм гөлөсөн горöдчис пöль.

Меркулов видзöдлiс пöль вылас. Пыр на сэтшöм: лöзов синма, дзор юрсиа, косiник да тэрыб кока... Шмоньлив морт. Чужлöма пö 1900 воö Керöс сиктын. Крестьянин пи. Ыджыд семьяысь. Революцияöдз видзлöмаось кык вöв да дас юрöдз мöс, а посни пемöссö и лыддыны нинöмла: тырмымөн. Уна мöстö видзлiсны куйöд ради: няныд пö сытöг оз быдмы... Сэсся бур вöралысь да чери кыйысь. Том дырьиыс артельнас Екатеринбургской каналöд Из сай заводьясö пес керавны ветлöмаось. Ён морт. Ромö пö пыжас узьö, да пöсялöма, а ми бипур дорын кынмам,— тшöкыда серавлiсны мужикьяс... Гöтырыс — удораса Кöдж грездысь Мить Анна. Зэв мичаа кысьылiс, удораса ногөн серöдöм кепысьсö весиг музейö босьтlсны. Со тайöс, пöлатяс вольсалöм джодждöрасö, ыджыд мамыс жö кылiс... А Ваньö дядь — герой, «Катюша» миномётнас вöрöгьясöс Берлинöдз пурöма... Фронт вылö дас сизим арöса зонкаөн мöдöдчылöма. Мед армияö босьтасны, тушасö содтöм ради сапöг пытшкас нитш сöвтас. Мунiгас виль баян козьналасны. Кутшöмкö тыш дырьи баяныд сотчас, и Ваньö дядь трофейной аккордеон Комиад бөр воиг ваяс. Шуöны, зэв пö гажа аккордеон вöлi. Гöтырсö, Галина Семёновнаöс, зэв ёна радейтiс, да аккордеонтö вурсян машина вылö вежис. А война вылас на чорыда контузитчылас, сöвтасны нин машинаö да санчастьö мöдöдасны, а дядь чеччыштас кузовсьыс да бөр частяс пышьяс. Герой абу?..

Меркулов босьтiс дзодзöг перö да тэрмасьтöг, кывнас отсасиг, мичаа гижис ним-овсö кабала помас. Сöмын удитiс тайöс вöчны, кутшöмкö вына ки лёк ногөн кватитiс сийöс шошаöдыс да кыкис вөр керкаысь...

Швачкöбтöмөн пöдласис öдзöс!..

— А-а-а-а!..— повзьöмысла равöстiс Меркулов...

— Сöтана!!! Лешак-машина!! Кытчö ныртö сюян?! Шмоньсö он гөгөрво?! Чайтан, окота тэ понда дзескыдiнын пукавны! Пуксы бөр местаад да шы ни тöв мед вöлiн аэропортöдз!— чужöм на чужöм воча горзiс сьöд уска лётчикыс, сэсся тойыштiс повзьöм мортöс лабичлань...

Мусир перьянiнö Меркулов воис кабала кодь еджыд, кын чужöмөн. Сэни сийöс пöся вочаалiсны, чöскыда вердiсны столöвöяс и овмöдiсны «вагон-гöстиничаö». Овмöссö шуисны петкöдлыны аски. Талун пö шойччы,— мелiа шуис начальникыс.

Сьöкыда лэбöм бöрад Меркулов пырысь-пыр пöрччысис да кокныда ышловзьöмөн нюжöдчис индöм вольпась вылö, но мышкас мыйкö кутiс чуткасьны. Меркулов броткöмөн чеччис, видзöдлiс прöстыня улас — нинöм абу... Лэптiс футболкасö. Джоджас шлопкысис веж коз ув...

Мöд луннас сийöс новлöдiсны мусир перьянiнöд. Гижис, фотографируйтiс. А рытнас вöчисны концерт. Воисны коми артистьяс, зэв лöсьыда йöктiсны-сьылiсны. Меркуловлөн весиг синваыс петiс... «Гöстиничаö» мунiгмозыс сийö вöйтчис мөвпьясас: «Мыйла миянöс сэтшöма вöрзьöдö йöзкост сьылöм, важ паськöм, шылад, кыв?.. Эз öд мича кыв понда Ромö пöльö öнтай

---

шу: «Ми — войтыр»... Зарава моз кутшөмкө гөгөрвотөм вын воо колян нэмгясысь, писькөдчө, сөдзөдчө, юктөдө ловнымос. Быд кывйын дзонь Вселенной топалөма... Кылө, паськалө, чуймөдө. И кывзигад, и висьталигад... Быд кывйын, быд шыын тайө эм...

Босьтам көть *рыська шаньга*... *Рыська шаньга* — тайө өд и пөжас, и пось пөжасыдлөн чөскыд дукуыс, и ачыс пөжасысысь,.. и пач тэчысь, и керка лэптысь, и ставыс, мый эм керка гөгөрыс: помтөм-дортөм вөр, дзордзалан видз, гөраувса визув ю и енэж... Да, енэж — пыдөстөм, топөдтөм енэж, — со мый *рыська шаньгаыг!*..

А *турипув?*.. *Турипув* — тайө и нюрө чукөртчөм-мөдөдчөм, и нюрад уна рөма нитш да дзоляник пожөмгяс пөвстын лунтыр вотчөм-олөм; тайө коръя и кортөм вөр, медводдза и медбөръя тшак, и шог төдтөм ёль; и бара жө енэж — коръясөкө джуджыд-джуджыд, лөзов-лөз, а коръясөкө и сьөкыд, руд... А төвнас, шуам, пывсян бөрын?.. Петан посводзад, гумовтан пельсаысь көш тырөн кын турипувтө, пыртан керкаад,— и сийө здукөн гыөртчас; босьтан медгырысь тусьяссө вомад — и бара сэтчө жө веськалан, арся нюрө... Со өд мый... И тадзи быд кыв... Кысь найө босьтчисны? Кутшөм нэмысь, кутшөм муысь?..

Жаль, эз мойви төдмавны, волісны-ө мянө гуннгясыс?..»

Гортас нин мунігөн, уна йөза, пөдөм вагонын пукаліг, нормөм мортлөн вежөрын чужис татшөм кывбур...

## ЛЁК ПОПСАЛЫ ПАНЫД

Сцена вылын нёнъ да бек  
Баръёвтёны: татчө, сэтчө,—  
Небыд яя юмов грек  
Петкөдлөны мустөм бабйө!  
Сэки зывөк видзөднытө,  
Кывзынытө кык пөв зывөк!..

Но кор петө коми ань  
Важ паськөмнас сцена вылө,  
Ссылө рама, сьылө збоя,  
Ссылө сьөлөмнас и ловнас,—  
Шылад ловъя парма ёльнас  
Тусьөн-тусьөн, визув юнас  
Пөтмөн юктөдө, и коддза.  
Синва петө, сьөлөм корө:  
Нөшта сьылөй!  
Нөшта!  
Нөшта!..  
Аньтө аддза лымъя эрдөн,  
Розъя пувйөн, тэрыб көрөн...  
Швачка муө кучик сапөг!  
Пышгя көмтөг гажа ягө!  
Чужан мулөн морөс вылө  
Уся сэки... Да көть кула!..





*Таня чужис Новосибирскын. 1995  
воӧ батъ-мамыс вуджисны овны Изъ-  
ва районса Діюр грездӧ, мамыслӧн  
чужанінӧ. 1997 воын муніс школаӧ,  
таво помалӧ гас ӧтикӧд класс.*

*«Первойсӧ, дерт, сьӧкыд вӧлі ко-  
ми кыв дінӧ велаवны,— гижӧ ас йыв-  
сыйс Таня,— но эг ӧтгортчы мамлӧн  
чужан кывйысь. Кывбуръяс кындзи  
лӧсьӧдавла музыка дінӧ текстъяс.  
Тайӧ тшӧкыда ковмывлӧ школаын  
мероприятиеяс нуӧдигӧн.*

*Ёна рагейта серпасасыны. Ичӧтсынь велавлі гортса угжъяс  
вӧчны, кысьыны да вышивайтчыны. Рагейта лыддьысьны. Ӗк-  
мысӧд классянь вермаси районын нуӧдан олимпиадаясын. Дасӧд  
классын велӧдчигӧн лои Республикаса олимпиадаын вермысьӧн.  
Школа помалӧм бӧрын кӧсья водзӧ пырӧдчыны филологияӧ».*

**Татьяна КИРПИЧЕНКО**

\* \* \*

Со бара вой, и бара мем оз узъсьы,  
А вӧт оз лок, кӧть мыйта сійӧс кора.  
Ме мӧвпала сы йылысь, мый эз судзсьы,  
И сьӧлӧм вылын турӧб сьылӧ нора...

Ме мукӧддырйи вӧтын аддза тәнӧ,  
И, быттьӧ важӧн, локта тэныд паньд.  
Кӧть узигӧн ме кӧсья лоны сәні,  
Кысь зэв нин уна визувтӧма ваыс.

А тӧдан, ме ӧд нинӧм на эг вунӧд,  
И казътылігӧн сьӧлӧм вылын сьӧкыд.  
Сы здукӧ олӧм овлӧ сәтшӧм курыд,  
Кыдз эз нин ӧтчид вӧвлы менам вӧтын.

Зэв тшӧкыда ме юасьлывла ассьым:  
«А позис кӧ друг олӧм кыдзкӧ вежны?»  
Кӧть олӧм туйыс вӧлі вывтӧ паськыд,  
Друг позис сәтысь мӧдарӧ мем кежны...

\* \* \*

Ме төда, аддзысьла тэкөд,  
Кор льом пу дзоридзөн тырас.  
А олас тайö зэв регыд,  
Сэк сьолөм дойöй друг бырас.  
И көть ме гажö ог эскы,  
Но воас шондіа луныс,  
И миян ичөтик грездö  
Друг пуксяс виччысьтөм тулыс.  
И шонтас сьолөмъяс сійö,  
И сетас вын овны водзö.  
Көть вывтi джуджыд лым пиысь  
Мен, көнкö, петны оз позь нин.  
Зэв дыр ме өтнамөн ола,  
Став ёртöс воштi, кыз вöтын.  
Но муслун воштыны пола —  
Оз ло нин гаж меным тэтöг.  
Ме ог төд, кысь тэнö корсьны.  
И, гашкö, гижны оз ков нин.  
Но позьö, висьтав мен, позьö  
Көть вöтын аддзысьлөм корны?

\* \* \*

Тэ кылан лэбачьяслысь сьылөм?  
Сійö тэныд.  
Тэ аддзан, шонді енэж вылын  
Кутшөм мелі?  
Тэ лоан кодзулөн, код мукöд пиысь  
Нэм оз куслы?  
Тэ гөгөрвоан, менам синмын  
Олö муслун...

\* \* \*

Тайö вöлі, кор шондіыс кусi,  
Кор друг мыйлакö сынöдыс быри,  
Пемыд вой ньöжйö шымыртiс мусö,  
Тöлысь тшöтш тайö пемыдас пырис.

Эз кыв сёрни, öд йöз вöлі ылын,  
Весиг кок улын нинөм эз тыдав.  
Ме эг төр джуджыд коз пуяс пиö,  
Здукөн этшаммис кодзувлөн лыдыс.

Тайö вöлі, кор ме өтнам коли,  
Кор тэ ме водзын öдзöстö сиптін.  
Ме сэк чайтi, мый пом меным воис,  
Сöмын öніөдз сьолөмöй тіпкö.

## Урасьом, дас нельод лун

Югъялӧны синъяс, нюмъялӧны быттӧ.  
Талун быд морт дона валентинка лыддӧ.  
Югӧръяснас шонді гажаа жӧ ворсӧ,  
Татшӧм лунӧ радлун некысь оз ков корсьны!  
Сійӧ быд морт пытшкын яръюгыда ӧзйӧ,  
Радейтчӧм со вайӧ сійӧ ӧтка йӧзлы.  
Урасьом, дас нельод — сӧмын ӧтчыл воын,  
Кутшӧм дыр ми виччам, кодыр сійӧ воас...

## Чужан му

Медся муса, медся мелі  
Чужан му.  
Ыджыд видзьяс, льӧм пу, пелысь,  
Шыльыд ю.  
Ставнас озыр помтӧм-дортӧм  
Коми вӧр.  
Мунӧм бӧрын воа кор ме  
Татчӧ бӧр?  
Тшак да вотӧс, зельгысь шоръяс,  
Енэжтас...  
Ставыс тані медся дона,  
Ставыс ас.  
Ичӧт грездӧй, шондібанӧй,  
Гажаа ов!  
Ӧд оз шогсьы сӧмын тані  
Менам лов.



Лобанов Николай Владимирович чужис 1958 вося декабр 4 лунö Спаспорубын (Луздор район). Көкъямыс классöдз велөдчис аслас сиктын, сэсся Вьльгортын механизаторö. Уджалыштіс совхозын. Армия бөрас Затонын велөдчис рулевöй-мотористö, кык гожом ветліс буксирьяс вылын, та бөрын вужис затонса ремонтнöй мастерскöйясö. Уджалис ЛДК-ын, öнi Минздрав юкöнын, технической обслуживаниеас.



«Гижны босьтчылі армияöдз на,— висьталö Николай.— Весиг сцена вылын пуктылім Победа лун кезлö гижом пьеса. Дерт, öнiя синмөн кө, сійö уджсö вылö донъявны сьöкыг, но ветераньяс унаөн матыстчылісны да аттьöалисны. Тайö, гашкö, и вөрзьöдіс медся ёнасö. Öнi око́та лои выльысь видлыны выньясöс. Неважөн корлісны гижны босьтчысьяслөн семинар вылö. Сэсся мед лыддьысьысь донъялас, мыйкö артмис ли эз...»

**Николай ЛОБАНОВ**

## Нянь лун

КЫК ЮКÖНА ВОРСАНТОР

**ВОРСЫСЬЯС:**

**ТОНЯ** — вузасьысь, ветымын арöса.

**ГЛАША** — мöс лысьтысь, ветымын вит арöса.

**ТАМАРА** — совхозын уджалысь, ветымын куим арöса.

**ФИСКА** — пенсионерка, квайтымын куим арöса.

**МИКÖЛ** — квайтымын сизим арöса.

**ВИТЬÖ** — кызь öти арöса, карын велөдчöм помалöма.

**МЕДВОДДЗА ЮКÖН**

Лавка дорын Тоня, Глаша, Тамара да Фиска виччысьöны, кор ваясны нянь. Няньсö важөн нин колö эськö вайны. Нывбабаяс пукалöны кильчö пос тшупöдьяс вылас, сёрнитöны поводдя йылысь. Кильчö помас кык тыртöм ящик.

**ФИСКА.** Гожöмыс таво бара кутшöм лоö-а? Дыр-ö мöдасны сулавны татшöм пöсь лунъясыс?

**ГЛАША.** Ме тай чайта да, дыр на сулаласны-а. Тöлыс со кутшöм вöлі — дзонь тöлысь көдзыдыс кутчысис. Челядьтö эз велöдны дас лунысь дырджык.

---

ТАМАРА. Колö таво меным унджык турун пуктыны. Дас вит ыж, да кöза вайсяс. Мöслы мында туруныс ковмас.

ФИСКА. А нинöм уна скöтсö видзны дай.

ТОНЯ. Мед сетас Енмыс унджык бур лунъяссö. Меным колö керка вевт вежны, шиперöн вевття. Зэра лунö мöдiс ыджыд пач труба бердтыс визувтны. Мужиктöгыд да, ковмас медавлыны кодöскö.

**Матыстчö Микöл, тшöтш няньла могөн. Көнкö удитöма нин тяпни-тыштны. Босьтö ящик, пуктö сийöс бокнас.**

МИКÖЛ (*пуксигмоз*). И кодi лоö медбөръяыс? (*Серöктö.*) А ме лоа медводдзаён.

ФИСКА. Мыйла нö тэ медводдзаён лоан? Ме кор локтi, танi некод эз вöв, сiдзкö, ме лоа медводдзаыс. Гөгөрвоин?

МИКÖЛ. Да ме шмонита, йöй нывбаба! Дерт жö, тэ, кодi нö мöд вермас лоны...

ТАМАРА. Бабаяс, тайö Микöлыс бара нин, тыдалö, юыштöма кыськö. Видзöдöй, кутшöм гажа. Аддзöма тай. Юрнас öтарö-мöдарö чаплöдлö, кокъясыс тай эськö оз сорсьыны да, веськыда на ветлöдлö.

МИКÖЛ. Аддзи. Ме да ог аддзы? Коса доръевтi кодлы колö, вот и гажа. А мый, оз позь? (*Кияссö паськöдö.*)

ГЛАША. Тэ, Микöл, водзö эн содтысь, а то аски асыв он садьмы да скöттö он вермы лэдзны йирсьынысö.

МИКÖЛ. Ог, ог. Талун рыгнас телевизор пыр бур кино лоö. Кöсья видзöдны. Важөн нин телевизорсö эг видзöдлы, гажöй быри. Кор нинöм вöчны, верма лунтыр видзöдны.

ФИСКА. Кывзöй, бабаяс. А кодi аски муно ыжъяссö да кö-заяссö видзны? Ме вунöдчи. Глаша, тэ мунан али кодi?

ГЛАША. Кыдзи кодi? Он ли мый тöд? Талун видзисны Тамаралөн челядьыс, аски тэнад лун, а аскомысь ме муна.

ТОНЯ. Кывзы, Глаша, ме тэкöд вежсьыны кöсья. Верман он? Аски колö сельпоö тöварла ветлыны, а аскомысь верöслөн кулан лун, кладбищö вылö гусö лöсьöдыштны ветла.

ГЛАША. Ме бара и ог тöд. Колöкö, вежсям.

ТАМАРА. Вузасьысьлы кö колö — ставөн вежöны. Меным кольöм тöлысьö ковмис, да некод тай, небось, эз веж. А сылы колö — пöжалуйста! Кутшöм нö сылөн сэтшöм привилегия, ме мыйкö ог гөгөрво?

МИКÖЛ. Колö кö, Тамара, вежа. Меным öткодь. Тэ босьт öти доз одеколон, пыр и вежа. Тэ сöмын босьт.

ФИСКА. А тэ мый, одеколон юан? Али мöд мог вылö?

МИКÖЛ. Мыйла юны? Кокъяс зыравны. Бур йöз шуöны, одеколоныс пö медся на отсалö. Карын кывлi... Ёна ошкисны.

ТАМАРА. Кутшöм наян: сöмын пö одеколон босьт. Ме, сiдзкö, ачым видза. Вай тэ босьт, а ме вöча, мый тшöктан. Сёрнитчим?

ГЛАША. Кодi?! Тэ? Дугды, эн сөр! Медым тэ видзин?

ТАМАРА. Мыйла? Ме збыль шуа, ог сөр.

ТОНЯ. Да ме тöда, кыдзи тэ видзан. Вöтлан мöдлапöлö пемöсьяссö, лыа вылас колян, ачыд мунан.

ТАМАРА. Кытчö муна?

ФИСКА. Кытчö тэ мунлан? Турун пуктыны. Ытшкöмьд тай ылі видзсö. Али эн тэ? Мый, шунытö нинöм?

ТАМАРА (*сувтö кильчö пос тшупöг вылас, босьтö ассьыс бедьсö, кодöс пуктöма вöлі пельöсас*). Фиска, а тэныд кутшöм шог? Тэ чайтан, ме ог тöд, мый тшöтш ветлан скöт видзигад, тэныд кö колö. Меным ковмас — и ме муна. Гөгөрвоин! Ачыд быдлаö суйсян. Ни öти оль он коль, ытшкöмьд став шор пö-лönсö. Менам зорöд дорöдз воöмьд. Яндзимьд абу.

ФИСКА. А тэ менам град дорöдз воöмьд. Ме тэныд мыйкö шуи? Нöшта вомсö паськöдлö.

ГЛАША. Тэ, Тамара, менсьым став капуста град бокöс ытш-кöмьд. Ачыд пыр норасян: «Ой, коскöй висьö, ог вермы нинöм вöчны». А асывнас видзöда: сöмын полсьö косанас! Некыт тай оз вись.

ТАМАРА. Вой кежлас мавтла, да дерт оз вись. Вот и полсья, пока ог кыв висьöмсö. Мазьыс кö эз вöв, ог и тöд, кызди эськö турунсö пукті.

ТОНЯ. Бабаяс, тырмас тiянылы пинясьны. Аددзöмныд, мый понда. Туруныд таво тырмас ставлы. Со кызди быдмöма — быгтьö пöльтöма. Быдлаын валъялö, ытшкы да ытшкы. Со мый дыра пинясид, Микöл весиг унмовсис. Мыйкö, тыдалö, вöтасьö.

МИКÖЛ. Ме ог узь, кывза пинясьöмныгтö. Но и бабаяс! Ог мöд тiянылы косаястö тöчитны, мунöй ытшкöй ныжнас, видзöдлам, уна-ö ытшканныд. Кутанныд пинясьны — ме дорö эн локтöй.

ТАМАРА. Ог и лок. Ме, ковмас кö, Витя дорö ветла. Сiйö талун карысь локтіс. Öнтай паныд лои меным. Помалöма велöдчынысö. Висьталіс, локті пö овны татчö. Карас дышöдöма.

ТОНЯ. Со тай, тыдалö, сiйö и локтö. Ок, кутшöм мужик лоöма, дзик бать кодьыс. Ог тöд, Тамара, тöчитас оз косаястö. Эз кö карас вежсьы.

**Кильчö дорö матыстчö Витя. Öтар киас кутö ыджыд сумка, мöд киас пакет. Пакетсö вуджöдö сумкаа киас, куш кисö нюжöдö Микöллы.**

ВИТЬÖ. Чолöм, Микöл дядь. Бур лун ставныдлы.

МИКÖЛ. Чолöм, Витя. Воин мамыдлы отсасьны?

ВИТЬÖ. Эг, сөвсьöм вылö локті. Дышöдіс карас. Сэні ватöгыс да вöртöгыс гажтöм, а гортын ме ставсö тöда: быд пу вöрсьыс, юсьыс быд йир, кöні чери сулалö.

МИКÖЛ. Да, Витьö, збыль шуан. Гортыд горт и эм. Ме кор ныв дорö карö ветла, кык-куим лунысь дырджык ог жö ов, гортö бөр кыскö. Ныв корö: «Бать, олышт нöшта, кытчö тэр-масын? Удитан на гортад мунны». А ме сылы: «Ог вермы тані овны, зэв шума, и уджыс абу — ни пес, ни ва оз ков вайны. Нинöм тiянын вöчнысö. Гажтöм».

ТАМАРА. Микöл, тэныд нылыд, көнкö, винатö эз кисьтавлы, сiйөн и гажтöм вöлі.

МИКÖЛ. Мыйла эз кисьтлы? Пыр вöлі сiйöйд пызан вылас сулалö. Ю мыйта колö. Сöмын öлöдіс: «Батьö, юыштан кö, ывла вылас эн пет, верман вошны либö милицияö сюран».

ТАМАРА. Вот мыйла тэныд оз кажитчы карас овны! А ме чайта, мый нö, мися, Микöлыс регыдөн ветлö, бөр али мый вöтлöны?

МИКӨЛ. Йой тэ, Тамара, дзик йой. Ме тэныд висьтала: ог вермы сэні овны. Гөгөрвоин? Нөштаысь висьтавыны?

ФИСКА. А менам челядь мунисны карас, да оз и воыны. Көнкө, некор, либө удж вывсьыс оз лэдзны.

МИКӨЛ. А мый налы тэ дорө воынысө? Тэ найөс сөмын пинялан дугдывтөг. Сійөн и оз воыны, весиг виддыны.

ГЛАША. А! Кодлы нө ми өні колам? Кор ичөтөсь вөліны, сэки налы колам вөлі, а быдмисны — вунөдісны. Коктьяс вылас сувтісны: асланыс туй воссис. Дум выланыс усяс, мый көнкө мам оло, воласны гоз-мөд лун кежлө, и бөр асланыс карө.

ТАМАРА (*Витьёлы*). Тэ, Витя, эн на вунөд, кызди косатө лэчтыны? Коркө меным сэтшөм бура лэчтылін, гожөм чөж ытшки. Трепалита и бара ытшкө, быттьө пуртөн вый вундан.

ВИТЬӨ. Эг на вунөд. Микөл дядь велөдліс, да нэм кежлө киподыс коли. А мый, кодлыкө лэчтыны колө? Вайө лэчта.

ТАМАРА. Вот и бур. Тарыт и вая.

ВИТЬӨ. Вай. (*Босьтө ньөр га мыйкө гижө му вылас. Сэсся пуктө Микөлкөд орччөн ящик га пуксьө.*)

МИКӨЛ (*кисө пуктө Витьёлы пельпом вылас*). Висьтась, Витя. Мый карас выльыс? Важөн эг ветлы да, көнкө, ставыс нин вежсис сэні.

ВИТЬӨ. Мый выльыс? Нинөм абу сэтшөмыс. Уна машина лои — сьөкыд лоавны. Сэсся йөзыс унджык. Кыськө воисны, выль керкаяс вөчөны. Мукөд керкаыс өкмыс судтаа, а то и унджык. Нинөм бурыс абу. Тані сынөдыс да ваыс медся сөдз. Ме сы понда и бөр локті. Тані, чужан сиктад, медся бур.

ТАМАРА. Витя, тэ менсьым челядьсө эн аддзыв? Эз и локны отсасьны турун пуктыны. Энлы, воласны да ме налы петкөдла, кызди мамсө вунөдны. Мед видласны мыйкө воча шуны.

ВИТЬӨ. Эг, Тамара тьот, некодөс эг аддзыв. Карыд өд сиктсьыд ыджыджык. Дас вит пөв, а то и унджык. Ёна он на и паныдась төдсаыдкөд.

ФИСКА (*быттьө садымө*). Талун няньсө нө сэсся ваясны оз? Луныс коли.

ГЛАША. Да, тыдалө, коли. Регыд мөсьяс воасны, ковмас мунны лысьтысьны. Сёрма, тыдалө.

ФИСКА. Меным көлуй пожъявны колө. Песлалі, а эг пожъяв.

МИКӨЛ. Витя, тэнад сьөмыд эм али абу? Ме мыйкө этша босьті.

ВИТЬӨ. Эмышт. Мыйта тэныд колө?

ТАМАРА. Кызди мыйта? Курыдтор вылас озджык тырмы.

МИКӨЛ. Ланьт! Тэ, Тамара, чайтан, мый менам сьөм абу? Ме босьта военнөй пенсия, тиянысь кык пөв унджык. Гөгөрвоин!

ТАМАРА. Да чөв, чөв! Оз позь нин и вом восьтны. Заслужитін, со и босьтан. Ёні воюйтлөмъястө пыдди пуктөны.

ФИСКА. Микөл, абу кө гусятор, висьтав, мыйта босьтан?

МИКӨЛ. Мыйта босьта, ставыс менам.

ФИСКА. Уждылан-ө меным мыйтакө?

ТОНЯ (*лөсьөдө юрсисө*). Микөллысь көсийи мыйкө юавны, да тэ, Фиска, торкин.

ВИТЬӨ. А тэ, Тоня тьотка, эн жуглы юртө сійөн, мый көсийин да вунөдін. Ачыс коркө воас юрад, небось. Мөдтор юав дай.

Ме пыр сідзи воча: вунёда кө, мөдтор йылысь мөда сёрнитны. Регыд и бөр воас вунлөмыс.

МИКӨЛ (*матыстчө Фиска дорө, пуктө кисө сылөн пидзөс былө*). Фиска, воны рытнас телевизор видзөдны, бур кино лоө.

ФИСКА. Мун, пöрысь көзел! Босьт китö пидзөс вылысь. Йöймин, али шондйыс юрад вартіс? (*Ставөн сералöны.*)

МИКӨЛ. Мый нö куш пидзöсьястö мыччөдлан? Абу яндзим Витясьыс? Ладнö, ме пöрысь, а сійö öд том зон на.

ГЛАША. Витя, мый сэтшöма гөрдөдін? Микöлыс öд шмонитö. А тэ, Фиска, лэдзышт юбкатö, збыль абу лöсьыд.

ФИСКА. А мый абу лöсьыдыс? Ме абу нин том, мый ме вы-лö видзөднысö? Пидзöсьяс кушöсь! Но и мый?

ТАМАРА. Фиска, вочавидз Микöлыслы. Сійö тэнö кино ви-дзөдны гортас корис. Көнкö, ветлан жö öд сы дорö?

ГЛАША. Фиска... Тэ ветлы, ветлы, а аски асывнас, скöt вöтлігад, висьталан миянлы, кыдзи кинотö видзөдінныд.

#### Бара ставөн сералöны.

ТОНЯ. Фиска, эн бара-й мун, тэнö сійö аски асылөдз оз лэдз.

ВИТЬÖ (*быттьö яндысьыштöмөн*). Няньсö важөн виччы-сянныд? Төді кө, мый абу на, эг эськö и лок. Бурджык, вадорö кө лэччылі вугыр шатöн. Мыйкö öд шедіс эськö.

ГЛАША. Со, юрö воис! Витя, тэ прав и вöлöмыд. (*Бергöдчö Микöлмань.*) Микöл, тэ көзелтö эн на начкы? Менсьым Мотяос колö эськö вайöдлыны сы дорö?

МИКӨЛ. Колö кө, матөдлам. Рытнас кыскы ме дорö дай.

ФИСКА. Ме öд прöста ог шу тэнö козёлнас! Вай пö ме дорö гортö кыскы!

МИКӨЛ. Йöй баба! Мися, менам көзел дорö, а оз ме дорö. Он али мый гөгөрво? (*Ставөн бара босьтчöны серавны.*)

ТАМАРА. Воасны ыж-көзаыс, да ме ассьым тшötш матөдла. Мыйкö, тыдалö, эз артмы бөръя матыстлöмнас. Мыйта кад нин колис, а войбыдъясөн няргö.

ГЛАША. Пöрысь көзел помсьыд!.. Көзяиныс кодъ жö, көнкö. Микöл, сідз али абу?

МИКӨЛ. Ог бара и тöд. Ті, бабаяс, унджык төданныд. (*Сёр-нисö бергöдöм могысь.*) Витя, вай куритöд, эм кө.

ВИТЬÖ. Микöл дядь, ме ог курит. Эг велаавлы.

МИКӨЛ. Но!... Збыль ли мый он курит?! Эштöма тай.

ВИТЬÖ. Збыль. (*Ки пыдöснас чышкö плеш вывсьыс пöсьсö.*) Дай куритчöмсьыд нинöм төлкыс абу. Ме, бурджык, босьта кампет да нёняла, а куритны ог кут.

ФИСКА. Вот и бур, Витя, вот и бур! Нинöм куритны. Ме лавкаö быд воліг босьта куим-нель пачка куритчансö. Пиöй вомсьыс оз и лэдзлы. Быттьö паровоз, пушкö. Мый сыысь бурыс, ме ог тöд.

ВИТЬÖ (*чеччö га петö туй былö — оз-ö лок нянь машинаыс*). Мыйкö талун дыр оз воны. Эз-ö жугавны кытчöкö.

МИКӨЛ (*тишötш чеччö, мөгöдчö Витя бөрся*). Дышöдіс тані пукавны. Колö кокъясöс да коскöс веськöдыштны. (*Мунöны орччөн моз.*)

ГЛАША (*сувтö*). А ме ветла лавка саяс. Коді мекöд?

ФИСКА. Эны, Глаша, ме тшöтш. А тэ, Тоня, видзöд, мед миянлань некод эз лок. Но?

ТОНЯ. Но, но. Мунö ветлö.

**Кольöны Тоня да Тамара.**

ТАМАРА (*матыстчö Тоня горö*). Тоня, тэ уджйöзöн сетлан меным? Гижыштлы тетрадяд бара. Кор босьта нажöткаöс, дзик пыр мынтыся. Ог пöрйöдлы, збыль шуа. Ме öд помнита, мый эг на вештысь, да быри сьöмöй, весиг нянь нинöм вылö босьтны.

ТОНЯ. Тамара, тэ кор кöсйин мынтысьнытö? Öнi бара коран... Ог сет няньтö и всё, вöч мый кöсьян.

ТАМАРА. Но, мездыв. Мися, сьöмсö больничаад ветлiгөн видзи. Кык вежон пийö куйлiс сэнi. Колö öд мый вылö кö и сёйны да юны. Мездыв нöштаысь, некор ог вунöд.

ТОНЯ. Ладнö, медбöръяысь... (*Думыштчылö да друг крапнитö.*) А аски кö ревизия локтас? Аслам зептысь пукта?

ТАМАРА. Но тэ öд тетрадяд пасьян, кодлы сетiн долгöнсö.

ТОНЯ. А налы сийö тетрадьыд... Ме öд сэтчöсö аслым тöд вылö пасьяла, мед ог вунöд.

**Матыстчöны Микöл да Витьö.**

ВИТЬÖ. Кылö, машина локтö. Гашкö, няньтö вайöны да.

МИКÖЛ. Тэ, Витя, тэрмасын кö, ме водзын ньöбась. Ме вевъялысь морт.

ТАМАРА (*другысь горöдчö*). Бабаяс, локтöй! Вошинныд али мый сэсся лавка саяс? Со Витя шуö, кутшöмкö машиналөн шыыс пö кылö.

**Котöрөн локтöны Глаша да Фиска.**

ГЛАША (*Витьöлы*). Збыль локтö машинаыс?

ВИТЬÖ. Да, чой йывсянныс аддзылiм. Пос вылас кайис кутшöмкö машина.

ФИСКА. Но, Тоня, восьт лавкатö. Регыдджык ньöбасям и гортö мунны колö.

Тоня матыстчö öдзöс дорö да кöсйö восьтыны лавкасö. Ставөн лöсьöдчöны пырны. Кильчö вывсянныс тыдалö вöлöктi локтысь машинаыс. Кодкö горöдчö: «Тайö абу нянь ваялан машинаыд да!..» Ставөн шызьöны. Тоня бледöдыштö чужöм вылас да ойöстö. Тамара видзöдлö сы вылö да шöпнитö: «Ревизияыд кö-а, Тоня!..» Глаша матыстчö Фиска дорö, мыйкö лöня шöпкөдö сылы пеляс. Мукöдъяс сулалöны, оз тöдны, мый вöчны.

ТОНЯ. Кутшöм нянь? Меным тшöктасны мынтыны став уджйöзнытö да нöшта и штрап на сюясны. Он али мый гөгөрво?

ТАМАРА. Тэ, Тоня, висьтав, мый колö вöчны, сяммам кö — отсыштам.

ТОНЯ. Да ланьт, Тамара, мыйөн тэ верман отсыштны? Тэнад медуна уджйöзыс. Отсалысь!

**Глаша матыстчö Тоня дорö.**

ГЛАША. Колö босьтны тетрадьтö да петны сиктö, уджай-завлөм сьомсö чукöртны.

ТАМАРА. А менам дзик нинөм абу.

ВИТЬÖ. Ме, Тамара тьöt, колöкö, удждыла тэныд. Менам мыйтакö эмышт.

ТАМАРА. Сё аттьö тэныд, Витя. Мед Енмыс сетас тэныд вын да дзоньвидзалун.

ВИТЬÖ. Да нинөмысь, Тамара тьöt. Ме öд сьомтö эг на сет.

МИКÖЛ (*гыр кывзö сёрнияссö*). Но мый, бабаяс? Ме видзöда да, вошанныд тi метöг. Кывзöй менö. Глаша, веськыда кö шуны, стöч висьталiс — колö босьтны уджайöза тетрадьсö да петны сиктö. Нинөм Тонясö грекö вöйтны.

ФИСКА. Да öд öнi унаөн на и абу гортасöсь.

МИКÖЛ. Тэ, Фиска, эн дзуг менö. Тэныд кывсö эз на сет-лыны. Кодi öнi абу гортас, сылысь аски асывнас корам.

ТАМАРА. А Тонялы мый вöчны? Ревизиянас öд öнi локтасны, здук мысти. Көнкö, сикт дорö нин матыстчöны.

МИКÖЛ. Бара торканныд! Тэ кывзы, ме висьтала, а бöрас кутан юасьны.

ГЛАША. Ланьтлöй, бабаяс, мед Микöлыс висьталас. Эн нин торкöй сийöс.

МИКÖЛ. Кывзы, Тоня. Öнi мунанныд ставөн гортаныд, а ми Витякöд пуксям да кутам виччысьны найöс. Кор локтасны да юаласны тэнö, ме висьтала, мый мунiн районнöй больничаö аслад чой дорö.

ТОНЯ. Но и мый? Найö аски бара локтасны.

МИКÖЛ. А ми шуам, мый тэ мунiн куим лун кeжлö и мый тэнад чойыд кулан выйын. Ставыс лоö бур. Сийö каднас став сьомсö чукöртан.

ТОНЯ. Ме бара ог и тöд, позьö оз тадзи вöчны?

ГЛАША. Мыйла нö оз позь? Позьö, дерт. А няньыдла аски орчча сиктö ветлам. Гуляйтiгмоз. Абу тай ылын.

МИКÖЛ. Сидзкö, мунöй... Быттьö эн и вöлöй тани.

**Нывбабаяс мунöны.**

**МÖД ЮКÖН**

**Лавка кильчö дорын Микöл да Витьö.**

МИКÖЛ (*асьсö такöдöмөн моз*). Витя, эн пов, ставыс лоö бур.

ВИТЬÖ. Да ме, Микöл дядь, ог пов.

**Пуксьöны кильчö пос тшупöд вылö да виччысьöны. Кольö некымын минут.**

МИКÖЛ (*кагсö гженьгöдгём могысь*). Но мый, Витя, карсьыд гöтырпутö аддзин? Миян сиктын öд нылыд этша. А тэ кодь томыс и дзик абу.

ВИТЬÖ. Эм примета ылын öти. Кöсийö гожöм шöрнас воыны гоз-мöд лун кeжлö.

МИКӨЛ. Но и бур, сідзкө. Гөтрасьны кутан, да эн вунөд свадьба вылад менө корны. Локта быть, гудөкөн йөзсө гажөда.

ВИТЬӨ. Ог, ог вунөд. Медводдзаон тэнö и кора. Но гөтрасьом йылысь ме эг на думыштчыв. Уна сьом колө сы вылөтө.

МИКӨЛ. Сідз, Витя, сідз. Öнi быдлаö уна сьом колө. Но мый? Машинаыс вошис али мый? Абу тай мыйкө.

ВИТЬӨ. Ме, час, ветла, видзөдла. Төдмала, кодi локтис.

МИКӨЛ. Витя, энлы... Ме вай ачым ветла да төдмала. Абу кө ревизия — Тонялы колө юөртны, мед ёна оз майшась. Көнкө, полө и керкасьыс петнысö, дзебсясьö. А тэ виччысьлы танi, гашкө, нөшта кодкө локтас.

ВИТЬӨ. Ветлы, меным өткодь. Микөл дядь, а ме кысь кута төдны, локтас оз Тоня тьоткаыс бөрыннас?

МИКӨЛ. А кызди нө оз лок? Локтас, дерт. Йөзыс өд удж бөрын ньобасьны воасны. Но, ме мөдi.

**Микөл мунө. Витьө кольччө өтнас. Пукалыштіс, чеччис, кутіс ветлөдлыны да шутлявны аслыс моз кутшөмкө сылан. Сідзи ветлөдлө өтарө-мөдарө кильчө помас.**

ВИТЬӨ *(аслыс ныр улас)*. Да! Куим вонас нинөм абу и вежсьома. Йөзыс кутшөмөсь вөліны — сэтшөмөн и кольөмаөсь. Тайө кильчө пос тшупөдыс мөдiс төрмыны карө мунігөн на, а со — некод нинөм абу и вежлөма. Тыдалө, ковмас ки пуктывны, лөсьөдыштны.

**Кодкө шыөдчө Витьөлөн мыш сайсянь: «Кодкөд нө, Витя, сёрнитан?»  
Витьө өдйө бергөдчө да аддзө мышкас сулалысь Тоняөс.**

ВИТЬӨ. Да ме ачым аскөд. Некод, мися, абу и вежлөма весиг пос тшупөдсө.

ТОНЯ. Да некодлы некутшөм шог абу. Вермасны и пөдлавны магазинсö... А көні нө Микөлыс? Гортас али мый муніс?

ВИТЬӨ. Сійө төдмавны муніс, кодi машинанас локтис. А сэсся тэ дорө көсйө вөлі пыравны, сьөлөмтө лөньөдны.

ТОНЯ. Но лок, пырам магазинас. Ме гортын мөвпышті — ревизия кө локтас, мед и штрапуйтасны, да мед көть и удж вылысь вөтласны. Ог майшась. *(Восьтө өшалысь томансө)*. Кызкө мынтыся. Сөмын мед тюрьмаө оз пуксьөдны, сыысь неунасө быттө пола жө. *(Воськовтө магазинө)*.

ВИТЬӨ *(пыригмоз, бөрсяньыс)*. А ті уна-ө йөзыслы уджда-лінныд?

ТОНЯ. Уна, Витя, уна. Көнкө көкъямыс сюрс гөгөр лөө.

ВИТЬӨ. Да, абу этша. *(Зепсьыс перйө папуша.)* Со, Тоня тьот, ме верма сетлыны куим сюрс. Унджыкыс менам абу. Бөрыннас ньөжйөникөн сетанныд.

ТОНЯ. Да мый тэ, Витя? Ог ме босьт. Тэныд аслыд на ковмас. Тэ том зон, да и мамыдлы отсавны колө.

ВИТЬӨ. Нинөм, кызкө артмөдчам. Босьтлөй.

ТОНЯ. Ме ог и төд, кызди тэнö аттьөавны. Но, сідзкө, зэв ыджыд аттьө, коркө ставсө бөр бергөда.

ВИТЬӨ. Нинөмысь, Тоня тьот. Мед тіян ставыс бур вөлі-а. Кызди йөзыс шулөны: колө өта-мөдлы отсасьны мыйөн вермам.

---

ТОНЯ. Витя, нёштаысь шуа: ыджыд аттьö ставсьыс! *(Чышкö синвасö чышъян помнас.)*

ВИТЬÖ. Да мый тi? Теть Тонь, дугды асьтö шогö уськөдны. *(Ланьтö, инмөдчö Тонялы пельпомас.)* Тоня тьöt, видзөдлөй... Микöл дядь котөрөн локтö... Али пышйö кодыськö. Мыйкö, тыдалö, лоöма.

МИКÖЛ *(горзö ылысянь)*. Тоня, эн на игнав магазинтö, виччысьлы менö. *(Матыстчö на горö.)* Ревизияөн и локтöмаöсь машинанас, но талун орчча сиктö мунöмаöсь. Ме гортö котөртлi... Съём босьтi аскöд, кодöс тай чукөртлi кувсигкежлам.

ТОНЯ. Мый тэ, Микöл? Мый оз ковсö сöран? Кувны! Мед татшöм сёрниыс сэсся пока эз вöv! Кылан менö? Кор воас мунан кадыд, став сиктөн на и колльöдам, а öнi чöv ов...

МИКÖЛ *(тэрмасьмөн, Тонялы)*. Босьт, шуа! *(Мыччö вит сюрс.)* Босьт. Аски ревизиянад миянö локтасны. Кылан он?

ТОНЯ *(синва сорөн)*. Со öд!.. Витя куим сюрс сетiс дай.

ВИТЬÖ. Босьтöй, Тоня тьötка, босьтöй. Кыдзи шуöны: «Кор сетöны — колö босьтны, кор нöйтöны — колö пышйыны». Босьтöй, и нинöм оз ков шуны.

ТОНЯ *(босьтö съёмсö Микöл киясь да юрсяньыс кок улöдзыс пуктö мужикъяслы ыджыд поклон)*. Аттьö тэныд, Витя. Аттьö тэныд, Микöл... *(Видзөдлө енэжланьыс.)* Аттьö тэныд, Енманöй, мый эм на югыд свет вылас бур йöзыс. *(Кöсйö окавны Витьöлысь да Микöллысь кияснысö.)*

МИКÖЛ. Тоня, ноко дугды. Йöймин али мый? Кияс окавны мöдiн! Пыр лавкаад да лöсьöдчы. Нянь вайöны со, машинаыс сибдылöма чой улас, кыскöмны тракторөн. Звөнитлiсны и орчча сиктсьыс, талун миянö воласны няньлаыс. Ковмас дыр на вузасьны.

ВИТЬÖ. Мый, збыль нянь машина?

МИКÖЛ. Ме некор ог ылöдчы. Висьталi сиктын, и ачим котөрөн. Медводдзаөн и лои со! *(Сералö.)*

ТОНЯ. Но, вот и бур, вот и бур. Пырамöй магазинас. Колөкö, и сё граммөн на гөститöда. Эм менам дзебасын. Татшöм молодечьястö, шогысь мездысьястö, ог жö косөн коль. Кыдзи шуöны киноясад: «За счёт заведения!» *(Тоня тайöс шуалiгмоз весиг сьылышталö быттьö.)*

**Пырöны магазинö. Мукöдъяс тшöтш воалöны ньöжйöникөн.  
Серам, сёрнияс.**

ЗАНАВЕС.

ПОМ.



## Шаньён вөлі Архипыч

Владимир Ширяевс кор медводдзаыссьо аддзылі, ог и помнит. Гашкё, пединститутын велөдчигон на: коми гижысьяс сэки некымынён студентъяс дінад волевлісны эз нин и сэтшөм шоча... А вермас лоны, и Визины на. Институтөдзыс, школа бöрын пöшти пыр жö, матö кык во кeжлö веськалі (корисны!) райгазет редакцияö. Гижысьяс, воасны кө районад, медводз пырöны редакцияö. Ширяевыд сэки эськö радиоын уджаліс, но сылön петалöма нин вель уна висът да повесът. Книгаясөн тшöтш! Гижысь туйын нин ветлөдліс.

Чужлöма В.Ширяев Нёбдінын 1926 воö (юль 23 лунö). Чужан сиктас кольöма челядьдырыс, сәні жö велөдчöма школаын. Вöлöма-ö томдырыс, зонмалан кадыс, сьöкыд и шуны. Сійöс таялöма война. 17 арöса Володя флотын нин. Абу пö ыджыд, абу морскöй ли океанскöй, а берегсö да гырысь ю вомъяс видзысь сторожевöй катеръяс. Мөд Дальневосточнöй фронт. Вöлöмаöсь и чорыд кось-сражениеяс.

Морскöй пограничнöй войскаад Владимир Ширяев сибдылöма сизим воысь дырджык кeжлö!

...Гижны босьтчысьыд первойсö пырджык поэт. Ширяев — тшöтш. Эськö и дыр куйлөдöм бöрын пö, но медводз петöма челядьлы кывбур чукөр («Асыв», 1957). Сэсся прозалы туйыс писътöма — «Выль посёлокын», уна мукöд повесът да висът. Найöс том коми лыддысьысь, дерт, тöдö. Владимир Архиповичлы сетöма Коми комсомоллысь премия, а 1976 воын лоис Коми АССР-са культураын заслуженнöй уджалысьöн.

Гижысь бура гөгөрвоис теш-шмонь. Но вöлі зэв аслыссикас мортөн. Шмоньтö, шуам, радейтис, а ачыс нэмнас, буракö, лыдаысь нюмунліс. Ме тай унаысьтö эг казавлы-а. Весиг ветлөдліс та йылысь сэтшөм басни. Чукөртчöмаöсь редакцияс, мыйкö быттö содтöд кыпыд лолаöсь. Висьталас кодкö мыйкö серам петкөдланаös — ставөн гөрдлöны, стеныс сыркъялö. А Архиповичлөн чужöмыс быттö кын! Тэ нö пö мый, юалöны. А сійö воча: лок пö киняулös гильöдышт, колöкö, серöктыссяс.

Зэв терпелив морт. И ёна висысь. Нэмсö нёрпаліс ыджыд артериальнöй давленииён. Öтчыд но тшук нин мат! Ковмас пö врач дінö ветлыны. Еджыд паськöмаыд видлалас да синсö арыштас:

— Тэ нö кызди татчö воин?! Тэныд жö öні куйлыны колö. Вөрзёдчытöг!

— А мый сэсся, менам пöшти пыр татшөм да...

Гожом шөр, пöдтана жар лун. «Войвыв кодзулын» сöмын В.Ширяев да Е.Рочев. Татшөм поводдянад гипертоникыдлы

содтөд маета. Владимир Архипович лэдзчысьома джоджас да рукопись лыддё. Ляскысьома кодзыд батарея дінас: век нин кутшөмкө кокньөд. Телефон звөнок. Трубкаысла нюждөчө Егор Рочев, кывзыштө да мыччө ёртыслы:

— Шираев, тебья.

Мөдыс босьтө трубкасө. Сэні бругнө, кыз позьö гөгөрвоны, кыз да ён морт:

— Ты что там, уже из-под земли?!

— Пока из-под стола,— вердлытөм кань гөлөсөн вочавидзö Ширяев.

И найö мыйкө водзö нуөдоны сёрнинысö. Öтиыс — бругнан, а мөдыс — лөвтышталан, норасян гөлөсөн.

...Льомъяуын, гижысьяслөн дачаыскөд дзик орччөн, панө-маось кутшөмкө удж. Ноксьоны брус-тьөскөн. Союз правлен-ньоса пред Геннадий Фёдоров полö, мед эськө нинөм эз гусявны да эз пыллыны. Шыасьö гижысь котыр Союзса литконсультант В.Ширяев дінö.

— Владимир Архипович, тэ мун да олышт тайö лунъяссö Льомъяуад. Видзөдыштав, мед оз вывтiасьны.

Архипович коллялө сэні лун, коллялө мөдөс. Вөчны нинөм, гажтөм. Ичөтик посёлокад дзюляник лавка воссьыштлывлө. А сэні мыйкө-мыйкөыс эм. Ширяев и видлышталө неуна. Сэки дачаас локтас Альберт Ванеев. «Временной поверенной» оз и төд, мый йылысь ськөд төлкуйтны. А видлыштөма бара. Колö сёрнитны. Забеднөыс босьтас. И сёрниыд татшөм аддзыяс:

— Альберт, менö талун лунбыд нөйтiсны,— содтөд нор гөлөсөн на артмас.

Архипычлөн висьтасьöмысь поэт пузяс. Ыджыд да ён, сийö дась нин дача дінсьыс быдөнөс шыблавны чой горув. Меж юрысь гырысьджык кулакъяссö шамыртөма. Кызди нө, öбидитөмаось Архипычөс?!.

Но Альберт Егоровичөс сяммасны такөдны да эскөдны, мый нинөм сэтшөмыс эз вөв и лонысö эз вермы. Збыль пö сідз!

Помасяс ваксьөмөн. Нюмыс вөрзьөдас и Владимир Архиповичлысь вомкөтшсö: пөръялөма пö лои.

...Райгазетын уджалігөн гожея рытö (али стөчджык лөо шуны, арся,— нянь вундiсны нин да!), зэв шоньд рытö Визинсянь дышпырысь, зэв ньөжйö зуньгырта гортö. Джуджыдсьыс-джуджыд гөра йылö пуксьөма мяян Кычаныб грезд. Кодкө бөрйылөма жö овмөдчанінсö! Быттö кымөрас нин каян. Дерт, тадзи сөмын куимладорсянныс, а пармаладорсянныс өт-весьтасьöма став Коми муыскөд. Да, кодкө бөрйылөма жö сэтшөм ним! Вөвліс-ö важ нэмъясö тані кутшөмкө да кычан кок?! Но грездным Кычаныб... Сэтшөм вот ыб. Рөмдыштiс нин. Локта, гашкө, кино бөрын. Вунөма. Видзөда, кодкө куткырась туй дорас, туй пөлөныс коркө важөн нин писькөдлөм канаваас кокъяссö лэдзөма. Матыстчи — Ширяев!

— Тэ нө мый тані, Владимир Архипович?!

— Шойчыны пукси, Кычаныбө кая да. Радиокорреспондент,— шлопкис орчча магнитофонас.

— Кыча-аныбө-ö?— видзчысьтөмторсьыд менам вом кальк-муніс. Чайтi, мися, кодсянькө менсьым грезд нимтö төдмалөма-кывлөма да көсийö теш вөчыштны ме вылын нин. Но кывза да,

сёрнисё збыльпырысь панё. Муна пё Кычаныбё, лючки кё туйсё индiсны. Пемдытёдзыс колё воёдчыны.

— А кутшём мог миянё суис?— юася.

— Тiянё?! Першин Михаил тай кывсё бур комбайнёрён. Вот сы дiнё. Тiян грездса мёй?

— Эм сэтшёмыс, Ёньё Мишкаён шуёны. Сiё давъяс нин олё, эстчаньын, вёр дорас. А ме улыс грездас. Деревняным эськё ичётик, да то тай кызди нюжалёма — быдса верст. Мерайтлёма и восьлавлёма.

Вель пемыд нин лои сэк кості. Владимир Архипович, висьталі тай, кызди ветлөдлө — усьёмысь и пов.

«Узям,— шуа,— ме ордын, а сэсся асывнас тыдовтчас».

Мам вердiс-юкталіс мыйёнкё. Узим. Асывнас гёсьтным водз чеччис да петкөдлём керкаланьыс пёрлаліс-восьлаліс.

Та бёрын ми, буракё, дыркодь эг аддзысьлөй. Владимир Архипович вёлі литконсультантнад, а сы бёрын — «Войвыв кодзулын» кывкутысь секретарён. Штабса начальник, кыз шуасны. Тайё тшук сы серти: быдтор вёчө кыз колё, öкуратнёя, сэсся писар почерка, воча письмөтө быть гижас..!

А сэк кості ме студенталі, салдаталі, вёлі газетын и партийной удж вылын. Кор сiё журналас ноксис, ме веськалі Москваё, аспирантураё. Аспирант кё, колё юнаджык гижны, мед төлк вёлі! Вот и ме босьтчи ыджыд статьяё, думысь — тёдчана темаё. И тайён мучиті сэсся и ачымөс, и Владимир Архиповичёс. Ме ордын кольёма Ширияевлөн сэкся куим письмө. Вөзъя «Войвыв кодзув» лыддьысьлы. Дерт, ог сы вөсна, мый куимнансё ыстөма меным, а сы вөсна, мый письмөясыс кутшөмакё ловзёдөны шань да мывкыд коми гижысьсө.

Куліс В.А.Ширияев больничаян, 1979 вося февраль 2 лунё. Сылы вёлі сөмын на 53 арөс. Сөмын!

Письмөяс бөрас пуктышталі некымын гөгөрвоөдана кыв.

*Чолөм, Геннадий Васильевич!*

*Аттё письмөсьыд. Төрыт ме звөнитлі Москваад, сёрниті Соколовакөд, колё вёлі төдмөдны ним, вичсё Лыткинлысь. Тшөкті висьтавны тэд поклон, ог төд, вөчис эз.*

*И.Гр. отпускын до 1.IV. Сы местаё мортыс эз сюр, уджалам асьным. Виччысям статьятө.*

*Тороповлы зэв срочнёя (Игнатовкөд өтлаын) дасьтім наградной лист «Знак Почёта» вылө за 9-ю пятилетку. Кутам виччысьны орден.*

*Сигнальной № абу на. Ыста тэд корректурасө. Чинтыштөма сы вөсна, мый «өшйис» помыс. Авторыс ачыс чинталіс.*

*Тайё повестыс петө «Север» журналын февральын-мартын. Гиж рецензиясө «Югыд туйлы», а миянлы ысты воддза статьятө.*

*Став бурсө.*

*17.II.76.*

*В.Ширияев.*

Соколова — Альбина Соколова, 1976 воас велөдчис сiё аспирантураас жө, көні и ме. Сыөдз и сёрөнджык вёлі партийной удж вылын.

---

«И.Гр.» — Иван Торопов, сэки журналса главнӧй редактор.  
Буретш петӧма кузь, творческӧй отпускӧ.

Игнатов — коми гижысь Михаил Игнатов (1933—1999).

*Геннадий В., чолӧм!*

*Лун-мӧд сайын нин воис тэсянь письмӧ, но сӧмын талун аддзи кад, мед вочавидзны сы вылӧ. И.Г.отпускын на. Уджыс вывті уна, ачыл тӧдан, да кор ещё оз тырмы главнӧй мортис, кык лун вошти дзик хозяйственно-финансӧвӧй делӧяс вылӧ (овмӧдчим дзик асьным, восьтім банкын асьыным расчӧтнӧй счӧт и с.в.), и сэк жӧ текущӧйыс пыкӧ: колӧ нин сдایتны апрель тӧлысья номер. Но, ничего. Шулӧмаӧсь тай: «Коммунисты, вперёд!» И.Г.-ӧс дзугны оз кӧсйы, мед гижас.*

*Статьятӧ сэтшӧма гӧрӧмьд, мый и лыддьынысӧ зэв сӧкыд. Ог тӧд, кыдзи писькӧдчас машинистка. Но ме да И.Изъюров лыддим. Колӧ сетны матысса кадӧ. Кытысь тэ босьтін, мый быть колӧ лоны статьялы 12—14 л.бок? Первойысь кыла. Сетам с «продолжением» кык номерын. Та йылысь ме сёрниті нин редакторкӧд телефон пыр. Содержаниеыс миянӧс могмӧдӧ. Сы вӧсна, мый апрель тӧлысья номер дась нин, кадыс оз виччысь, печатайтам статьялысь первой джынсӧ майын, а мӧд джынсӧ юньын.*

*Став бурсӧ тэныд олӧмын да велӧдчӧмын.*

*19.III.76.*

*В.Ширяев.*

*«Овмӧдчим дзик асьным»,— сёрниис, тыдалӧ, овмӧсӧн да сӧмӧн гижысь котыр правлениекӧд юксӧм йылысь.*

*«Статьятӧ сэтшӧма гӧрӧмьд»,— журналӧ сетны урчитӧм менам статья йылысь. Сійӧс ме босьтлі бӧр да зэв ёна вежлалі-редактируйті, позьӧ шуны — вылысь гижі-гӧри.*

*«...Печатайтам первой джынсӧ майын, а мӧд джынсӧ юньын». Сёрниис «Ӧтувъялӧн аслыссикас юкӧн» гижӧд йылысь. Ог нин тӧд мыйла, но петіс сійӧ эз майын-юньын, а во помас, журналлӧн 11—12 номеръясын.*

*Генн. Вас., чолӧм!*

*Воис письмӧыд, аттьӧ. Статьяыд сӧмын на петіс машинка улысь, и пыр жӧ ыста 1 экз. Но условие, мый тэ сійӧс ӧдйӧ лыддян да бӧр мӧдӧдан, он нин вӧч гырысь вежлалӧмъяс. А то ӧд миянлы колӧ лыддьӧдавын членъяслы. Арталам, мый статьясӧ лоас сетӧма майын да юньын.*

*Ыста тиӧтш и первой вариантсӧ. Миянлы сійӧ оз нин ков, а тэныд, гашкӧ, коркӧ да кытчӧкӧ сгӧдитчас.*

*И.Г. петӧ удж вылӧ аскомысь. Сэсся кокниджык лоас.*

*Гырысь вильторъяс абуйӧсь. Олам век на сідзи, корсюрӧ тыртчывлам да с.в. Гежӧдика звӧнитлывлӧ да пыравлывлӧ М.Игнатов.*

*Сэсся, буракӧ, пока и ставыс.*

*Кутла китӧ.*

*30.III.76.*

*В.Ширяев.*



## Литература историяысь

*Ме помнита, кыдзи воккөд тышкасьлім да мырддысьлім «Войвыв кодзув» журналнас, кор кутіс йӧзӧдсьыны Владимир Ширяевлӧн «Он вун тэ, Озъю» повесьтыс. Ме, буракӧ, коймӧд классын велӧдчи сэки, а вок мейсь нӧль арӧсӧн ыджыдджык, да гожмӧгъяснас сійӧ ветліс нин турун пуктыны, вӧлӧн юр кыскавны да куртны, и висътавліс сӧсся меным видз вылын гожся олӧм-уджалӧмсӧ, и сэтшӧм окота вӧлі ӧдйӧджык быдмыны да тшӧтш видз вылас ветлыны. А повесьтас — буретш гожм, том йӧзлӧн олӧм да турун пуктӧм, а ывла вылын турӧб да кӧдзид (повесьтыс ӧд тӧвся номеръясын йӧзӧдчис), и гижӧдыс казътылӧ воклы видз вывсӧ да гожся гажсӧ, и ме лыддя да быттьӧ ачым видз вылас овла повесьтса геройясыс-кӧд... Сійӧ и мырддысям вӧлі.*

*Чайта, менам арлыда йӧз окотапырысь казътыласны том-дырсӧ тайӧ повесьтсӧ лыддигӧн, а том войтырлы интереснӧ лӧӧ тӧдмавны сійӧ кадся уджсӧ да олӧмсӧ.*

*Михаил Елькин.*

**Владимир ШИРЯЕВ**



## Он вун тэ, Озъю\*

П О В Е С Ъ Т

### ПЕРВОЙ ГЛАВА

Та дырасӧ Светлана ньӧтчид на эз гуляйтлывлы. Нӧль час асыв нин, шонді мыччысьӧма, а сійӧ сӧмын на пырис гортас. Бать-мамыс, буракӧ, эз и кывлыны сылысь локтӧмсӧ. Некод тай воча эз петав-а. Найӧ тулысьяныыс нин узьлӧны сарайӧ зэвтӧм вонйын. А Светлана, кыдзи и век, водас керкаӧ, аслас крӧвать вылӧ.

А гашкӧ, нинӧмла нин и воддынысӧ? Водз олысь кӧзяйкаяс регыд чеччасны, пачьяс ломтасны. Вот-вот садьмас и мамыс, пачӧ би сюяс, сӧсся Сюрукӧс идралас-лысьтас да лудӧ колльӧдас.

\* Петавліс «Войвыв кодзув» журналын 1968 вося 1—4 номеръясын. Гижанногсӧ кольӧма вежтӧг.

Но Светлана век жö пöрччысис, водіс крöватъ вылö, вевт-тьысис кокныдик шебрасöн. Сöмын унмовсьны оз вермы. Мый-лакö талун юрыс сідзи и бергöдчö. Оз сöмын юрыс, а став комнатаыс. Мыйла эськö тайö? Кутіс думайтны. Тыдалö, сы вöсна, мый рытнас юис гöрд вина. Быдса румка. Нэмнас на винасö вом дорас эз матыстлы, а талун юис. Эз вермы пык-сьынысö, кöть бöрыннас муртса эз восöд.

Сöмын на школаын вöлі выпускнöй рыт, кодöс дыр нин виччысисны кöкъямысöд класс помалысьяс. Медбöръя рыт рöднöй школаын, кöні велöдчöма кöкъямыс во чöж.

Тайö рытнас Светлана медводдзаыс пасьталіс кельыдлöз рöма виль платтö, кодöс сылы вурöдісны школа помалігкежлö, кöмаліс ёсь ныра пелькиник туфли, кодöс öнöдз пыр жö на видзтіс, а сэсся муніс Зоя пöдругаыс дінö.

Светлана да Зоя олöны разнöй сиктъясын, но торйöдö найöс сöмын нейджыд шор. Верст джын кындзи костыс оз ло. Нывкаяс кöкъямыс во чöж велöдчисны öти классын, вöліны бур пöд-ругаясöн, öта-мöд дінсьыс, кыз шуласны, юрнысö эз янсöддыны. Век öтлаын ветлывлісны и школаö, и сиктса клубö кинояс да концертъяс вылö. А сы вöсна, мый Светлана оліс бокынджык и клубыс, и школаыс, сылы быть ковмывліс мунігмозыс пы-равлыны Зоя дінö, коді век нин вöлі виччысьö. Дерт, пöдругаяс корсюрö дузгöдчывлісны öта-мöд вылас, но öти либö кык лун мысти бөр бурасьывлісны.

Турьевъяс буретш вöлі пывсьöмаöсь да лöсьöдчöмаöсь уж-найтны. Опонь дядь пукаліс пызан помын да ки чышкöдөн чышкаліс чужöм вывсьыс шорөн лэччысь пöсьсö, а Марпа тьöтка ветлöдліс пачводз дорсянь пызан дорöдз, ваяліс сёян-юан да тасьті-пань. Зоя мыччысьліс пыді вежöсыс, паськыда нюмдіс Светланаы да бөр саймовтчис. Сійö, тыдалö, тэрмасьöмөн пась-тасис.

— Тшöкта вöлі пывсьыны, да бара ыръянитіс,— шуасис ны-лыс вылö Марпа тьöтка.— А сэтшöм на уна колис öдйыс, кöть сикткодöн пывсьы.

— Кыдзи нö ме йöз водзас пывсьöм бöрас пета?— кыліс пыді комнатасянь Зоялөн гөлöс.

— Сідзкö, ачыд вöдит пывсянъяссö асывъясын.

— И кута вöдитны.

— Эновт сійöс,— шуис Зоялөн батыс.— Такöд öд кокниа он сёрнитчы...

Татшöм сёрниясыс вöвліны и водзджык, мый вöсна Светлана кывзис увгöмсö, буракö, дзик веськодя.

Кор ставөн кутісны пуксявны пызан сайö, ёна кутісны корны тшöтш и Светланаöс. Мöдыс дыр пыксис, но мынан öмöй Марпа тьöткаыс да Опонь дядьыс. Киöдыс кутöмөн пуксьöдісны пызан сайö. Кöть пö öтлаын олышт пызан саяс, сэтшöма нин кö он кöйы нуръясьны да юны пöсь васö.

Опонь дядь перйис шкапысь вина сулея да румкаяс.

— Кодлöнкö нимлун али мый?— здук кежлö шöйöвошліс Светлана.

— Талун öд миян медся ыджыд нимлуныс,— шуис Марпа тьöтка.— Татчöс школа со помалінныд... Ен кö отсалас, и водзö позяс велöдчыны мунны...

— Енмыд сійö век отсалö, эм кö пельпом вылад юрыд да тöлкыд,— серöктіс Опонь дядь.— Сöмын тай тэд да меным абу отсавлöма... Мывкыдным абу судзсьылöма да.

— Сэки öд война муніс,— ышловзис Марпа тьötка.— Некор вöлі думайтны велöдчöм йывсьыс.

— Сійö, дерт, сідз,— нурбыльтіс Опонь дядь румкаясö вина кисьталігтыр.— Сідз кö нин шуны, Гитлерсö öд енмыс жö чужтіс.

— Кутшöмкö тай ен,— Марпа тьötка читкыртліс вомсö.— Ме ог эскы ни енлы, ни чöртлы. Сöмын тай «ен» кывйыс крукасьлас кытыськö нем виччысьтöг, важ олöмсьыс кольöма да.— Сэсся сійö друг бергöдчис нывъяслань:— Вай юыштамöй,— индіс синнас Опонь дядь вылö.— Мед этшаджык коляс талы.

— Юöй, абу жаль,— нюмдіс Опонь дядь.— Лавкасьыс öд эз на быр, восьса тай, майбырöй...

Ло мый лоас! Светлана чукуыртчыліс, вайöдіс румкасö вом дорас да öтпырысьөн гулькнитіс-юис. Марпа тьötка зэв öдйö тувкнитіс сылы свежöй чери тор, мыччис пызя шаньга. Тайö и отсаліс ыджыдджыка лолыштны да бырöдны вомысь терпитны позьтöм курыд көрсö.

Опонь дядь ещö на тыртіс румкаяссö, но Светлана сэсся эз нин видзöдлы на вылö, тэрыба петіс пызан сайысь.

Школаö мунігөн Светланагы туй чöжыс кажитчис, мый сійöс öні шатлöдлö öтарö-мöдарö и сы вылö дзоргöны-видзöдöны быд öшиньянь.

Кор нывъяс воисны школа дорö, сэні унаөн нин вöліны. Быдөн вöччöмаöсь, мукöдсö бокысянджык он и тöд, көть öтлаын велöдчисны. Ставөн чöскыда сералісны, мыйкö йылысь варовитісны. Небось, экзаменъяс дырйи тадзи эз вöвлы. Öні став тöждысьöмъясыс бокö вешйöмаöсь.

Зонъяс кытшалöмаöсь Виктор Поповöс, коді мыйкö зэв сьöлөмсянныс висьтавлö ёртъясыслы. Кадысь кадö зонъяс азыма серöктивлöны.

Кыдзи помнитö Светлана, Виктор век вöвлі татшöмөн, öткөн да зумышөн сійöс некор он аддзыв. Мукöдыскöд тшöтшъя, а тушанас наысь весьтөн кузьджык, пельпомъясыс верстьö дядьölөн пасьта. Но оз сöмын тушаыс вöсна сибавны сы дінö ёртъясыс. Мый көть оз тшöктивны школаын вöчны, некор оз дözмывлы. Кытчö он видзöдлы, быдлаын медводз Виктор: и лагерад, и самодеятельностьад, и редколлегияд. А öні быдса во нин вöлі школьнöй комсомольскöй организацияса секретарөн. И велöдчис ставсьыс медбура.

Талун Виктор пасьталöма лым кодь еджыд дөрöм, сьöд гачсö мичаа утужитöма, читкыльöсь сьöд юрсисö мичаа сыналöма. Артист да и ставыс.

Светлана зильö не видзöдны Виктор вылö, но и син бöжнас аддзö сійöс. Яндысьö видзöднысö. Зояысь полö. Ещö кольöм воын на Зоя ачыс гижліс сылы письмö, корис дружитны, а мöдыс немтор абу вочавидзöма. Мыйла эз вочавидз — код тöдас. Но Светлана тöдö, мый Зоялөн и öні на висьö сьöлөмыс Виктор вöсна. Ньöти яндысьтöг ачыс гаравлö та йылысь пöдругаыслы. Светланагы ёна жö воö сьöлөм вылас тайö зонмыс, көть и некодлы оз петкöдлы.

— Кадыс эм на, лэччылам Эжва дорөдз,— друг кутіс нуөдчыны Зоя.

Көть рытыс мича да шоньд, Светланаөс, веськыда кө шуны, өні ньөти эз кыскы вадорас. Мый сэтысь эз аддзывны? Но өт-кажитны пөдругаыслы эз вермы.

Лэччисны кыкөн, сувтісны бужөд йылас, лолыштісны тыр морөсөн. Тані збыльысь вөлі ставыс зэв мича да гажа. И көть кымынысь нин абу аддзылөма юсайса веж видзьяссө, лөзалысь расьяссө да пожөма ягьяссө, лөня шывгысь Эжвасө да сэті кывтысь-катысь катерьяссө да пыжаяссө, сьөлөмыд век кокняммылө на вылө видзөдігөн.

— А Викторыс вөччөма, этшсө оз төд,— друг шуис Зоя, тор-кис Светланагысь мөвпяссө.— Ыджыдө пуксьө...

— Мыйла?— нинөм гөгөрвотөма юаліс Светлана.

— Весиг и сёрнитны оз көйы.

— Ме тайөс эг казав,— лөня шуис Светлана.

— Тэныд сійө кажитчө?

— Да,— вочавидзис Светлана, сэсся содтіс:— Зэв шань зон...

— Ме сідзи и төді,— ырситіс Зоя, бергөдчис мөдарө да вөрзөдчис места вывсьыс.— Мися жө сы вылысь синтө он вештыв.

— Асьтө нө мыйла он аддзы?— друг падмыліс Светлана, сэсся мөдөдчис жө пөдругаыс бөрся, суөдіс.— Ме сылы письмөяс эг на гижывлы, и сійө меным эз жө...

— Тайөн менө эн укөрайт,— стрөга шуис Зоя.— Ме тэныд висьтавлі, кыдзи медся матыса пөдругалы, а тэ...

— Ме некодлы эг больгывлы,— кывкөрталіс Светлана. Сэсся кыкнанныс чөв ланьтісны, быттө воманыс ва босьтісны.

«Весьшөрө менө вежөктан,— думайтіс Светлана.— Ме өмөй мыжа сыысь, мый өти сьөлөм матыстчө мөд дінө, а сійө оз кыв тайө матыстчөмсө? Гашкө, Викторыслы мөд ныв кажитчө?»

Но висьталан өмөй өні Зоялы та йылысь? Бурджык чөв овны. Коркө өд ачыс гөгөрвоас.

Мыйөн воисны школа дорө, Виктор ачыс матыстчис нывьяс дінө, улөдз копыртчыліс на водзын:

— Персональной чолөм Светланагы, сэтшөмөс жө Зоялы.

— Ёнтай эн аддзыв али мый?— шуис Зоя.

— Эг слөймы здоровайтчынысө,— правдайтчис Виктор.— Мыйөн прөстми, ті абуөсь нин.

— Бара пөрийөдлан йөзсө,— серөктіс Светлана. А Зоя нарошнө зільө бергөдчыны мөдарө, кыв оз шу, ассьыс лөгсө петкөдлө.

— Попов ньөтчыд на эз пөрьясьывлы,— Виктор катовтліс юрсө.— Мый сійө висьталө — ставыс збыльтор.

— Зэв тай ёна гөрдлінныд-а,— дөзмөм гөлөсөн шуис Зоя.

— Тешкодьтор йылысь вөлі сёрниыс,— нюмдіс Виктор.

— Сідзкө, и миянлы тшөтш висьтышт,— корис Светлана.

— Абу гусятор,— Виктор кутыштіс нывьясөс сой пөлөдныс, нуөдіс стенбердса скамья дорө, пуксьөдіс. Ачыс пуксис эз шөра-костө, а Светланакод орччөн. Артмис сідзи, мый быттөкө Зоя колис пөддалөм өдзөс сайын.

«Мыйла нө эськө мөдарас эн пуксьы?»— думыштіс сәки Светлана, но немтор эз шу. А Зоялы тайө эз кажитчы. Сійө звирк чеччис скамья вылысь да муніс нывьяс чукөрө. Светлана

көсйис вөтчны сы бөрся, но Виктор кутіс сійөс, эз лэдз сувт-нысө.

— Тэ жө корин висьтавы,— шуис сійө.— Кывзы.

И Светлана кольччис, кутіс видзөдны Виктор вылө, кывзыны сылысь висьтсө, көть юрас гудрасисны дзик мөд думъяс. Сійө аддзыліс, мый пөдругаыс друг вошис нывкаяс дінысь.

— Öнтай ме висьталі, кызди төрыт Йигө Закар вошлөма,— заводитіс Виктор.— Тэ төдан Йигө Закарсө?

Быттьö Светлана оз төд тайö стариксö. Öти сиктын олöны. Кызди нывка помнитö, Закарыс век нин вöвлі татшөм: гөрда тошка, гөрбыльтчыштöма, век кытчöкө тэрмасьö. А кор кодзыштас да абу кө матын старукаыс, век гораа лөвтö öти и сійö жö сыланкыв «Рыгтя кадö, матушка, менö рөдитін». Öти строчка сöмын. А мыйöн аддзас гөтырсö, öти здукөн палялө.

— Вөйдөрлун сылөн гөтырыс мунöма кутшөмкө мөгөн орчча сиктö, а сэк коста старикыд лэчöма пывсян дорас, заводитöма ортсысьыс көджас пес пыртлыны да тэчны, мед пö зэрыс оз көтөд,— висьтавліс Виктор.— Пöшти көдж йиркөдзыс нин пестö тэчöма. Сэсся пырöма пывсян пытшкөсад куритчыны. Сэні пö лун сьомöснад ыркыджык. Сэк коста көджса чипасыд и вувзысьöма-пөрöма веськыда өдзөс вылад. Гажа юра-ö мый-ö вөлöма Закарыд, сідз-тадз, буракö, тэчöма пестö. Мөдас восьтыны өдзөстö — оз воссьы. Кымын өнджыка вөлөм зөркөдö, сымын өнджыка топалöны песъясыд. Быттьö пö өн тувйөн швачкөбтісны.

— Но и сөран жö,— сералис Светлана.

— Ачыс өд висьтавліс,— Виктор читкыртліс вöсньыдик сьод синкымъяссö.— Закарыд йөрмас пывсянад. Öшиньыс ичөтик, петны он төр. Жуглөма жö эськө стеклөсö, заводитлөма горзыны, но некод сійөс абу кылöма. Налөн пывсяныс бокын, шор дорын сулалө. Гөлөс бырмөныс чуксасьöма.

Школа дорö йөз пыр локталісны и локталісны. Не сöмын выпускникъяс да учителяс, но и ичөтджык классъясын велөдчысьяс да бать-мам. Кодсюрö пырисны нин школаö.

— Висьтав нин өдйөджык,— кутіс тэрмөдлыны Светлана. Сэсся друг чуймис. Мир туй кузя восьталісны наланьö совхоз отделениеса управляющöй Спирин да ачыс Йигө Закарыд.

— Закартö он и лысьт казътывын,— кокньыдика серөктіс Светлана.— Шулöны тай, казътышт пö ошкөс — и ош локтас.

Управляющöй да Закар воисны школа дорөдз, сувтісны.

— Пыралам тшөтш,— кылö, нуөдіс Спирин.— Видзөдлан том йөзсö, кодкөд ковмас пуктысьнытö. Ассьыд том кадтö тшөтш казътыштан.

Но старик өвтыштіс кинас, школаö эз пыр, довгис гортланьыс.

— Кызди нö сэсся петöма пывсянсьыс?— юалис Светлана, кор Закарыд саяліс нин.

— Мөд асывнас суседкаыс казялөма,— водзö висьталіс Виктор.— Сылөн порсьпиыс пышйöма Закар пывсян дорö, и көзайкаыс вөтчöма. Сэки и кылöма Закарыдлысь нор гөлөссö. Быдса вой пывсянад узьöма. Гөтырыс эськө рытнас на воöма гортас, корсьöма, но абу сюрöма, сэсся чайтöма, мый старикыс бара войколөн чери кыйö.

Öні и Светланалөн тшөтш чөскыда петас серамыс. Чеччисны

скамья вылысь. Кильчö дорын некод нин эз вöв. Виктор да Светлана пырисны залö. Зоя некöн эз тыдав. Либö кöнкö залас, либö ветлöддö школа дорас да эз на пыр. Светланаы зэв эз ло лöсьыд сьölöм вылас. Зоялöн кості вошöмыс вöлі дзик гö-гөрвотöмөн. Но Виктор кутыштіс сійöс, корис пуксьыны лабичö, кöні вöліны на прöст местаяс.

Мый ещö вöлі тайö рытнас? Муніс дженъыдик собрание. Школа помалысьяслы сеталісны свидетельствояс. Выпускникъ-ясöс чолöмалісны школаса директор Елена Васильевна Латкина, дзор юрсиа, олöма нин нывбаба, да совхоз отделениеса управляющöй Иван Михайлович Спирин. Бөръяыс корис школа помалысьясöс пырны сельскохозяйственной техникумъясö, водзö велöдчыны да помавы институтъяс, а сэсся бөр локны ас сиктö. Управляющöй жö висьталіс, мый совхозса отделениелöн управление шуис могмöдны велöдчысьяслысь корöмсö — котыртны отделениеын турун пуктігкежлö налысь торъя, витöд бригада, сетны налы Озью йылысь видзьяс. Тайö юöрыс, буракö, воис сьölöм выланыс став зонкаяслы да нывкаяслы, сы вöсна мый найö дыр аплодируйтісны. Öд велöдчысьяс ещö тулыснас на шыасьлісны совхозö татшöм бригадасö котыртöм йылысь. И со налöн мөвпныс збыльмис.

Светлана аплодируйтіс жö, но юрыс вöлі тырöма дзик мöд мөвпъясöн.

«Збыльысь öмöй Зоя лөгасис»,— думайтис сійö: öд сійö эз кöйы вöчны пöдругаыслы некутшöм лёктор.

Собрание помасьöм бöрын залысь вешталісны стен бердö лабичъяс, заводитісны йöктыны. Школа помалысь зонкаяс öні эз нин сэтшöма яндысьны, кызди войдөр. Найö смела матыстчывлісны нывкаяс дінö да нуöдывлісны йöктыны. Тані Зоя эз вöв. Светлана сулаліс йöз мышъяс сайын да гусьöникöн видзöдіс баянöн ворсысь Виктор вылö. Светлана дінö матыстчыліс Модест Скрипов, но нывка ськөд эз пет йöктынысö. Светлана эз радейт тшöг да порсьлөн кодъ ичöтик синъяса тайö зонсö.

Ещö кольöм воын на, кор Скриповъяс воисны Озью сиктö, тайö семья йывсьыс разалісны мисьтöм сёрнияс. Öтияс кулитісны батьсö, мөдъяс — мамсö. Тайö больгöмсö Светлана пыдди эз пуктивлы. Но налöн Модестныс нывлы эз жö мусмы. Сöмын на воис, а ыкша. Лöсяланаинö и ковтöг зілис казытыштны, мый овлöма карын, унатор аддзывлöма.

Кор Виктор дугдіс ворсöмсьыс, локтіс Светлана дінö, кутіс сійöс ки пölöдыс. Öні окота вöлі йöктыштны, но эз нин ворсны. Заводитісны ставöн сывны, весиг учительяс да бать-мам. Сьылісны и «Школьной вальс», и «Геологъяслысь сьыланкыв», и «Бур батькöд-мамкöд олöм».

Сьылісны тшöтш и Светлана да Виктор. Нывка сöмын öні тырвийö гөгөрвоис, мый сійö медбөръяысь тайö школаас, мый тайö здукуыс сэсся ньöтчыд нин оз бергöдчыв. Жаль вöлі тор-йöдчыны школаыскöд, учителяыскöд, кодъяс сэтшöм уна сетісны налы тöдöмлун да осьтисны туй паськыдджык олöмö.

Эз кокни, буракö, вöв торйöдчыны асланыс быдтасьяскöд и учителяслы. Светлана казявліс, кызди директор Елена Васильевна друг дугдіс сьылöмсьыс, муніс пельöсö да, йöзсьыс мөдарö бергöдчöмөн, носöвикнас дыр чышкаліс синвасö.

Сиктын, пöжалуй, абу морт, кодöс абу велöддöма Елена Васильевна. Öнiя верстьö йöз ставыс заводитлöмaöсь олöмнысö сы син водзын. А кымынöн водзö велöдчисны да уджалöны кöнкö мукöд сиктъясын да каръясын. На лыдын эмöсь и учительяс, и врачяс, и инженеръяс. Мыйтаöн усьöмaöсь бөръя война дырйи. Батъяс висътавлöны, мый мужикъяс лыдысь сöмын нельöд пайыс кольöмaöсь ловйöн.

— Петалам, Виктор,— вашнитiс Светлана. И найö кыкнан-ныс петiсны ывла вылö. Сулыштiсны пос помас, ыркöдчыштiсны. Кöсйисны ещö на пыравны, но сэки петiсны ывла вылö и мукöдъяс. Унджыкыс разöдчисны гортъясаныс, а школа помалысьяс чукөрöн лэччылисны Эжва кыр йылöдз, сэнi бара сьылiсны, быдтор йывсьыс сёрнитiсны. Быдöн радлiсны, мый гожöм кежлö совхозса отделениеын лöсьöдöны велöдчысьяслысь торъя бригада.

Дерт, и мукöд гожöмъясö сиктса школьникъясыд гортын весь оз пукавлыны: гөрны-кöдзны отсасьöны, турун пуктöны, нянь идралöны. Томсянь велалöны быд удж дiнö. Но унджыкыссьö найö овлöны гырысьяслы кесйылöсьяс пыдди. Торъя бригадаысь том йöз виччысисны ыджыд романтика.

Кор ныв-зон кутiсны разöдчыны гортаныс, Виктор да Светлана мöдöдчисны öтлаын. Налöн гортъясныс öтиладорын. Первой воас керкаыс Викторлөн, сэсся Зоя Турьевалөн, медбöрын нин Светланаяслөн.

Асланыс керка дорö воём мысти Виктор эз пыр гортас, мöдöдчис водзö: кольöда пö. Войыс кöть и лун кодъ югыд, а кыкнад век жö гажаджык. Та вöсна Светлана и эз кут шуасыны Виктор вылö.

Турьевъяслөн, буракö, узисны жö нин. Кильчöныс игана, öшинъяс дорын некод эз вуджрась. Зоя, тыдалö, збыльысь лөгасис Светлана вылö, мунiс выпускнöй вечер вывсьыс. Ставсö тайöс, дерт, Виктор казьявлiс жö, но, буракö, нарошнö кыв ни джын эз гарав Зоя йылысь.

— Эн тэрмась, вольпасыд некытчö оз пышйы,— шуис Виктор, кор воисны Светланаяслөн керка дорöдз.

— Мый нö кута вöчны?— кокныдыка серöктiс ныв;— Узысь сиктсö караулитны али мый? Ме öд абу стöрöж.

— А ме стöрöж,— шуис Виктор, топыда кутiс Светланаысь кисö.— Öг лэдз гортад. Лэччылам нöрыс йылö, видзöдлам васö.

— Ме сiйöс сöмын талун рыт кыкысь нин видзöдi. Век на важ кодъыс...

— Видзöдлан ещö öтчыдысь...— пöся шуис Виктор.

А Светланаы, веськыда кö висътавны, аслыс на эз вöв окота пырны гортас. Кутшöм ныв нö, кодi заводитöма нин кисьмыны, оз думайт зонкöд кольöдчöм йылысь. Торйöн нин любö сылы сэк, кор сьölöм вылö воысь зон ачыс локтö воча, оз шыблась шуйгавылö да веськыдвылö ещö мичаджыкъясöс корсьысьöм могысь.

Кöдза муяскостса веж борйöд лэччисны Эжва нöрыс йылö. Виктор босьтiс му помсыйс неыджыд из. Вензыштiсны, вермас-ö сiйö шыбитны изсö ваöдзыс. Светлана шуис — оз. Сы ног и лоис. А гашкö, Виктор нарошнö тадзсö вöчис. Мöд из öд воис ваöдзыс. И коймöд воис. Сэсся и Светланаы лоис окота видлыны ассыйс вынсö. Сiйö сiдз жö лыйлiс гöра горув пос-

ньыдик изъяс. Сылөн, дерт, матоджык усялісны изъясыд, но таысь эз дözмы. Кадыс тай лöсьыда колис-а.

Нöрыс йылын, пашкыр льöм куст бокын, куйлісны важиник керъяс. Изйөн шыбласьöм бöрын на вылö и пуксисны Светлана да Виктор. Первойсö ныв эз кöсьы пуксьыны, но Виктор кутыштис сійöс коскöдыс, пуксьöдіс орччөн.

Войся вөр-ваыс збыльысь вöлöма ещö на мича. Чöv-лөнъ, турун сі оз вөрзы. Сöмын Эжва кузя кывтысь моллыс серöдыштö ва веркöссö, троньöдчыштö, быттö нарошнö ворсöдчö, мед дзикöдз оз унмовсьы да оз сувт юыс. Да ю кывтчöсын, мöдлапöлас, дзувъялö öтка бипур. Тыдалö, сэнi войколалöны чери кыйысьяс.

— Виктор,— думайтігтыр шуис Светлана.— А, Виктор... Тэныд абу окота колявны войсö эстшöм бипур дорас?

— Ме öд эг нин öтчыдысь колявлывлы,— нюмдіс Виктор.— Сöмын таво кадыс эз на сюрлы. Ачыд тöдан, экзаменъяс. Вот регыд каям Озью йылö турун пуктыны. Сэки быд рыт кутам би дорын пукавны. А талун меным тані и бипуртöгыс зэв лöсьыд. Тэ öд бипур кодъ жö...

— Ме?— чуймискодъ Светлана.— Мый нö öткодыс ме да бипур костас?

— Югдöдан, шонтан,— мыкталігмоз шуаліс Виктор.— Гажа бипур дорысь абу окота вешйыны. Сідз жö и тэ кыскан ас дінад...

— Эн сөр,— яналана гөрдöдіс Светлана. Сылы друг эз ло лöсьыд сыысь, мый ачыс заводитіс татшöм сёрнисö, быттöкö мырдөн пычкис зонлысь тайö кывъяссö, кодъясöс вöлі öні шуöма. Но Виктор, дерт, тадзи эз думайт. Сійö друг чеччис места вывсьыс, судзöдчыліс льöм пу кустö, чегис лым кодъ еджыд некымын дзоридз, мыччис Светланагы. Ныв босьтіс найöс, вайöдіс чужöм дорас. И друг сылы кутіс кажитчыны, мый ичöтысянь тöдса тайö дзоридзис ньöтчид на эз вöвлы татшöм чöскыд дуканас. Виктор бөр пуксис. А Светлана торйöдіс кисьыс öти дзоридз да сюйыштис Викторлы киас.

Друг найö казялісны, кыдзи катыдладорсянь, нöрыс йывтіыс, восьлалö наланыö кутшöмкö морт. Тöдісны, мыйөн ещö матысмыштис. Тайö вöлі Скрипов, Модест Скриповлөн батыс. Милицейскöй формаа, киас полевöй сумка довкйöдлö. Öні сійö абу нин милиционер, а рыбинспектор. Сöмын важся форма дінас, буракö, ёна велалöма, оз кöсьы ськөд янсöдчыны.

Скрипов весьтасасис льöм куст улын пукалысьяскөд, здук кежлö сувтыштліс, сюся видзöдліс, кыдзи сöмын милиционеръяс видзöдлывлöны, сэсса лэччис нöрыс горулö, кытчö сиктса олысьяс домавлывлöны ассьыныс пыжъяссö.

— Скриповлы тай оз жö узьсы,— шуис Светлана.

— Сэтшöм уджыс,— нурбыльтіс Виктор.— Войяснас браконьеръясöс корсялö, а луннас узьö. Сюзь моз олö.

— Сюзыдлөн синмыс кöш кодъ, а талөн вывті нин векни,— серöктис Светлана.

— Векни, да ылысь аддзö.

Пукалысьяс видзöдісны, кыдзи Скрипов йөткыштис берег дорысь моторнöй пыжсö, кавшасис сэтчö да кутіс кывтны ва

нылыд. Коркө и журөбтіс моторыс, пыжыс чепөсйис водзлань да веськөдчис вуджны мөдар береглань.

Ныла-зонма эз и казьявлыны, кыдзи мыччысис шонді, садь-мисны лэбачьяс, заводитіс пальөдчыны вөр-ваыс. Мый йылысь сөмын эз больгыны. И серам ради, и збыльысь. Сёрнитыштісны тшөтш и водзө велөдчөм йылысь. Виктор висьталіс, мый сійө көсйө мунны Интаса индустриальной техникумө, көть и мамыс тшөктө помавны средней школа. Колө пө өдйөджык босьтны специальность да заводитны отсавны өтка мамыслы, коды и сідзи нин эз этша вичмы писө велөдігөн.

— Сөмын вот жаль меным кольны ассыным сиктнымөс,— висьталіс Виктор.— Гажтөмчыны мөда.

— Гажман өд.

— Ме төда нин гажтөмчөмтө,— ышловзис Виктор.— Не-кодды, весиг мамы, эг на висьтавлывлы та йылысь. А тэныд висьтала. Помнитан, менө мөдөдлісны Артекад? Куимысь кымын кыз синваөн бөрдлі. Гөгөр мойдын кодь мича, ставыс радлөны да нимкодьясьоны, а менсьым сьөлөмөс гажтөмчөм вильөдө. Вөлі кө гортсянь матынджык, эськө пышйи.

— Кыдзи нө эськө йөзыс ветлөны?

— Ог гөгөрво. А ме төда нин, мый кута гажтөмчыны и горт вөсна, и мам вөсна, и тэ вөсна тшөтш...

И нем виччысьтөг Виктор кыскыштіс асланыс Светланаөс, топыда сывйыштіс да окыштіс веськыда вомас. Нывлөн весиг садьыс вошліс виччысьтөм да повзьөмысла.

— Тэ мый? Йөймин?— звирк чеччыштіс места вывсьыс Светлана.— Эн лысьт...

— Ме тэнө радейта,— пөся шуаліс Виктор.— Важысянь нин... Полі сөмын висьтавнысө.

Светлана и өні на, вольпасяс водөм да шебрасьөм бөрын, кылө Викторлысь пөсь лов шысө.

«Мыйла эськө, шуам, радейтны менө, а не Зояөс?— мөвпалө Светлана.— Зояыс өд важысянь нин ачыс вөзйысьө радейтчынысө. Да и сійө меысь абу мисьтөмджык. Ыджыд тушаа, мича чужөма, лөсьыд гөлөса. Артисткаөн тай весиг нимтөны».

А думьяс век локтөны и локтөны. Оз, талун Светлана ун-мовсьны оз вермы. Ачыс оз гөгөрво, мый лоис ськөд. Тайө, дерт, абу вина румка вөсна. Абу. Татшөм этша винасьыд оз коддзывлыны.

«Мыйла радейтө менө, а оз Зояөс?»— бара мөвпыштіс Светлана. Сэсся сійө чеччис, кань моз ньөжйөник матыстчис гардероб дорө, пасьталіс лөз шөвк платтьөсө, кодөс неважөн на пөрччис. Сувтіс зеркала водзө. Куш кокөн абу мича, ковмис тшөтш көмавын туфлисө. Шыльөдіс-лөсьөдіс юрсисө сідзи жө, кыдзи сынавліс рытнас.

Зеркала вывсянь видзөдіс гөгрөсіник чужөма, шабді кудель кодь кыпыд юрсиа ныв. Ныв, а абу нин нывка. Гожся небеса рөма синьяс. Сөмын нырыс неуна чангыля. Но тайө өд ньөти оз мисьтөмты. Нюмдіс. Бандзібьясас гуранторьяс артмисны. Видзөдіс аслас кокьяс вылө. Абу жө кулитанаөсь.

Светлана матыстчис камод дорө, лукйысьыштіс сэні да перйис Зоя пөдругаыслысь фотосө, кодөс сылы пөдаритліс кольөм воын нин. Карын снимайтчылөма. Сюся видзөдіс фотокарточкаыс

вылө. Смоль съод юрси, сэтшөм жö синъяс. Мутов чужөм вылас ичөтик, вöсньыдик ныр. Чиганкалань мунө.

Светлана ышловзис, бөр пуктис фотосö важ местаас, сэсса пөрччысис, идралис платтьöсö, матыстчылис öшинь дорö. Дыр видзöдис нöрыс дзиб йывлань, көни сулалис пашкыр льөм пу.

## МÖД ГЛАВА

Сийö кадас, кор Светлана вöли майшасьö аслас думъясөн, Викторкөд лоис со мый.

Зон восьлалис мир туй кузя и водзсьыс аддзис сöмын Светланаöс, сылысь гöгрöсiник мича чужöмсö, кельыдлöз синъяссö. Колö жö лоны сiдзи. Коркö Виктор нинöмөн эз янсöдлы Светланаöс мукöд нывкаясысь. Нывка кыдзи нывка. Öтлаын ворс-лывлiсны, öтлаын велöдчисны. И кутшöмкö здукö Светлана друг вежсис. Сэсса некод эз и тöдлы, кор сийö нывкасянныс пöрис нылö. Бөръя кадöдз Виктор эз жö казявлы. А тöвсянныс сылы кутiс кажитчыны, мый свет вывсьыс оз сюр мöд ныв, кодi эськö вöли Светланаысь мичаджык да мусаджык. Унаысь лöсьöдчылис сылы висьтавыны та йылысь, а бурджык кадыс эз сюр-лывлы.

И ещö Викторлы кажитчис, мый ньöтчыд на эз вöв таысь мичаджык асылыс. Сиктъяс костöд визувтысь ёль вомөн вуджигөн сувтыштiс пос вылас. Сынöдыс сэтшöм чöскыд, мый окота лолавны и лолавны тыр морöснад. Окота дугдывтöг кывзыны шор бокын быдмысь бадьясын дзользъысь лэбачьяслысь сьылöмсö. Виктор эз и тöдлы, кыдзи ачыс тшöтш заводитiс шутлявны танi тöдса сьыланкывлысь мотивсö.

А шондiыс кыпöдчис пыр вывлань и вывлань, колö вöли тэрмасьны. Турьевъяслөн керка дорö матысмигөн Виктор друг казялис Зояöс, кодi петöма кильчö вылас. Сийö вöли турунвиж рöма кокньыдик плаща, сэтшöм жö рöма ичөтик чышъяна, дiнас пуктöма неыджыд чемодан. Тöдчис, кытчöкö ылö мöдöдчöма.

— Медбöрын лэдзис жö Светланаыд?— первойөн шыасис Зоя, аслысног тешкодя серöктыштiс.

— А гашкö, ме эг и сэнi вöв?— Виктор ньöжмöдiс воськовъяссö, матыстчис потшöслань.

— Көнi нö? Кыйöдi öд мунöмнытö. Зэв нин тшапа да долыда мунiнныд миян керка дiнтi.

— Мунiм сiдзи, кыдзи быдөн ветлывлöны,— Виктор лэптыштiс пельпомъяссö.

— Но-но. Медъя,— сьöкыда лолыштiс Зоя.— Ме öд важөн нин казяли, мый кыкнанныдлөн тiян косьмöны сьölöмгясныд öта-мöд вöснаыд.

— Гашкö, и оз косьмыны?

— Абу öд йöй. Гөгөрвоышта неуна. Быдса кык час да джын колльöдчинныд.

— Эг артав кадсö. Часiыс менам абу.

— Сiдз, дерт. Радейтысьясыд пö кад вылад оз видзöдны.

— Тэ нö эськö кытчö мöдöдчин?— юалис Виктор, мед öдйөн-джык вежны лöсявтöм сёрнисö.

— Шогос пальодны.— Зоя читкыртліс шом кодъ съод син-кымъяссö.— Пукся теплоход вылө и карөдз шывгыла... Не век жö гортын пöжсьыны.

Сійö лэччис кильчö содйöдыс, потшöс вомөн мыччис чемодансö, сэсса и ачыс пелька чеччыштис.

— Гашкö, кольöдыштан пристаньöдзыс?— юалис Зоя, бара тешкодя нюмдіс:— Дерт, он кө пов Светланасыд...

— Тöдан мый,— дöзмис Виктор.— Вай ог кутöй та йылысь...

— Скөрмин?

— Верма и скөрмыны.

— Светланаыд, көнкö, ме йылысь вель ёна гудрасис?— Зоя чукуыртліс мавтөм вом доръяссö.

— Мыйла нö сылы гудрасьнысö?— чуймис Виктор.— Ті жö, кыдзи меным кажитчö, бур пöдругаяс. Позьö öмöй тадзи сёрнитны öта-мöд йылысь?

— Вöвлім пöдругаясөн,— Зоя букыштчыліс Виктор вылө сідзи, мый мöдыс быттьökö вöлі мыйыськö мыжа сы водзын.— Öтияс сöмын сёрнитöны, а мöдъяс и сёрнитöны и вöчöны.

Викторлы вöлі зэв мустөм тайö суклясьöмыс. Сылы вöлі бура тöдса Зоялөн ыкшасян сямыс, но дзик татшöмөн эз на чайтлы. Овлывліс сідз, мый Зоя нарошнö эз вочавидзлывлы учительлөн юасьöм вылө, көть и тöдліс уроксö. Коркö öтчыд ыргянитöмөн муніс концерт вылысь, көні сылы колö вöлі сывны. Муніс сы вöсна, мый критикуйтисны стенгазетын. Öні Виктор көсйис мыйкö шуны Зоялы, но эз вермы, быттьö йики сатшкысис горшас. Тадзи и восьлалісны найö Озъюдин сикт шөрөдз, кыдзи ветлывлöны öта-мöд вылас лөгасьöм гозъя.

Пристаньянь кайисны Модест Скрипов да Миш Опонь, сартас кодъ вöсньыдик да кузь тушаа зон, коды вöліс нин ар кызь вит. Бөръя кадас сиктсаяс сылы сетасны дыш Опонь ним. Во куим сайын ветліс Ухтаса техникумö да пышйис, пыраліс райцентрса среднөй школаö да эновтіс. Совхозын оз жö уджав. Шыбитчылас то öтилаö, то мöдлаö, мый нажөвитыштлас, сійöс и юас. Дзикöдз тшыглы кулөмсьыс мамыс видзö аслас ичөтик пенсия вылө. Кыкысь нин гөтрасьліс да кыкысь юксьыліс. А көнкö кө зыксöны либö косясьöны, то сэні дыш Опоньыд первой морт.

Код тöдас, мый корсьöмаöсь пристаньсьыс Модестыс да Опоньыс. Кыкнанныс тай, тыдалö, прамöя юыштöмаöсь-а. Опоньыс мыйкö гораа висьталіс Модестлы. «И батытö радейта, и тэнö радейта»,— позис сöмын велавны сылысь кывъяссö.

Викторкөд да Зоякөд вочаасигөн Модест сувтіс налөн туй шөрö.

— Тэ нö тайöс... кытчö нин кольöдан?— сідзи нин руд синъяссö дзикöдз былъöдöмөн юалис Модест да сюйыштис сэтшöм кыв, кодöс книгагысь он аддзыв. Виктор видзöдіс Модест вылө и эз аддзыв, кыдзи öні Зоялөн ыпнитліс-ломзьыліс чужöмыс.

— Шу ещё кыв, и ме тэнö!— сöмын и вевъяліс шуны Виктор. Сійö кватитис Модестöс пинжак морөсöдыс, тракнитис. Но Виктор эз артышт, мый сы бөрвылын сулалö дыш Опонь. Кытчö-кытчö, а татшöминад тай сійö слöймö. Опонь сöтыштіс Викторлы

бөрвывсяньыс. Мёдыс зэв өдйö лэдзис кисьыс чемодансö да первой öтарö йöткыштис Модестöс, а сэсся мöдарö тьовгис Опоньöс. Пансис кось.

— Мый тi вöчанныд, хулигантьяс! Вина гагъяс!— горöдiс Зоя да уськöдчис Виктор дiнö. Но Модест да Опонь эз на кöсйыны миритчыны. Найö выльысь зырöдiсны Виктор вылö. А Виктор эз жö узь. Сiйö мый вынсьыс йöткыштис Опоньöс, сы бөрся и Модестöс. Код йöз эз вермыны кутчысьны кок йыланыс, усьны да тупыльтчисны чой горув. Опоньлөн нырсьыс чепöсйис вир.

— Ещö кö матыстчанныд — лёкджык лоас!— скöрысь шуис Виктор, сэсся бөр босьтис чемодансö, ыджыда лолыштис.

— Лэччам пристаняс öдйöджык!— тэрмöдлiс Зоя.— Тайö шпанаыдлысь быдторсö позьö виччысьны.

— Мед ещö видласны,— тiралан гөлöсөн шуис Виктор да тэрмасьтöг заводитис восьлавны пристаньлань. А Модест да Опонь сэсся эз нин матыстчыны. Найö чеччисны да, öта-мöд вывсьыс буссö пыркöдiгтырйи, руныгисны-кайисны чой йылö.

— Но, чуркаöй, виччысьлы!— горöдiс, кылö, Модест, а сэсся кык друг саялiсны. Виктор сьölöмнас кылiс, мый лолöм зыкыс та вылын вермас на не помасьны.

Викторлөн дзикöдз торксис настроениеыс эз сöмын тышка-сьöмыс ради. Кöть мый эн шу, а сiйö эз на сетчы. Парксис сьölöмсö «чуркаөн» нимтыштöмыс. Та йылысь сылы важөн нин некод эз гаравлы. А син саяд, вölöмкö, век на казътылöны. Мыйла эськö тöдö та йылысь Модестыс, кодi Озьюдiнас восö на оз ов?

Дебаркадервывса начальник да почта примитысь аддзылö-маöсь берегось зыксö, кöсйöны нин вölöм котöртны Викторлы отсöг вылö. Опоньыс да Модестыс прамöя нин дöсaдитчöмаöсь и дебаркадер вылын, лоöма найöс кызмырдөн вöтлыны.

— Ме, гашкö, бөр бергöдча?—юалiс Зоя.— Найö öд вермасны кыйöдны...

— Эн пов,— шуис Виктор.— Оз кö уськöдчыны тöдлытöг, налөн немтор оз артмы. Код юра йöзыдкöд верма на водзсасьны.

Теплоход воигкежлö локтiсны ещö кык тьöтка, ыджыд мешö-каöсь, карö жö мöдöдчöмаöсь. Найö вöлины сикт катыд помось, омöля тöдсаöсь. Виктор отсалiс налы пыртны нопъяссö, а сэсся и Зоя дiнö матыстчылiс.

— Дыр кöсьян ветлыны?— юалiс сiйö.

— Кытчöдз оз дышöд,— шуис ныв.

— А то, смотри! Регыд öд видз вылö петам...

— Сэни и метöг лоас гажа.

— Бур туй!— Виктор кутлiс Зоялысь кисö, виччысьыштiс, кор вөрзьöдчас теплоходыс, сэсся ньöжйöник мöдöдчис гортланьыс. Заводитчис виль лун, мича да гажа, но öнтая кыпыд настроениеыс öнi эз нин вöv, быттöкö мыйкö воштiс зэв ыджыдтор. Юрас öтарö бергалiс чуткасьысь кыв «чурка».

Модест Скрипов да дыш Опонь сулалiсны сельпо магазин дорын да бызгисны сэтчöс стöрöжыскöд. Гожся кадö магазиныс уджалö зэв водзсянь, и найö, буракö, виччысисны нин сылысь воссьöмсö. Викторлысь мунöмсö, дерт, аддзылiсны, но бергöдчисны мöдарö, быттöкö эз казьялыны сiйöс.

## КОЙМӨД ГЛАВА

Сідз-тадз войтö коллялөм бöрын Виктор узис дыр. Ачыс эськö, гашкö, эз на и садьмы, но сійöс чуксалісны. Воліс совхозса отделениеесь уборщицаыс: мыйлакö пö корис управляющöй. Виктор пыр жö чеччис да мөдөдчис, весиг эз сөйышт. А мамыс эз вöв гортын: скöt картасыс, буракö, абу на волöма.

Кор Виктор локтіс контораö, сәні пукалісны отделениееса управляющöй Иван Михайлович Спирин да рыбинспектор Скрипов.

«Войся зык йывсьыд, буракö, тöдмалöмаöсь,— визнитіс юрас мөвп.— Мыйла эськö татчö локтіс Скриповыс?»

Управляющöй юрнас индіс пызан дорын сулалысь улöс вылö, корис пуксыны. Недыр мысти друг юалис:

— Ті тöданныд, мыйла ме тiянöс кори, Попов ёрт?

Виктор лэптыштіс пельпомъяссö.

— Виччысьышты неуна,— шуис управляющöй.

Виктор яндысигтыр пуксис индөм улöс вылö. Управляющöй чеччыліс места вывсьыс, дзик гурйыв восьтіс мыш сайсьыс дзиръя öшиньсö, разис вышивайтөм еджыд дөрөм воысысь медвылыс кизьсö. Кабинетын збыльысь вöлі пывсянын кодъ жар, шондіыс веськыда öшиньясö вачкö да.

«Удтысьöма Модестыд,— то Скрипов вылö, то управляющöй вылö видзөдывлігтыр мөвпаліс Виктор.— Висьталöма сідзи, кыдзи аслыс бурджык». И думсьыс Виктор зіліс нин водзвыв тöдмавны, мый кутасны сылысь юасыны да кыдзи колö вочавидзны.

Думайтігмозыс Виктор кытшлаліс синнас кабинет пытшкөсöд, кытчö сылы совхоз котыртчөм бöрын эз на и удайтчыв пыравнысö. Пызан, стен дорын улöсьяс, тумбочка вылын телефон, пельöсын сейф да сы вылын бусөссьөм радиоприёмник, кутшөмъясöс ньобавлөмаöсь магазинъясысь во кызь-комын сайын. Шпалеритөм стенын öшалісны плакатъяс да диаграммаяс. Сэтысь позис аддзыны, матыстчыны кö дзик дінөдзыс, уна-ö сетö государстволы во чөжөн яй да йөв совхозлөн Озъюдинса отделение, уна-ö таво колö заптыны төв кежлö турун да силос. И ещö ас рисуйтөм карта, көні петкөдлөма совхозса отделениеелысь став муяссö да видзяссö.

Недыр мысти воисны контораö школаса директор Елена Васильевна да учитель Полиевт Петрович Соколов.

«Прамöй сёрни пансяс»,— думайтіс Виктор, көть ачыс чорыда эскис, мый сійöс мыжавнысö дзик нинöмысь.

— Ті тöданныд, мыйла ме кори тiянöс, Попов ёрт?— бара шуис совхозса управляющöй да видзөдліс Виктор вылö, быттö сысысь öтдор сэсся некод эз вöв тайö кабинетас.

— Ме, дерт, мыжа, Иван Михайлович,— синсö увань лэдзöмөн нурбыльтіс Виктор.— Но эз кö найö нимтыны Зояöс лёк кывьясөн, ме эськö эг заводит.

— Ог гөгөрво,— юрсö гоньгөдіс управляющöй.— Немтор ог гөгөрво.

— Делöыс вöлі тадзи,— заводитіс Виктор, сэсся, недыр коставлөм бöрын, висьталіс ставсö, мый лоис асывнас пристань дорын.

— Но и но,— шензис управляющой.— Ме эг на и кывлы та йылысь. Бур, мый ачyd висьталін. Тайо нин джынвийо чинто мыжто. А вообщесо вочомад правильно. Важон нин коло велодыштны Опоньсо. Ачыс оз уджав, пакоститчо да и томъясос заводито кыскыны ас дїнас. Сомын, дерт, кинад воомад лишной. А мый ачyd висьтасин, зев бур.— Управляющой кытшовтас синнас кабинетын пукалысьясос, кодыас кывзїсны да нюмъялісны.— Кыдзи тэ лыддян, Никифор Сидорович?— управляющой видзодліс Скрипов выло.

— Ме батъ,— шуис Скрипов.— Ме первойысь жо кыла та йылысь. Но ме, збылысь ко тадзи воли, пиос некутшомо ог дорйы. Тайо делосо ме помодз расследуйта и петкодла сылы, коні ракъясыс товйивлоны. Вот тадз.

— Коло сельсовет пыр ылыштны кытчокко тайо Опоньсо,— скорысь шуис Елена Васильевна.— Сомын и кылан сылон пакостьяс йылысь. А сёрни кежысь и ставыс кольо. Мед весасяс кытчо гажыс, сытог сынодыс лоас состомджык.

— Правильно шуо Латкина ёрт. Выселитны, и — ставыс. Вот тадз,— содтїс рыбинспектор Скрипов.

— А ме кори тїанос сы ради, мед отлаын сёрнитыштны велодчысяслысь торъя бригада котыртом йылысь,— шуис Иван Михайлович да асланыс матыстїс пызан вылысь бумага листьяс.— Ме тай гарыштли нин вечер вылад. Оні отлаын сточмодам списоксо, видзодлам, мый коло вочны видз выло петтодз.

Тодчис, мый отделениеса управляющойлон таодз вовлома нин сёрни школаса директоркод да учитель Полиевт Петровичкод. Найо перйисны тетрадыас, коні волины жо кутшомсюрю пасйодьяс.

— Ті тоданныд, мыйла ми корим тїанос, Попов ёрт?— бара шуис управляющой.— Ми вот сёрнитчим ёртьяскод, и шум индыны тїанос тайо бригадаас вожакон, мод ногон ко, бригадирон. Кыдзи ті видзоданныд та выло?

Виктор бура дыр кежло падмыліс тайо виччысьтом юаломсьыс.

— Ог тод,— шуис медбёрын.— Сямма ко?

— Сямманныд,— шыасис Елена Васильевна.— Пощти кык во чожд юрнуодінныд школаса комсомольской организацияын. Тїянылысь йозыс кывзысьоны.

— Сэсся ті он лоой дзик откон,— содтїс управляющой, малалыштіс бритом юрсо.

— Эн пов, Виктор,— шыасис Полиевт Петрович, школаын медся том, муртса кызь арысь петом учитель, кодї воис татчо сомын на во сайын, велодо физкультура.— Ме тшотш кая. Кыкonnaд справитчам.

— И ещо ыстам тїан дїно Захар Игнатьевич Расовос,— висьталїс управляющой.— Тайо старикус кутас отсасьны аслас советьясон. Мортис дошлой, сэтчос видзяссо бура тодо, велодас и точитчыны, и зородьяс човтны.

— Сямма ко, ог пыксы,— согласитчис Виктор.

«Со мыйла волом коромаосъ,— думайтїс сїю та бёрын ас кежас.— А ме чайті... Но и йой. Висьталї сїюс, мый йылысь позис чов овны. Да ещо Скрипов дырйи. Тодомысь, сїю Модестос оз ошкы. Но мый лоома — лоома нин...»

— Ме эськё сөветуйта тиянлы корсьны Расов пыддиныд мёд кандидатура,— шыасис Скрипов.— Прамёйджыкёс.

— Мыйён нё Закарыс абу прамёй?— сылань бергёдчис Елена Васильевна.— Пёрысь. Но ёд сылы оз ковмы мыр бертны. Удждат велёдны вермас...

— Мыйё велёдас том йёзсё тайё выжив старикыс?— Скрипов сувтис да прамёя нин ниртчём полевёй сумкасё кынём бердас топёдомён матыстчис пызан дорё.— Расов — браконьер, Эжваысь медбёръя стерлядсё бырёдё, тавой ме ачым суй пакёститчанінас. А ті шуанныд... Ме висьталі нин та йылысь управляющёйлы. И акт гижёма.— Скрипов тапнитис кинас папкаас.— Лоас сетёма сельсөветё и вылынджык инстанциясё. Вот тадз. А ті шуанныд...

Скрипов бөр пуксис улёс вылё, кыскис носёвёй чышъян да кутис чышкавны волялысь плеш вывсьыс ньылёмсё.

Кабинетын пукалысьяс ышловзисны, ланьтисны.

— Закарёс ме тёда регыд на,— коставлём бёрын первойён шыасис Полиевт Петрович.— Тёда, кыдзи честной старикёс. Пыравлі сы ордё. Лыддя, мый тані лоис кутшёмкё недоразумение. Ме и ачым радейта кыйсьыны, частё ветлывла гожёмын и тёлын, кыйсьысьяскёд сёрнитлывла, а татшёмтор кыла дзик первойёс.— Полиевт Петрович коставліс, сэсся сувтис жё да шуис:— Протоколястё гижтёдз колё бурджыка тёдмавны морт йывсьыс. Мед оз ло ёшыбка...

— А ті менё эн велёдой,— скёрысь орёдіс Скрипов.— Нэм чөж уджалі органъясын. Ме мортыдлысь лысё и вемсё аддза...

Скёрмис и учитель Соколов.

— А зорёд чөвтны кужанныд, Никифор Сидорович?— юалис сійё.— Видз вылын прёстой турун зорёд? А? Либё коса лэчтавны? Чайта, мый он сяммой.

— Ме вёча сійёс, мый корёны мясянь партия да властьяс,— бужгыльтіс учитель вылё руд синъяссё Скрипов.— Вот тадз.

— И частё сійёс, мыйысь партия оз ошкы,— небыдика шуис Елена Васильевна.— И пиыд кутёма сетчыны тайё жё туй вылас. Ме висьтала, кыдзи коммунист коммунисты.

— Тайё нин мый?— чеччыштис места вывсьыс Скрипов, босьтис улёс мыш вылысь картузсё.— Ме браконьерьяс йылысь, а ті чукёртчинныд водзвыв сёрнитчём бёрын нойтны рыбинспекторёс? Оз артмы. Вот тадз!— горёдіс Скрипов да петис кабинетысь.

Сы мунём бёрын управляющёй Спирин висьталіс, кыдзи пансьёма тайё став делёйс. Кольём рытнас Закар вёйтёма сикт горулё неқымын подольник. Мукёд черикёд тшётш крукасьёма кык неыджыд стерлядь. Старикыд, дерт, найёс бөр абу шыбитёма, кольёма пыжас. Сэтчё и суёма Скриповыд да койыштёма став черисё ваё, а подольникьяссё орьёддёма. Дерт, Закарыд скёрмёма да пёсьвывсьыд лишнойджык шуалёма Скриповыдлы. Ёні сійё кёсий мыждыны Закарёс и браконьерствоысь, и рыбохранаса представительёс видёмысь.

Но, шуны кё веськыда, Скрипов да Закар костын лёгалёмыс пансьыліс ещё кольём арын на. Колё вёлі идравны совхоз му вылысь зэв уна картофель. Отсёг вылё воисны карса учрежденіеясысь йёз. Пенсионёрьяс ставён петисны муяс вылё. Шко-

---

лаын дугддлісны велөдчөмсө. А Скрипов гозъя лытайтисны тайо кадас. Отчид Закар паныдасис накөд да уна йоз дырйи синманыс крапкис та йылысь. Оні Скрипов корсьо помка парсыштны Закарөс.

— Администрациялысь решение ме ог веж,— шуис управляющой.— Ыстам Закарөс. Сэні сьокыд лоо бергөдчыны Закар кодь морттөг. Ачыс оз пыксы.— Сэсся сійо торйөдіс бумага чукорысь өти лист, матыстіс ныр улас.— Видзөдлам отлаын, кодъясөс ыстыны Озью йылө.— Заводитіс лыддьөдлыны.— Виктор Попов — бригадир, Панюков Феликс — машинист, Габов Миша, Савин Степан, Нечаев Николай — чөвтысьяс, Турьева Зоя, Савельева Светлана, Липина Тамара...

— Энлөй, Иван Михайлович,— торкис управляющойөс Елена Васильевна.— Мекөд сёрнитліс детсадса заведующой. Сійо корө Светланаөс гожом кежлө воспитатель пыдди. Кольом во пө нывкаыс олыштіс нин. Ошкө.

— Мед лоас тіян ногөн,— вочавидзис управляющой.— Сэтчө мортыс колө жө.

«Светлана коляс сиктө,— кутіс думайтны Виктор.— Сійөс тшөтш колө ыстыны Озью йылө». Сылы окота вөлі шуны та йылысь гораа, но эз тырмы смеллуныс. А гашкө, Светлана ачыс окотитөма кольччынысө, көть эз висьтасьлы та йылысь.

Управляющой помөдз лыддис списоксө да мыччис Викторлы:

— Ставыс дас сизим морт. Сэні виддзыс лоас гектар ветымын сайө. Чайта, лун дасөн эштөдасны. Машиналы паськыд видзьяс абуюсь, но мыйкө мында век жө сюрас. Унджыксө ковмас ытшкыны киөн и куртны ки помысь. А видзьяс сэні турунаось. Ме неважөн ачым нарошнө кайлі видзөдлыны. Отделениелы позьө чукөртны вель уна лишнөй турун.

— Ме ещө кора босьтны бригадаө Гелий Липинөс,— шыасис учитель Полиевт Петрович.— Сійо эськө витөд классысь, но төлка детинкаыс. И ачыс мырдөн вөзйысьө: кута пө кыскавны юръяс и горниставны.

— Колө босьтны,— сы дор сувтіс Елена Васильевна.

Та бөрын Иван Михайлович корис Викторөс да Полиевт Петровичөс матыстчыны пызан дорө, сетіс бумага листьяс, тшөктіс пасьявны, мый ковмас босьтны Озью йылө. И тайө списокъясыс лоисны вель кузьбөсь. Дыр кежлад быдтор колө. Куранъяс-косаяс и волейбольнөй мач, гезьяс и транзисторнөй приёмник, пөртъяс и баян, вилаяс и аптечка, палаткаяс и гөрд флаг.

Сёрнитчисны видз вылө петан лун йылысь. Шуисны аски жө чукөртлыны школаө Озью йылө мунысьясөс да отлаын төлкуйтыштны сэні уджалөм йылысь. Виктор ачыс көсийысис ветлыны велөдчысьяс дінө, коравны найөс.

*Вогзө лоө на.*



## «Запятааяыс, чайта, оз ков...»

Михаил Игнатовкөд медводдза «төдмасьöмыс» лоис «Меным быть колö мунны» повесътсö лыддьöм бöрын. Съөлöм вылö воис.

Ёна бöрынджык, 1981 вося апрельсянь, кор вуджи «Югыд туй» газетсы журналö, кутім паныдасьлыны төлысьнас кум-нёльысь. Михаил Иванович — редколлегияын, а уджаліс партия Коми обком-са печать юкöнын. Ме котрöдлі сылы локтан номерö индöм материал. Унаысь, кор сёрма, удж бöрын гортас нульвлі.

Редколлегияса войтыр пöвстысь сöмын Михаил Игнатов дзик став материалсö лыддьывліс. Быд поснитор вöлі пасъялас.

Ф.Таракановлөн гижöдын öтчид паныдасис: «Римса Папалөн кунций». — «Нунций правильнöсö: посол рочнас, юр чукöртысь».

«Батьяс да пьян» висътöс коді нö тшыкөдіс? — коркө юалö. — Кузь предложениеяссö кöнъяскö кум пельö орйöдлöма-юклöма».

«Этатчö запятааяыс, чайта, оз ков...»

«А этані со политической öшыбка: «ставöн» (браконьеръяс). Мед кöть и вöвлöм кулак тайöс шуö, но обобщайтны оз позь», — и тадзи М.И.Игнатов быд гижöд кузя прöйдитчыліс. Лöнь гöлбсөн, некодöс янöдтöг индалö. Вежöра, уна лыддьысьöм-велöдчöм морт, грамотнöй вöлі, кужис веськöдны сорсьылöмтö.

Май 28 лунö Михаил Ивановичлы эськö тырис 75 арöс.

Кувсьыліс сійö 1999 вося август 17 лунö.

**Алексей Одинцов.**



**Михаил ИГНАТОВ**

## Аслыссяма морт

В И С Ъ Т

Тайö вöлі гожöмнас на. Июль төлысь заводитчигөн, öти лунö рытланьыс, Васьö суседъясö, Кармановъяс ордö, локтіс төдтöм морт. Васьö ёртъясыскöд туй вылын ворсіс мачөн. Выл «Волга» надзмöдіс öдсö да сувтіс детинкаяс дорö. Ворсöмыд вуні. Челядь кытшалісны машинасö да полігтырйи инмöдчывлісны сылөн шильыд веркөсö. Кодсюрö видзöдчисны нин колеса шöрас югъя-лысь кытшö да гусьöникөн шензисны. Васьö вешйис бокöджык,

сувіс потшөс дорө да пондіс видзөдны төдтөм пассажир бөрся.

Пассажир петіс машинаысь. Сійө вөлі кузь тушаа, Васьөлөн бать ыджда кымын жө, но неуна кызджык да уска. Воысь пер-йис машина пытшкысь кык чемодан. Отиыс — ыджыд прөстөй, лөзов рөма. Мөдыс — неыджыд, коричневоу. Васьөлы дум вылас уси, мый сійө дзык жө татшөмөс аддзывліс школаысь: татшөм чемоданас сэні видзөны аккордеон. Сідзкө, локтысьыс — гудө-касьысь.

Төдтөм морт сувтөдіс чемоданъяссө потшөс бокас Васьө дорө да кинас макнитіс шофёры:

— Пока!

Челядь пыр и кытшалісны воысьөс.

— Видза оланныд, том йөз котыр!— гораа шуис сійө да ставнысө сюся видзөдаліс.

— Здорово!— вочавидзисны Васьө да ещө өти детинка, а мукөдыс чөв олісны, яндысигтырйи пондісны гырдазаяснаныс тойыштавны өта-мөднысө, зілісны дзебсьыны ёрта-ёрт мыш сайө.

Гөсть, төдөмысь, казяліс тайөс, та вөсна, буракө, и гажаа шуис:

— Ноко, коді медзбой, висьталөй: этайө керкаас олысьясыс гортасөсь абуг?

Сійө кинас индіс Кармановъяс керкалань.

Васьө көсйис шуны, мый көзяиныс удж вылын, но аддзис туй вывті локтысь Педөр дядьөс да чуньнас индіс:

— Тонө Педөр дядь локтө...

Төдтөм морт видзөдліс локтысь вылө, тэрмасьөмөн шыбитіс потшөс вылө плащсө да пинжаксө, идзас шляпасө чөвтис Васьө юр вылө да пөшти котөрөн уськөдчис Педөр дядьлы паныд. Васьө аддзыліс, кыдзи найө паныдасисны да кыдзи төдтөм мортлөн тасөсь дөрөмыс вөйи Педөр дядь пинжак пиө.

— Фёдор!..

— Терентий!..

— Мыйта ва визувтіс...

Аддзысьысьяс топыда кутчысьлісны, клопөдісны өта-мөдлы пельпомө, дыр видзөдісны ёрта-ёрт вылас, быттөкө лыддисны, кымын чукур содөма чужөм выланыс «уна ва визувтігас» (Васьө кыськө кывліс, мый аддзисигөн йөз век лыддьөны татшөм чу-кыръяссө), а сэсся матыстчисны челядь дорө, босьтісны чемоданъяс, паськөм да мөдөдчисны Кармановъяс ордө.

— Шляпатө вунөдінныд,— завор дорын суөдіс найөс Васьө.

— Аттө,— шуис төдтөм морт, босьтіс шляпасө да мигнитіс:— Аскиөдз...

Но Васьө тайө рытнас на аддзыліс сійөс. Часөн-джынийөн мысти кымын Педөр дядь да сылөн гөстьыс мунісны пывсянө. Регыд төдтөм морт пасьтөгыс чепөсйис сэтысь да котөртіс ю дорө, ызгысьліс ваө, купайтчыштис да бөр котөртіс пывсянө.

А ужнайтігөн Васьөлөн мамыс да батыс сёрнитісны:

— Ёсип Педөр ордө гөсть локтөма.

— Шуөны, сійө пө Педөрсө фронт вылын ранитчөм бөрын петкөдөма.

— Абу Педөрсө, а Педөрыс сійөс. Ме ачым кывлі.

— Ладнө, кодыс кодсө — өткодь. Сёрнитөны, сылөн пө зэв уна уджыс, а вот важ другсө аддзөдлыны кадыс сюрөма.

— А мый налы, карсаясыдлы. Камандировкао петіс да деревняо кутшомкө полномоченнойон шунькнитіс дай.

Сідзкө, төдтөм мортыс — уполномоченной. Прөстө эз лок «Волганад». Васёлы уси төд вылас, кызди мамыс висьтавліс өти уполномоченной йылысь, коді волөма война дырйи найө сиктө. Сылөн пө вөлөма плеть, кодөн вөлөм нөйтө асьсө сапөг гөлень кузяыс скөрысла, а ещө пө өтчид, уборка дырйи, челядылысь мырддьөма вотос да тшак и талялөма. Таысь сійөс удж вывсьыс вөтлөмаось да судитөмаось. А тайө, тыдалө, мөд пөлөс: модаыс шутлив мортлөн и пывсянысь пасьтөгыс ю вылө котралө... Гашкө, сійө первойысь на деревняо локтөма да оз төд, кызди асьсө кутны?

Асыводзнас гымаліс. Кор Васё садьмис да петіс кильчө вылас мыссьыны, шондіыс вермасис нин гымалан кымөр колясьяскөд, зэрөн мыссьөм туруныс нюмъяліс-любуйтчис эзысь лысва моляснас, а бөрөздаті визувтіс ырөш кодь шор. Васё лэччис дворө, нургиг-сьылігтыр келіс бөрөздаас и аддзис Кармановьяс пөгреб дорысь төдтөм мортөс. Сійө пукаліс порог вылас да вөлаліс кузь шатин. Сійө казяліс жө Васёөс, шыасис:

— Эй! Кутшөма узьсис?

Васё матыстчис вөласьысь дорө и гөгөрвоис: төдтөм морт вөчө вугыр шать. Сідзкө, чери кыйны мөдөдчө. Уполномоченной — и чери кыйны... Абу гөгөрвоана. Детинка смелмөдчис да юаліс:

— Дядя, ті уполномоченной?

Төдтөм морт видзөдліс сы вылө читкыра синъясөн:

— Уна кутан төдны — аски гөгйөдзыд тош быдмас. А тэ меным ёнджыка кажитчан тоштөгыс.

— А плеть эм тіян?— эз сетчы Васё.

— Плеть? Кутшөм плеть?— пельпомъяссө лэптылөмөн шензис төдтөм морт, сэсся серьёзнөя содтіс:— Абу. Плетьыд менам абу.— Сійө сувтіс, матыстчис Васё дінө да тувкнитіс пельпомас:— Гашкө, төдмасям? Сёрнитам-баитам, а өта-мөднымөс огө төдөй... Менө шуөны Терентий Максимовичөн. Позьө и прөста Терень дядьөн...

— А менө Василей Егоровичөн,— шуис Васё да сы моз жө содтіс:— Прөстөясө шуөны Васёөн.

— О-о!— нюжөдіс Терентий Максимович, но дзевис сөдзтысьылысь нюмсө:— Ок и узян жө тэ, Василей Егорович! Тані тэнад узигкості сэтшөм праздник вөлі... кызди шуласны, фейерверк с музыкой.

— А мый сійө фейерверкыс?

— Ак, да. Сэтшөма, мися, гымаліс да чардаліс!..

Васё шензьөмөн видзөдіс гөсть вылө, а сійө тувкис детинкалы:

— Ладнө, мун тыртышт туистө, сэсся петкөдлан меным чериа местаяссө. Бур?

— Ы-ы,— сөгласитчис Васё да чеччалігтырйи котөртіс гортас.

Сьөд ты дорө найө мунісны вөрса трөпаөд, кыті Васё ветывліс батыськөд. Шондіыс юис нин пөшти став лысвасө. Терень дядь көнсюрө сувтавліс да то копыртчөмөн мыйкө видзө-

даліс турун пиысь, то малаліс кинас паськыд коръя кыдзьяслысь увъяссö, то шлопкөдіс ки пыдöснас пожöм стволъясö да вом-горулас сьыліс: «Живица, живица...» А öти местаысь, пашкыр лапъяса пöрысь коз да ичöтик пожöм пу костысь, найö аддзисны вöрса чераньöн кыöм «шонді».

— Видзöдлам кыйсьысь вылас,— шуис Терень дядь да пуксис сісьмыны нин заводитöм мыр вылö, зепсьыс кыскис куритчансö.

Васьö первойсö эз гөгөрво, кутшöм кыйсьысь йылысь мунö сёрниыс, бöрынджык нин дöгадайтчис. Чераньвезйыс вөрöшит-чыштис төврусыйс да югъялыштис шонді югөр улас. Кыдз толькö зэрыс абу тшыкөдöма!

Чераньыс некөн эз тыдав.

— Да тайö важся...— пондыліс шуны детинка, но сэк жö чераньвезйö люкасис гут, кутіс дзизгыны, мынтöдчыны, но ёнджыка дзугсис. Секунд мысти коз лап вылысь гутлань уськөдчис нопйö зэв мичаа рисуйтöм креста черань. Сійö вöлі сэтшöм ыджыд, мый чераньвезйыс лайкъяліс сьöктасьыс. Черань пыр и лои гут дорын, мыйлакö гөгөртис сійöс, а сэсся бөр кокъяснас сюся суйыштис гутсö чераньвезсьыс вöчöм сеткаö да кымыныськö гартыштис, а сы бöрын кымынлатікö орöдіс везсö да ассыйс кыйдöссö кыскис коз лап вылö.

— Да-а, вөр-валөн аслас вески... Сійö аслысног веситö, медым нинöм лишнöйыс эз вöv,— недыр чöv олöм бöрын шуис Терень дядь да бергөдчис Васьöлань.— Василей Егорович, кыдз тэныд кажитчис? Бура кыйсьö? Тадзи кө эськö миянлы чериыд шедас.

— Сійö жö тывйөн, а миян сöмын вугыр шатъяс,— ышловзис Васьö.

— Тывнад быдөн кыйсьысь, а вот вугырнад...— Терень дядь шлочкерис кывнас.— Терпенньö да сям колö!

Кыйсисны первой Сьöd тыысь. Сэтысь шеді (Васьö кыкысь лыддис) дас куим неыджыд ёкыш. Сэсся ветлісны Эжва дорö, коді визувтіс сэн жö матын, и сэтысь Терень дядьлы шеді кык компи.

Васьöлы нинöм эз шед, та вöсна сылы регыд дышöдіс. Детинка дугдіс вуграсьны, пуксис му чульк вылö да кутіс видзöдны Терень дядьлөн вуграсьöм вылö.

— Кынöмыд сямалö?

Васьö лэптыштіс пельпомъяссö. Кынöмыс сьлөн збыльысь сямаліс, но эз лысыт веськыда висьтавны та йылысь.

— Оз на?— мудера нюммуніс Терень дядь.— Мед. Всё равно пусям. Ок, ме радейта бипур вылын пуöм юкватö!— пуксис Васьököд орччөн да сёрнитігтыр нопйысь кыскаліс салдатскöй пöрт, нянь тупöсь джын, кымынкö картофель да паньяс.— Тайö Фёдор миянлы пуктіс. Ми ськөд ещö война дырйи на окружениеын тайö пöртъяс юква пулім.

Юква и збыльысь артмис чöскыд. Терень дядь сійöс шуис «кык судтаөн». Васьöлы тайö вöлі гөгөрвотöм. Терень дядь висьталіс, мый кык судтанас сійö шусьö сы вöсна, мый öти и сійö жö ваын первой пуисны ёкышъяс, а бöрыннас компиянсö.

Ещö вуграсисны час-мөд, медым кыйыштны гортö нуöм вылö, сэсся найö мөдөдчисны бöрсö мунны муяс вомөн. Тадзисö вöлі

ылынджык, но зато этшаджык вильодасны номъяс. Туйыс кайис вывлань, мылькйивса вышкалань, а кор матыстчисны вышка дор, кытысянь кол, воль лэччыны сиктлань, Терень дядь сувтис, видзодлис гогор и шензис:

— Вот тай да-а! Тасянь тай став районы тыдал! Вай шойч-чыштам, а?

Вась син водзын пласывидзисны тдса местаяс, и, кажитч, нинм тане эз вое сэтшомыс, медем шуны: «Вот тай да-а!» Мый тасянь сэтшом шензянаыс тыдал? Нинм. Водзыланыс Васьолон чужан сиктыс. Шуйгавылынджык мод сикт, кони шорас чурвидз, вичко. Водзынджык эм аэродром. Видзодлыны ко шуйгавыв и веськыдыв, ыб помасянинас заводитч, откод помтом-дортм вор, коди ылынылыны отлаас, енежыск, а борвыланыс тыдалоны С, ты да лозалан Эжа берегяс вылас вежодыс видзяс. А туй бокясас гогор быдманы катшасинтас да полудяс. Ставыс киди и кол, ставыс тдса, сы воена Вась и пуксис из вы. Дерг, оз позь шуны, мый сылы оз кажитчыны чужан сиктдорса местаясыс. Най мичаос. Вот кольом во сий ветлис чой ордас вор участок и два кык лун вермис овны сени. Эск мичаос ж, сени местаясыс и быд лун кино петкодлоны, а вот уси дум вылас гортдорса лом сацийс, кык вой узис и пыр сийос воталис. Пышыймон лои. Но «вот тай да-а!»— эск эз шу Вась. Сий понди видзодны Терень дядь борся. Терень дядь то матыстчывлас Васьолань, то вешыштлас. Кинас пыр сю шепгяс, да заяс, воршит, малал. То найос дукуштлас, то мус киас босыллас да шамрал, чуньяс костыс лэдз, то видзод кытчок, сю море вывтыс ы-ы, бытчок, вот-вот паскодас сывгяс и качодчас енежас... Сэтшом сылон синтасыс и чужомыс кыпидос! А сесса тай киди збылыс паскодас кияс, да городас:

— Ого-го-го!

Вичыс, тмысла Вась весиг дромун, а Терень дядь видзодлис сы вы, да гораа серктис, нетшышtis кымынк, полуд, да катшасин дзоридз и нюждис сылы:

— На, да эн дозы повзодомыс. Тэ тдан, мыйся тай дзоридзяс?

— Код найос оз тд,— шуис Вась.— Этй катшасин, а сий со полуд.

— «Катшасин... полуд», вот тэныд и на! Тай, друг, лекарственной турунтас. Важ йоз катшасинтасыс заваритм вас, кном висомыс юывломаос. Видзодлы, кутшом най мичаос, бытчок балеринаяс йоктоны товру улас. А полудтасна син висомыс лечитчылмаос. Гашк, сы воена и ондз на консюр, найос шуны мулон синтасон. Вот кутшом деляс, друг... А сю шепгяс гордзасыны нин койоны, Василий Егорович.

Терень дядь тапнит Васьолы пельомас:

— Став сертыс тыдал — таво йортдтас лоасны тырос.

Рытнас Вась юрын жуисны думтас. Сылы дум вы, усисны сий выльтортасыс, кодтас Терень дядь висыталс черияс йылыс. Волмк, ком тож, хищной, горш чери, сей, ес да мук, черияслыс покс, а Вась та йылыс ондз эз тд. Эз тд сий и «кык судта» юква йылыс, катшасинтасыс, мук, турунтасыс да дзоридзтасыс уна полос лекарствояс вом йылыс.

Мыйла Терень дядь ставсö тайöс тöдö? И кодi сийö ачыс? Абу кө уполномоченной, гашкö, агроном? Эз öд, көнкö, прöста сю шепъяссö малав да мусö чунь костъясас дрöбит... А гашкö, сийö врач да? Öд лекарствояс вöчöм йывсьыс тöдö жö. И аккордеон вайис, а некор ворсöм он кывлы. Вöрын пуясöн интересуйтчис и чераньöн тшöтш... Мукöд йöзыс кызкö ставыс гөгөрвоанаöсь. Босьтам батыс. Электростанцияын техникöн уджалö, и ставыс тöдöны, мый сийö техник. Педөр дядь конюхөн уджалö, и ставөн жö тöдöны сийös, кызди конюхös. А Терень дядь?

Васьö сiдзи и унмовсис, Терень дядьös тöдмавтöг.

Та бöрын найö некымын лун эз аддзысьлыны. Видзяс вылын заводитчис турун пуктöм, и Васьö тшöтш мöдiс отсасьны сэни: быд лун вöлөн юр кыскалiс. А Терень дядь кытчöкö вошлi. Васьöлы сэтшöм окота вöлi ошйысьны сылы турун пуктöмнас, висътавны, кутшöм гажа и кыпыд уджавны видзяс вылын, мыйта сэни быдмöны быдкодъ дзоридзыс да кутшöм чöскыд туруныслөн көрыс — весиг коддзыны-кольмыны верман. А юръяс кыскалöмыс! Вот көнi «вот тайö даыс!» Но Терень дядь эз вöv: Педөр дядь висъталiс, мый сийö мунöма вөр участокö.

Öти лун вöлi дзик нин терпитны позьтöм жар. Васьö витысь купайтчис, но и тайö эз отсав. Вöv вылын пукавны эз кут позьны (вöv чужъясис лöддзöсьысла), и Васьö новлöдлiс сийös дом поводöдыс. Рытланыс сийö сэтшöма мудзис, мый весиг вугралiс ужнайтiгөн. И, колöкö, эськö дзикöдз унмовсис, эз кө кыв батымамыслысь сёрнисö.

— Олö мортыд вöльной свет вылын и оз тöд, көнi мый сийös виччысьö,— шуис батыс.

— Мый нö лоис?— тöждысян гөлöсөн юалiс мамыс.

— Ме ылi видз вылын зорöд чöвтi. Неылын Педөр да сылөн другыс ытшкисны. Куритчигөн, видзöда да, на дiнö председательлөн машинаыс локтiс. Вөлöмкö, Педөрлөн другыс сьölöмнас висъмöма, больницаö нуöмаöсь.

Васьöлысь быттöкö киөн босьтiсны унсö.

— Терень дядьös?— горöдiс сийö.

Асывнас Васьö висъталiс батыслы, мый сийö мунас видзяс вылö сёрöнджык: колö пö ветлыны школаö, нуны школаса коллекцияö чукöртöм изъяс. Батыс сöгласитчис, а мамыс быттöкö лыддис Васьöлысь думъяссö.

— Тэ көть пыравлы больницаас мортсö видлыны,— шуис сийö.— Ме шаньгаяс пукта.

Больница вöлi школаö мунан туй дорын, и Васьö, дерт жö, первой пырис сэтчö. Сийös пыр жö лэдзисны ыджыд югыд палатаö. Нель койка пиысь öти вылын куйлiс Терень дядь. Сылөн кельыдруд рöма синъясыс муртса вöйыштöмаöсь, но ускыс нюмъялiс важ мозыс.

— А-а, Василей Егорович!— кыпыда шыасис висъысь да индiс койка дорас сулалысь табуретка вылö.— Лок пуксы татчö.

Васьö пуксис, Терень дядьлы мыччис шаньгаяссö.

— Шаньгаяс?!— шензис висъысь, босьтiс öти шаньга да курччис.— Кутшöм чöскыд! Весиг вомын сылö. Босьт вай, сей

ачыд тшөтш. А зепъясад шаньгаяс жө?— индіс Васьолөн пöлт-чөм пинжак зепъяс ылö.

— Абу,— юрсö пыркöдіс Васьö.— Тайö школаса коллекцияö изъяс...

— Тэ нö изъясөн интересуйтчан? Гашкö, тэ и аддзин эсійö гежöда сюрлысь метеоритсö да, код йылысь тай газетö гижліс-ны?

— Ме эг öтнам, ёртъяскöд,— яндысьöмпырысь вочавидзис Васьö.

— Но, геолог, вай мыччöдлы, мый тэнад зептад. Ме радейта жö корсюрö видзöдлыны на ылö. Сідз-сідз. Тайö со кварц,— шуаліс сійö изъяссö тумбочка ылö пукталіг.— А этайö кальцит — зэв интереснöй минерал, шусьö исландскöй шпатон,— кымын водзö, сымын гажмис Терень дядь.— Нолтö, мыччыв эсійö газетсö. Тайö изйыслөн эм аслас свойство. Сійö быттöкö поткöдö сы ылö усъысь лучьяссö, артмöдö öти гижöдсьыс кык öткодь гижöд. Со, видзöдлы татчö... Колöкö, ме тайö из йывсьыс тэныд висьтала öти интереснöйтор.

— Висьтав,— сöгласитчис Васьö.

— Но, кывзы, сідзкö,— заводитіс Терень дядь.— Коркö важөн нин öти странаын овлöма зэв горш да асьсö радейтысь царь. Сылөн вөлöма зэв уна озырлуныс, но пыр кажитчö этша. Думыштчас царь, кыдзи эськö лоны нöшта на озырджыкөн, медым сы йылысь став му ылас тöдісны, и сылы дум ылас усьö, мый тайö изйыд, пырыс кö видзöдлан, быдтор кык мында петкöдлö. Ас дорас корас изйысь вöчасьысь мастерöс да тшöктас: «Вöч тайö изсьыс менам дворец гөгөр стена. Вöчан — зöлötита, он вöч — юртö керышта».

Дыр уджаліс мастерад и вöчис стенатö, но царыд пөръяліс: медым мастерад оз висьтав йöзыслы изйыдлысь тайнасö, босьтіс да, зöлötитöм пыдди, керыштіс юрсö. Тадзи мастерлөн гөтырыс лои дөваөн, а пиыс сирөтаөн. Съöкыда налөн колины луньясыс да войясыс, а кор мастерадлөн пиыс быдмис, мамыс висьталіс сылы, кыдзи царь пөръяліс да виис сылысь батсьö. Пи кöсйысис босьтны водзöс батсьö виöмысь. Сійö муніс дворец дорö, матыстчис стена бердö и аддзö: стена саяс царыдлөн шензыымөн уна озырлуныс и войскаыс. Но сійö эз повзы, кулакнас зымгис стенаас. Некод сылы эз вöсьты. Сэки мастерлөн пиыс босьтіс гортсьыс батыслысь вöчасян мөлöt-киркасö да бара локтіс стена дорад. Кучкис — стенаад сöмын посныдык визьяс лоисны. Коймöд луннас найö мунісны мамыскöд кыкөн. Пиыс бара кутіс стучитны, но бара некод налы эз вöсьты. Сэк быри мамыслөн терпеннöыс, нёровтчис верöсөн вöчöм стена бердад и шогысла да öбидаысла бөрддзис кыз синваөн. И друг пиыс казяліс, мый мамыслөн синваысь из стенаыд быттöкö пузис да пондіс сывны. Сэтшöма бөрдіс дөваыд, сы мында синва кисьтіс, мый стенаад вель ыджыд розь лои. Мастерадлөн пиыс пырис тайö розьöдыс стена пытшкас и казяліс, мый абу нин сэтшöм страшнöй царыд, кыдзи кажитчис ортсысянныс, и войскаыс сылөн абу вывті уна. Писькöдчис сійö охрана пырыс дворецад да виис цартö, а из стенатö пасыйис-жугліс, рөвняйтіс муыскöд. Сэтшöм зіля сійö уджаліс, мый стенасьыд торпыригы-ясыс став му пасьтаыс сывкйисны-лэбисны, а дворецсö челядлы

сетісны. Отсасисны сылы тайӧ ыджыд уджас и кузнечьяс, и столяръяс, и плӧтникъяс, и му дорын уджалысь крестьяна, и уна мукӧд... Тыдалӧ, сійӧ стенасьыс ӧтитор и лэбзьӧма татчӧдз да сюри тэныд. Гӧгӧрвоин? Кор сы былӧ солянӧй кислота войтыштӧдан — пузьӧ, заводитӧ руавны, сыӧ кислотасьыс. А збыль вылас тайӧ колана минерал, сійӧс микроскопъясӧ да кутшӧм-сюрӧ мукӧд приборъясӧ пукталӧны заводъясын.

Васьӧ эськӧ и водзӧ окотитіс кывзыны Терень дядьлысь висьталӧмсӧ, но локтіс сестра и тшӧктіс мунны: регыд пӧ локтас врач да видчыны кутас. Мунігас Васьӧ Терень дядьлы и мукӧдыслы ыджыд морт моз шуис:

— Бурдӧдчӧй ӧдйӧджык.

Ӗдзӧсӧдыс петігӧн нин сійӧс суӧдіс Терень дядьлӧн горӧдӧмыс:

— Ладнӧ! Ми ещӧ ветлам на тэкӧд изъястӧ чукӧртны! Аттьӧ шаньгаяссьыд!

Но изъяс чукӧртны ветлӧмныс эз нин ло: Терень дядьлы эз сюр кадыс. Больничаясь петӧм бӧрын найӧ сӧмын ӧтлаын Терень дядь корӧм серти кино былӧ ветлісны. Киноыс вӧлі «Высокая награда» — шпионъяс йылысь да сы йылысь, кызди найӧс чекистьяс кутісны. Сэні вӧлі тшӧтш Васьӧ кодъ кымын жӧ детинка. Васьӧ видзӧдіс киносӧ синсӧ лапнитытӧг, а Терень дядь пукаліс орччӧн да мыйкӧ гижаліс аслас блокнотӧ. Кор петісны клубысь, сійӧ юаліс Васьӧлысь:

— Но, кызди? Кажитчис эз картинаыс?

— Ы-ы, кажитчис... А ті мыйла эн видзӧдӧй?

— Ме коркӧ видзӧдлі нин.

— Видзӧдлінныд, а бара пыринныд?

— Но, тэ жӧ эн на видзӧдлы,— Терень дядь дзугис детинкалысь плеш вывсьыс юрсисӧ, сэсся корис:— Пыралам ме ордӧ?

Терень дядьлӧн комнатаас — Кармановъяс меститӧмаӧсь сійӧс горничаас — ставыс вӧлі руз-раз: койка вылас, пызан вылас и весиг джоджас — быдлаын кызд веськалӧ куйлісны бумага листъяс, сэн жӧ, пызан кок дорас, куйліс восьса чемодан, кӧні тыдалісны книгаыс, а пызан вылас, бумагаяс пиын, куйліс мӧд чемоданыс, кӧні, Васьӧ чайтӧм серти, вӧлі аккордеон.

— Терень дядь, ті музыкант?

— Да, патефонӧн ворса,— нюмъяліс Терень дядь.

— А мыйла, сідзкӧ, аккордеонсӧ новлӧдланнӧй?

— Да тайӧ жӧ машинка,— Терень дядь воськовтіс пызанлань, лэптіс вевтсӧ, и Васьӧ синъяс водзын тыдовтчис збыльысь эз аккордеон, а мӧдтор, кӧні сылы гӧгӧрвоанаӧсь вӧліны букваыс, кодъясӧс гижалӧма вӧлі посныыдик кизь кодъяс былӧ. Сылысь чуймӧмсӧ казьялӧм бӧрын Терень дядь стӧчмӧдіс:

— Тайӧн позьӧ печатайтны. Вот, шуам,— и сійӧ пондіс кучкавны чуньнас кизь кодьясас. Бумага вылас вочасӧн артмис: «Василий Егорович». — Аддзан? — юаліс Терень дядь.

— Да,— шуис Васьӧ, и кызкӧ мӧд пӧлӧс синъясӧн нин бара котӧртіс комнатасӧ. Сідзкӧ, тайӧ абу аккордеон, а машинка, кодӧн позьӧ печатайтны еджыд бумага былӧ пӧшти сідз жӧ, кызди и книгаысын. Детинка сэк жӧ казьяліс, мый комната пасьта куйлысь бумага листъяс вылас мыйкӧ гижӧма. Сійӧ копытчыліс,

босьтіс өти лист и ас кежас лыддис: «Локтöй рытланьыс лесник керкаö и сэнi сёрнитчам, коды кытчö мунны, да ружьенытö эн вунöдöй». И Васьöлы друг дум вылас воис киноыс, вирдыштiс дум: гашкö, Терень дядь сэтшöмъяс пиысь жö да? Гашкö, шпион?! Аккордеон пыдди ящикас печатнöй машинка... Он и куж думыштны... Васьöлөн весиг кöдзавліс мышкуыс. Абу öд, кöнкö, прöстö сійö кутшöмкö гөгөрвотöм, аслыссяма, унатор тöдö. И этійö бумагавывса гижöдыс. Но недыр мысти сійö кокныдджыка ышловзис. Абу, оз вермы лоны: сійö жö Педөр дядькöд öтлаын воюйтлöма... Танi Терень дядь торкис сылысь мöвпъяссö:

— Мый нö тэ, Василий Егорович, руалін? Вай бөр — шон-дiавлы! Волан аски менö кольöдны? Меным, другö, пöра воис гортлань восьлавны.

Васьö гогнитiс юрнас.

Сiдзкö, Терень дядь аски мунö нин. Сiдзи и Васьöлы эз удайтчы тöдмавын сійöс. Детинкалы друг лои забеднö, и сійö котөрөн петiс ывлаö.

Но Терень дядьöс кольöдны Васьö мунiс аэродром вылö. Самолёт дорас нин ыджыд морт моз, киасьöмөн, прöщайтчис Терень дядькöд да весиг шуис:

— Бур туй!

А Терень дядь Педөр дядькöд кутчысьлöм бöрын пырис самолётö да сэсянь нин восьса öдзöсöдыс горöдiс:

— Радейт, Васьö, вөр-васö, сійö — интереснöй штука!..

Тайö вöлі гожöмнас, июль тöлысьын, а öнi, Виль во водз-вылын, сиктса почтальон Марья тьотка вайис Васьöлы бандероль. Детинка некор на öти письмö эз получитлы аслас ним вылö, а танi виччысьтөг воис дзонь бандероль. Гортö öтнасөн кольöм бöрын сійö надзöникөн, волнуйтчитыр восьтіс бандерольсö и аддзис сэтись руд мышка неыджыд книга. Книга корка вылас вöлі рисуйтöма вөр, а улынджык — гижöд. Васьö лыддис: «Терентий Жангуров. Лысваöсь туйяс». Сэсся бергöд-лыштiс киас книгасö да весиг дукуштліс. Сэтись кыліс клей дук. Восьтіс медводдза лист боксö. Первойөн, мый аддзис сэтись, вöлі Терень дядьлөн фотокарточкаыс, кöнi сійö вöлі дзик гожся кодыс: тасöсь дөрöма, идзас шляпаа, сьöдов уска, нюмъялö... А орччөн, мöд лист бокас, вöлі пасйöма чернилаөн: «Менам друглы, Василий Егоровичлы, став сьöлөмсянь тайö книгасö». Тайö нö мый, ачыс... книгасö? Вот, сiдзкö, мыйла сылы машинкаыс...

Васьö ещö öтчыд лыддис гижöдсö, сэсся öдйö листалiс ставнас книгасö, но прамöя эз видзöд, сы вöсна мый виччысьтöмысла морöсас кыпалiс вöвлытöм радлун. Детинка пыр на эз эскы аслас синъяслы. Сійö öдйöджык бара восьтіс да видзöдліс портретсö. Да, турунвиж чернилаөн збыльысь вöлі гижöма: «МЕНАМ ДРУГЛЫ...»




## Разведкаӧ локтӧны ӧтчидысь

О Ч Е Р К

Тайӧ мортислысь нимсӧ нэмъяс кежлӧ гижӧма Россияса военной разведкалӧн историяӧ. Чужан му водзын заслугаясысь сійӧс наградитӧма кык Боевой Красной Знамя, первой степеня Отечественной война да Красной Звезда орденъясӧн, дас кык боевой медальӧн. Уджалис Чехословакияын, Англияын, Албанияын, Болгарияын, Китайын. Медводдзаысь сылӧн нимыс тыдовтчис 1987 воын, но сӧмын некрологъясын.

Меным мойвиис паныдасылыны легендарной разведчик, полковник Николай Михайлович Титовкӧд (снимок вылын).



...Тайӧ керкаыс сулаліс Лондон рытыв-лунвылын, сәні, кӧні Темза вӧчӧ неыджыд кытш, да торъяліс мукӧдсьыс ыджданас, аслыспӧлӧслуннас. Мыгӧрнас муніс важся рыцаръяслӧн замок вылӧ, но югыд мича ыджыд ӧшиньяснас вӧлі ӧнія кадся модаа. Ләптылісны сійӧс эз на зэв и важӧн — во кӧкъямысдас сайын кымын. Кӧзяиннас вӧлі Британия діясывса зэв озыр морт, гортса пемӧсьяс кутысь.

Керкаыс куим судта. Улысас вузасисны яйӧн да яйысь вӧчӧм вӧлӧгаӧн. Мӧд судтаас — ресторан да казино, кытчӧ волывлісны зэв озыр йӧз. А коймӧд судтаса олысьяс йылысь стӧча некод нинӧм эз тӧд. Кывсис, сэтчӧ волывлӧ ачыс керкаса кӧзяинныс томиник нывъяскӧд. Эскыны кӧ мукӧдлы, пыравліс и ачыс Британияса королева, медым паныдасылыны гуся сӧветникъяскӧд. Но тайӧ вӧлі сӧмын сёрни. И сӧмын дзик ӧти морт — ичӧтик тушаа, письтиӧсь чужӧма, мудер синъяса, кодӧс шуисны Вольфӧн (дзик стӧчасӧ сылысь нимсӧ некод эз тӧд) вермис висътавыны, мый коймӧд судтаын пукалісны Англияса военной разведкалӧн Рытыввыв отделысь войтыр.

И сідз, коймӧд судта. Став дас кык югыд ӧшиньянас видзӧдіс юлань. Темзалӧн ваыс тані быттьӧ сулаліс — войся енӧж кодъ смоль сьӧд, муртса-муртса нюлышталіс гырысь изъя берегсӧ

---

да сөмын корсюрө ярмыліс, кучкавліс изъяссө ён гыясөн. Сылөн ваыс сәки, лысва кодь югьд, зіліс нетшыштны берегсьыс вичко юр кодь гырысь изъяссө.

Веськавны татчө, коймөд судтаө, вөлі зэв сьөкьд. Яйөн вузасян лавка улын, кытчө лэччөдіс гөгрөс пос, да мыйөс позьө вөлі идравны, меститчис бетонысь вөчөм ыджыдкодь бункер. Стенас вөлі пөшти тыдавтөм өдзөс. Воссыйліс коймөд судтасяныыс кнопка личкөмөн. Öти мортлы вылө лөсьөдөм лифт катөдліс вывлань, ён көрт өдзөслань. Сійө пыр вөлі игана, а воссыйліс кнопка отсөгөн жө. Лифтлөн кабинаыс вермис и мукөдтор вөчны: гижны плёнка вылө ставсө, мый сёрнитлісны бункерас. Тані жө, лифт улас, куйліс заряд. Сійө вермис тшын йыв лэптыны ставнас керкасө. Тайө лифтыс — Вольфлөн мөвпыштөмтор.

Быд асыв, стөч дас часын, коймөд судтаса öти вежөсын öзйыліс гөрд би, и Вольф петкөдчыліс аслас шеф водзын. Тані, кьдзи и став отделясас, ыджыдаліс öти закон — юөртны сөмын збыльторяс, ассиянд некутшөм содтөдьястөг. Юөрыс мунліс на некымын ки пыр да веськавліс сөмын сылы, кодлы вөлі колана.

...Вольф көрт чукля поскөд лэччис бункерө да тэрмасьтөг сувтіс лифт водзө. Сигналыс пырысь-пыр кайис вывлань. Кык минут мысти сійө матыстчө нин вөлі морт дорө, коді пукаліс кучик креслөын да быттө дышпырысь моз виччысис Вольфөс. Эз удит мөдыс пуксьыны, юаліс бара жө быттө дзик ковтөмтор йылысь:

— Мыйкө төдчанатор?

Вольфлөн юрас вирдыштіс мөвп: öні висьтавны аслас аддзөмтор йылысь али виччысьлыны? Оз, оз кут виччысьны. Креслөын пукалысьөс, коді некор эз тыдовтчыв йөз водзын, Вольф век жө шемөсмөдіс:

— Рочьяслөн посольствоын тыдовтчис выль морт. Төрыт петаліс машинаөн карса уличаяс вылө... Төдмасьө мян каркөд.

Вольфлы паныдөн пукалысь шензыштіс гусьөникөн: татшөм нырисаыслы вермас завидьтыны быд разведчик.

— Öти уличөд сійө муніс кыкысь...

— Тэ көсьян шуны, мый сійө төдмасьө карыскөд матысянджык?

— Схемаяс да фотоснимокъяс серти, сійө, дерт, карсө ылөсас төдө, но дзик оз төд мянсьыным уличаяс збыль вылас.

Кучик креслөын пукалысь чөв оліс. Эз төдчы, мый сійөс вөрзьөдіс Вольфөн висьталөмторйыс. Сылөн чужөм вылысь оз вөлі позь нинөм лыддыны. Разведкаын тайө вылө донъявсис. Сэсса вом доръясыс воссьыштлісны да Вольфлөн пельөдз муртса кывмөн воис:

— Рочьяскөд шмонитны мянлы правосө абу сетөма. А коді пукаліс руль саяс — выльөн воөм морт либө важся уджалысь — колө зэв стөча төдмавны.

Вольф восьтыліс вомсө, но паныдасис сы водзын пукалысьлөн көдзыд синъяскөд да нинөм эз шу.

...Куим судтаа керка водзын сулалысь полицейскөй эз казаяв, кор машина чукөрысь торйөдчис «Пикап» да, зэв крута бергөдчөмөн, сувтіс туй пасйөдьяссиян неылө. Кабинасьыс петіс кок-

ныдык спортивной комбинезонё пасьтасьом том морт да восьтис машинаыслысь капотсё, модіс сәні лукйысьны. Вольф, коді тайё кадё буретш лэччис бункерё, эськё кушмыны заводитом юрнас ковгис стенас, тәдіс кё, мый вөчсьё улича вылас.

А спортивной комбинезона морт, дерт, лукйысис мода вылас. Збыль вылас эз вештыв синъяссё кабина бокё ладмөдөм зеркалоысь, көні бура тыдаліс, коді пырё и петё керкасысь. Здук мысти сәні тыдовтчис Вольфлөн чужомыс. Сійё весиг синсё эз чөвтлы неылын сулалысь машиналань да мөвпыштны эз лысьт, мый сы дорын сулалысьыс да посольствоса машина руль сайын пукалысьыс өти и сійё жё морт. Тәдіс кё эськё, ачыс аслыс эз эскы, мый сійё, му пырыс и ва пырыс мунөм разведчик, вермис ворссыны некодлы тәдтөм мөд разведчиклы. А тайё пөрийё Вольф зэв чорыда ворссис. Вежон сайын, кор Вольф «өшйис» роч посольствоса машиналы бөжас аслас «Бьюикөн», сійёс некымынысь снимайтисны машинасянныс, код бөрся вөтлысис. Буретш та понда «Эмка» муніс өти уличөдыс кыкысь. Вольф Гюнтерлөн «мыгөрыс» өні вөлі рочьяс кийн.

«Пиак» дорын ноксысь видзөдліс часі вылө — дыр сулавны тані сылы эз позь. Мөдіс нин пөдлавны капотсё, кор зеркалаын тыдовтчис буретш сійё, кодөс и виччысис. Кильчө помас петіс сьөд костюма, дженъыдик уска том морт. Вөчис некымын воськов водзё, пөрччис юрсысь турунвиж шляпасё да мөдіс чышкавны сійёс неыджыд чышъянторйөн. Комбинезона морт гораа шлапкис капотнас, пуксис кабинаө да вөрзис местасянныс ыджыд өдөн. Час джын мысти, кодлы колө вөлі, сійё юөртіс: — Миян морт воис.

Тані чужө юалөм: коді тэ, комбинезона том морт, кытысь сәтшөм сямыд, мый кутан асьтө тайё ыджыд бөкөвөй карас аслад гортын моз?..

...Сюрс өкмыссё ветымын өтиөд воын ме вөлі медводдза Краснознамённой гвардейскөй бригадалөн 123-өд артиллерийскөй полкысь учебной батареяын курсантөн. Тайё часьтыс котыртчис Великой Отечественной война заводитчигөн Москваса ополченечьясысь. Повтөг воюйтис. Бөрынджык сійёс позьё вөлі аддзывлыны Красной площадь вылын, Москва гарнизонса войскалөн парадъясын. Сідзи лоис и сійё уна восайся арё. Миянөс, том боечьясөс, өтүвтисны торъя дивизионө. Парад кежлө дасьтысим рытьяснас. А луннас миян пиысь кодсюрё ветлывліс увольнениеө карё. Мойвиис и меным да менам ёрт Владимир Титовлы. Миянлы уси шуд вит час гөститны Москваын. Ёртөй вөйиис ветлыны ыджыдджык вок дінас. Висьталіс, мый сійё военной, олө Москваын, но көні служитө, оз төд.

Час мысти ми вөлім Дмитрий Ульянов уличаса колана керка дінын. Ёртөй кыпөдчис корсьны патерасё. А ми виччысим ывлаас. Минут дас мысти кильчө вылө петісны нин куимөн. Төдтөм мужичөй кутіс киөдыс куим-нөль арөса, еджыд юрсиа нывкаөс. Дерт жө, вокыс,— гөгөрвои ме,— ывті нин өткодьөсь. Сөмын ыджыдджыкыслөн чужомыс вөлі стрөгджык, а синъяссё неуна читкыртөма. Матыстчис ме дінө зумыд воськолөн, нюжөдіс кисө:

— Николай Михайлович Титов.

Пырим патераö. Недыр сёрнитыштöм бöрын ыджыдджык Титовыс корис мянöс кухняö. Шуис, мый гöтырыс ичöтыскöд мунис гуляйтны. Кöзйяствуйтны пö ковмас аслыным. Пызан сайын сёрниыс паськалис. Николай Михайлович юасис мянлысь, кызди вежсис Сыктывкар, вевттьöны-ö асфальтöн уличаяс, стрöйтöны-ö керкаяс да... сюрö-ö чериыс Сыктыв юысь.

Ме петі ыджыдджык Титовлөн патераысь зэв долыд сьö-лöмөн: со öд кутшöм бур морткöд удайтчис паныдасын! Верми-ö сэки тöдны, мый нелямын квайт во мысти бара вола та-йö патераас. Но сэні менö паныдаласын нин Николай Михайловичлөн Наталья нылыс, Россияысь Наукаяс академиялөн научно-исследовательскöй институтын вуджöдчысь, да сылөн авъя нывкаясыс.

Уна во мысти печатын йöзöдисны Николай Титовлөн кувсьöм йылысь некролог. Ме сэки тöдмалі, мый сійö уджавлöма страна са оборона министерстволөн главнöй разведывательнöй управлениеын.

Москваö мöдысь волігөн эг сорсы, мый верма унджык тöдмавны менам земляк-разведчик йылысь, кодлөн олöмыс уналы вöлі гусяөн.

Сэтчö мунтöдз пыралі республика са военкоматö, звöниті ФСБ-ö, кори, медым отсаласын. Но меным шуисны, мый öдвакö мыйкö содтöд вермасын юөртны.

А менам зептын вöлі сöмын öти мандат — Россияысь журналистъяслөн Союзö пырысьлөн удостоверение. Россия са Президент бердын Коми Республика са представительствоын сөветуйтисны шыöдчыны Титовлөн рöдвуж дінö. И сэки ме шуи мунны аслам туйöд.

Москваö воөм бöрын мöд луна с пыралі полковниклөн дöва дінас. Сэні жö вöлі и Николай Михайловичлөн Вера Михайловна чойыс. Öдзөссö восьтіс кöзйякаыс, Татьяна Исидоровна, зэв авъя ань. Сійö пыр жö гөгөрвоис менсьым бур көсьöмөс. Ми видлалім фотографияяс, көні вöлі сылөн верöсыс. Снимокъяссö вöчöмаöсь Англияын, Албанияын, Болгарияын да, дерт жö, Москваын. Вöліны и полковник батъ-мамлөн да матыссалөн фотографияяс. Сёрниыс артмис зэв паськыд. И кор юалі, код дорö эськö позяс шыöдчыны верöсылөн ёртъяс пиысь, Татьяна Исидоровна вочавидзис:

— Николай Михайловичöс служба чöжыс тöдіс отставкаын полковник Виктор Викторович Бочкарев, öні сійö юрнуöдö тайö ведомствоас ветеранъяс сөветлөн уджөн. Ме висьталі сылы тіян локтöм йылысь. Сійö көсьис звöнитлыны.

И збылысь, регыд звöнитіс телефон, код пыр кыліс чорыд, но зэв вежавидзысь гөлөс. Тайö вöлі Виктор Викторович Бочкарев.

Лун мысти автобус нуис менö Давыдковоö, көні оліс Титовлөн вöвлöм ёртыс. Тані коркö вöвлöмаöсь сталинскöй дачаяс, а öні паськöдчöмаöсь олан керкаяс.

И со öти керка дорын менö паныдаліс шөркодъ тушаа, ар сизимдаса мужичöй. Тайö и вöлі Виктор Викторовичыс.

Воим сёрниö. Юалі, кор сійö тöдмасис Николай Михайловичкöд.

— Тöда Титовöс ГРУ-ын служба заводитчöмсянь, а стöчджы-

ка кө, сюрс өкмыссё комын көкъямысөд во помсянь, кор мия-нös дасьтисны суйөр сайын удж кежлө. Мөд онас менö мөдөдіс-ны Германияö, а Титовös — Англияö. Николай Михайлович вöлі суйөрсайса куим командировкаын да служитіс военнöй разведкаын кызь кык во. Медся сьöкыд уджыс сылы вичмис Лондонын. Сэтысь 1943 воын Москваö локтөм бöрын сійö вöлі управлениеын да ноксис ёнджыкасö Асыввыв Европаса стра-наяскөд. Тайö офицерыслы позис эскыны. Медся ыджыд сьö-кыдлунъясысь сійö кужис аддзыны петан туй, бура пöртіс олö-мö сетöм индöдъяссö...

Со татшöм сёрни артмис Николай Титовлөн вöвлөм ёрткөд. А коді ачыс Виктор Викторовичыс?

Чужлöма Украинаын. Дас нель арössянь заводитöма уджавны полиграфическöй фабрикаын. Сэсся вöлöма стрöительнöн да öт-тшöтш велөдчöма. Институт помалöм бöрас уджалöма Киевын петысь öти ыджыд газетын. Уна печатайтчöма.

Войнаöдз на веськалöма служитны пограничнöй войскаö, кытысянь и босьтöмаось военнöй разведкаö. Война воясö Виктор Бочкарев уджалöма Югославияын, Польшаын, Германияын. Война бöрын бара пуксьöма учебникъяс сайö да лоöма Военно-дипломатическöй академияса слушательнöн. Сійös помалöм бö-рын — Европа, Асыв-Лунвыв Азия, Ылі Асыввыв. Отставкаö петöм бöрас Виктор Бочкарев велөдöма да öттшöтш юрнöдöма ГРУ-ын ветеранъяслөн уджөн. Наградитöма мортсö боевöй ор-денъясөн да медальясөн. А мыйысь? Ни öти документын та йы-лысь абу гижöма...

Мунігөн нин кори Бочкаревлысь, мися, окота волыны ГРУ-ö. Сійö менсьым көсйöмös эз опкы.

И век жö шуи аддзысьлыны странаса военнöй разведкаөн веськөдлысьясысь öтикөд. Но менам блокнотын эз вöv ни öти телефон, кысянь позис та йылысь юавны. Отсалісны Москваса ёртъяс. Журналистлөн шөр керкаын менö вайöдісны Москваын петöм «Паметь небöглөн» главнöй редактор И.Гребцов дінö. Сійö тöдмөдіс оборона министерстволөн пресс-центрса вöвлөм веськөдлыськөд (шуам, Иванкөд). Тайö мортыс и сетіс ГРУ-са начальникös вежысь Н.Бойколысь телефонсö.

Дыр мөвпалі, кыдзи бурджыка шыödчыны, сэсся звониті. Сёрниыс артмис зэв дженьыд. Тайö вöлі пекнича лунö. Генерал корис менö ас дінас выльлунö, дас кык час кежлө.

Но менам выль тöдсаяс пиысь некод эз тöд, көні тайö ГРУ-ыс да кыдзи сэтчö мунны. Звönита Виктор Викторовичлы. Сі-йö юалö:

— Ті, Леонид Александрович, энö ыстысьöй ме вылö?

— Дерт жö, эг, Виктор Викторович. Сёрниті ас нимсянь. Но ог тöд, кыдзи сэтчö веськавны...

Сійö дыр чöv оліс. Медбöрын шуис:

— Тіянös сэтчö нуöдас öти морт. Гижöй телефонсö.

Некымын минут мысти телефон пыр кыліс мужичöй гөлös.

— Менö шуöны Владимир Николаевичөн. Кута виччысьны тіянös метро платформа вылын. Босьтöй шуйга кианыд газет. Аддзысям дас вит минут мысти.

И со сулала метро платформа вылын. Ме дінö матыстчис олöма мужичöй, нюмъёвтöмөн чолөмасис:

— Ме Владимир Николаевич, колльöда тiянöс ГРУ-öдз. Паспортныд сьöрсьыныд?

— Блокнот да паспорт сьöрысь.

— Мунам. Но сюркнялöй пель саяныд: этшаджык юасьöй, мед тiян йылысь мыйкö эз чайтны. Тi воинныд республикаысь, кытчö тшöкыда волевлöны суйöрсайса делегацияс. Дженьыда кö, тi босьтчинныд вöчны сьöкыдтор. Но тайö зэв бур. Разведчикъяс йылысь колö гижны. Тiян земляк Титовыд унатор вöчис. И колö, медым сылön чужанiнын тöдiсны, кутшöм смел воинön сийö вöли...

КПП-ын, кытчö ми матыстчим Владимир Николаевичкöд, воча локтiс том подполковник. Дежурнöй жырйын офицер тшöктiс меным виччысьыштны, а ачыс петiс. Виччысьны эз дырковмы. Подполковник выльысь мыччысис öдзöсын да вежавидзöмпырысь шуис:

— Генерал виччысьö тiянöс. Öдзöсыс орчча...

...Тентюковса öти мыльк вылö кыпöдчöм аслыссикас нима Öнтонпи ичöтик грездса олысьяс шулiсны, мый еджыд юрсиа, чангыль ныра детинка лоас бур крестьянинön. Öд сийö дас квайт арöс тыртöдз на кужис ставсö вöчны: и гөрны, и кöдзны, и ытшкыны, и чöвтны, и сийöс-завод дзоньтавны. Сöмын öти-торйön Енмыс омöльтiс: бать-мамыс вöлины ыджыд тушааöсь, а быдтасыс джек кодь. Сидзи и шуисны зонтö грездын — Ичöt Кольön.

Ичöt Кольлön мамыс, Мария Павловна, правдайтчигмоз дольлiс:

— Тайö ме ставсьыс мыжа. Ичöтдырсянныс сьöкыд уджөн тыртлi. Батьыс öд война вылын вöли.

Школаас Ичöt Коль зэв бура велöдчис математикаысь да физикаысь. Велöдысьяс шуывлiсны, Коля Титов пö лоас ыджыд математикön. Но сизим класс помалöм бöрын зонка кутiс уджавны бать овмöсас. И код тöдас, дыр-ö эськö тадзи вöли, эз кö сылön туй вылын паныдась налön жö сиктысь нывка, Оля Попова, кодi сэки велöдчис нин Ленинградса медицинскöй институтын. Нева бердса кар йылысь нывлön висетьясыс быттьö садьмöдiсны зонмöс...

Сийö жö воас Николай Титов бура сдaitö экзаменъяс да пырö велöдчыны точнöй механика да оптика Ленинградса техникумö.

Но 1932 воын, мöд курс помалöм бöрын, ён да пельк зонмöс ыстöны велöдчыны танкөвöй техникъяслön Москваса школаö. А куйм во мысти том офицерöс мöдöдöны Казахстанса степьясö торъя тöдчанлуна отрядлön технической часьт кузя командирлы отсасысьöн. Тадзи Öнтонпиысь петлöм крестьянскöй зонлы вoссис тыдавтöм фронт



Н.М.Титов. 30-öд вoяс.

вылын службаыс. А сэсса бара велөдчö Москваын, Шөр спец-школаын...

Öтчyd сійöс корисны управлениеса начальник дінö. Николай Титов мөвпыштліс, гашкö, рапорт кузяыс, көні корис удж ас-лас медтöдчана специальносът серти — оборонной техника да автомашина кузя техникөн. Сьöд öдзöс дорö матыстчигөн кыс-кыштіс гимнастёркасö, лöсьöдыштіс тасмасö. Ыджыд кабинетын вöлі рöмыдкодъ: öшиньяссö вевттьöма штораясөн. И нöгыль ру моз гөвкъяліс табак тшын. Вöлі водз асыв. Пызан сайö мышкыртчöм штатскöй паськöма морт корис пуксьыны. Пызанывса лампа биыс кучкис Титовлөн чужöмö, но сійö эз кунь синсö, а видзöдіс веськыда. Управлениеса начальник кы-пöдіс Титов вылö узьтöмысла мудзöм синъяссö, стрöг да сöстöм гөлөсөн шуис:

— Тіянлы, старшöй лейтенант, ковмас мунны командиров-каö, Англияö...

И ланьтіс. Чöв-лөнныс кыссис дыркодъ. Сэсса управлениеса начальник небыдджык гөлөсөн нин шуис:

— Ті бура пöртінныд миянлысь индöднымöс Прагаын, тіян эм бокын олігөн кутшöмсюрö удж опыт. Тöдмаси рапортнад. Сійö личной делöаныд. Локтанныд командировкаысь, сэки и сёрнитам. Мыйкö көсьяанныд юавны?

— Ог.

— Зэв бур. Сідзкö, колö дасьтысьны туйö. Торъя индöдъяс сетас отделса начальник.

Кыкнанныс чеччисны. И кыкнанныс воисны ёрта-ёртыслы сьöлöм выланыс...

Москвасянь Берлинö поезд муніс сёр войын. Колльöдысьыс эз вöв уна. Мунысьыс сідзжö. Гашкö, сы вöсна, мый регыд нин воö вöлі Виль во да быдөн көсйис пасйыны сійöс гортас.

Варшаваын таркөдчисны сылөн купеö. Öдзөссö восьтöм бö-рын Николай аддзис мортöс, кодöс бура тöдліс Прагаын на олігөн. Но проводниккөд орччөн сулалігөн сійö зілис петкөд-лыны асьсö бокөвöй мортөн. Кор поездыс вөрзис да содтіс öд-сö, «тöдтöм ёртыс» мөдөдчис вагон-ресторанö. Сы бöрся регыд мысти муніс и Москваысь пассажир. Прагаса тöдса пукаліс торъя пызан сайын да лыддис газет.

— Менö шуöны Стивенсонөн... Джордж Стивенсон. Уджала «Лувр» паракод вылын, коді ветлö Ла-Манш кузя. Кор воан-ныд да лöсьöданныд йитöдъяс, пыралöй морякъяслөн «Парус» клубö, коді Пикадилли площадь вылын. Сэні и аддзысям.

Найö корисны сёйны. Сöмын öні Титов сюсьджыка видзöдліс аслас ёрт вылö: мичаник чужöма, вöсньыдик уска, öкуратнöя сыналöм юрсиа. Пасьтасьöма иностранной моряк моз, кор найö петавлöны берег вылö шойччыны.

Брюссельын Джордж кутіс асьсö аслас керкаын бур көзяин моз — мунігмозыс чеччыштліс трамвайö, котөрөн петавліс сэт-тысь кытчö колö, кыскыліс ас бöрсяыс и Николайöс. Тадзи кот-равны налы эз вöв сьöкыд, öд көлуйсö колисны гостиницаö. Портö воём бöрын Стивенсон кытчөкö вошис, корис сöмын виччысьылыны. Бöрсö воис эз öтнас — том нывбабакöд.

— Тöдмасьöй, Николай, тайö — Луиза. Лондонöдз тэнад ёрт. Титов шензьыштіс: Джордж медводдзаысь шуис сійöс ним

сертиыс тöдтöм нывбаба водзын. Сідзкө... сійö миян морт. (Бö-рынджык нин Лондонын тшöкыда пондас аддзысьлыны Луи-закöд. Найö кутасны ёртасьны...)

...Британия королевстволөн медыджыд карын сулаліс руа да зэра поводдя. А сэні, кытысь сійö воис, трачкакылісны кö-дзыдъяс. Сьöкыд бокöвöй мортлы, кор он тöд странаалысь кыв-сö, ветлöдлыны кар кузя. Но колö вöлі тöдны сійöс зэв бура да велöдчыны ветлöдлыны колльöдысьтöг. Регыд мысти нин Николай лоис ас мортөн Лондонса уличаяс вылын.

Ведомствоын, кытчö воис Николай, сэтчöс веськöдлысьыс висьталіс, мый колö вöчны:

— Англияын олігөн тіянлы ковмас тöдмавны дзик ставсö, мый йитчöма фашистскöй Германиякöд. Тіян лооны стöч могъ-яс. Сёрниыс мунö йитöдъяс лöсьöдöм да юөръяс ас кадö мөдö-дöм йылысь. Миянлы колö ас кадö юөртны Центрö ставсö, мый йылысь найö көсйöны тöдны. Тіянлы сетасны автомашина, лоасны явкаяс да агентъяскöд аддзысьланінъяс.

...И Николай Титов пондіс уджавны шоперөн «Бьюик» вы-лын — тайö машинасö бура тöдмаліс танкөвöй школаын велöд-чигөн на.

А кык тöлысь мысти вöлі «Парусын» аддзысьлöм. Англий-скöй морякъяслөн клуб — аслыссикас гажöдчанін: пызанъяс сайын пукалісны уна сикас сёрниа, уна Енлы эскысь войтыр да гажаа сёрнитісны ас костаныс.

Николай Титов тані пыр жö лоис асөн. Неуна гажа, са кодъ сьöд чужöма кык зон пуксьöдісны сійöс асланыс пызан сайö. И друг, быттö му увсьыс, тыдовтчис Джордж. Тыдалö, сійöс тані тöдісны. Стивенсон вöлі тöргуйтан флотса моряк формаа, дзик иностранеч кодъ. Көть эськö Титов зэв бура тöдіс, мый тайö зонмыс Калугаысь, водзтіджык бокс кузя военнöй округса чемпион, сэсся Москваын иностраннöй кывъяс институтса сту-дент. Бура сёрнитіс уна европейскöй кыв вылын.

Сур неуна юыштöм бöрын Николай да Джордж мунісны орчча жырьö, көні эстрада вылын петкöдчис Шотландияысь сьылысь. Джордж висьталіс Титовлы, мый неважөн проливöд мунісны нель тöдтöм судно, военнöй грузөн. Кыдзи лои тöдса, судноясыс мөдöдчисны Севернöй мореса діяслань, кодъяс вö-ліны Германия киынöсь.

Клубысь петöм бöрын найö прöйдитчисны матысса уличаяс кузя. Öтиын на пиысь Стивенсон индіс ичöтик кафелань да шуис:

— Мөд аддзысьлöмыс лоас тані. Тэныд висьталасны, кор локны.

Торйöдчигөн топыда кутлісны ёрта-ёртлысь кияссö. Ас ордас локтöм бöрын Николай тöдмөдіс юөрнас ассьыс веськöдлысьсö. Тадзи заводитчис военнöй разведчик Титовлөн службаыс госу-дарствоын, көні сылы ковмис овны эз öти во.

...Со мый та йылысь висьталіс мекöд аддзысьлігөн полков-ник Виктор Бочкарев:

— Николай Михайловичлы зэв сьöкыда сетчисны сюрс öк-мыссö нелямынöд вося июль, август, сентябрь тöлысьяс, кор фашистъяслөн авиация быд лун бомбитіс Англия да сылысь юркарсö, Лондон. Титовлы ковмыліс пöртны олöмö оперативнöй индöдъяс бомбаяс взрываютчигөн. Но Николай кутіс асьсö повтöг.

...Өтчүд сійөс корис шеф. Тайö пöрийö эз кут нинöм кывзыны, а пыр жö шуис:

— Колö кад воштытöг ветлыны миян агент дорö бөръя юөръясла. Тадзи тшöктіс Центр.

И друг кутісны омлявны сиренаяс, кусі би, матысса керка-ясысь йöзыс уськөдчисны бомбоубежищө. Лондон весьтö öш-йисны немецкөй бомбардировщикъяс. Пондісны потласыны бомбаяс.

— Лэдзöй пöртны олөмө ассым могөс!— шыөдчис Титов.

— Мун, виччысьны оз нин позь. Часөн-джынйөн мысти юөрсö тэныд ковмас нуны портö.

Улича вылас вöлі сап пемыд. Енэжыс югзыліс сöмын бомбаяс потласигөн. Пемыд фараясөн Титов ыджыд öдөн нуөдіс машинасö кар асыввывлань. Но кык квартал мысти туйсö потшисны военнöй жандармериялөн машинаяс. Ковмис бө-рыньтчыны да уйкнитны мөд уличаөд. Машинаыс, позьö шуны, веськыда лэбис. Но друг юр весьтын эрөстіс немецкөй бомбардировщик. И бөрын, и водзын кутісны потласыны бомбаяс. Титовлысь «Бьюиксö» качөдліс вылө. Век жö машинаыс колис дзоньөн.

Но сійö керкаыс, көні шуöма виччысьны связнöйлы, эз нин вöв. Вöйöма взрывысь артмөм ыджыд гуö. Но Титовлөн вöлі на мөд адрес. Связнöй кө ловъя, виччысьö сэні. Дас вит минут мысти найö аддзысисны. А нöшта кутшөмкө кад мысти Титов сетіс зэв колана пакетсö... Джорджлы, коді виччысис пирс вылын. Пароходыс буретш лөсьөдчис вөрззыны.

...Колясны вояс, и найö, кык сөветскöй разведчик, паныда-сясны Москваса öти патераын да пондасны казътывны важсö...

...Кызди көть эз зіль вузасян фирмаса веськөдлысьлөн шоперыс, Николс (тадзи шыөдчывлісны Титов дінö ведомствоса мукөд уджалысьяс), велөдны английскöй кыв, уджыс муніс сьöкыда. Шефыс зэв тшөкыда ветлывліс то öтилаö, то мөдлаö, и пыр колö вöлі лоны сы бердын. Но өтчүд Титовс корисны резиденциялөн вылыс судтаö. Ыджыд кабинетö пырөм бөрын сійö аддзис мичаник том нывбабаөс. Шеф шуис Титовлы:

— Тайö мисс Гретхен, английскöй кыв велөдысь, кутас тіян-көд уджавны вежоннас куимысь. Кад йывсьыс öні сёрнитчам,— сэсся английскöй кыв вылын шыөдчис нывбаба дінö. Недыр сыкөд сёрнитыштөм бөрын бара Николайлы:— Лункосмөсөн сійö кутас воливлыны көкъямыс час асыв кежлө. Корö, мед энö сөрмөй.

Со тадзи, көть и сьöкыдпырысь, заводитчисны английскöй кыв урокъяс. Öтчүд веськөдлысьыс шыөдчис сы дінö английскöйөн:

— Рыт кежлас машинаыд лоас дась?

— Да, сэр, тіян машинаыд век дась петны туйö.

И кыкнанныс нюммунісны.

А сэк кості кутісны воны юөръяс, мый Германия чукөртö ынъяс асыввыв граница дорö. Мыйла? Колö вöлі пыр жö төдмавны...

Öтчүд Николай, коді оліс медводдза судтаас, буретш лыддысис. И друг сылөн юр весьтын öзйис сигнальнöй лампа. Жырийö пырис шеф, корис ас дінас Титовс:

— Петалам, сёрнитыштам ывлаын.

Неыджыд беседкаын сійö сетіс аслас шоперлы кабала лист, кытчö вöлі гижöма куим кыв: улица ним, керка номер да агентлысь ов.

Николай довкнитіс юрнас, мый позьö идравны кабаласö. Гижöдторйыс йиджтысис юр вежöрас. А та бöрын кыліс:

— Ковмас мунны подöн. Аддзысянныд аттракцион дорын, коді керкаыслы паныд. Тэ кутан сёйны со тайö паньнас шоколаднöй мороженöй,— и шефыс кыскис зепсыс ичöтик пань.— Сылön лоас татшöм жö. Сійö тэнад арлыда. Съöd юрсиа. Кольк-виж туплиа. Тэныд сэні колö лоны дас сизим часын. Öні дас куим час. Сійö тэныд нинöм оз висьтав. Колö, мед ті тöдінныд öта-мöднытö. А мöд аддзысьлöм дырйи сійö юöртас содтöд, мый колö. Став бурсö!

Аддзысьлöмыс съöd юрсиа мортыскöд муніс бура. Водзö найö кутасны аддзысьлывлыны кафеын, кодöс индас Джордж. Ачыс сійö дыр на оз лок. Кыдзи бöрас тöдмалас Титов, Стивенсон муніс буретш сійö странаас, код йылысь найö көсйисны унджык тöдмавын.

А кадыс пыр матыстіс ыджыд войналысь пöжарсö. Агентъ-яслön юöръясыс лоисны майшöдланаджыкöсь. Татшöм юöръяс пыр жö мöдöдлісны Центрö. А Центр көсйис тöдны пыр унджык...

И со сюрс öкмыссё комын öкмысöд восянь, кор пансис Мöд мирöвöй война, кадыс матыстчис сюрс öкмыссё нелямын öтиöд волань. Гитлеровскöй разведка быд ногыс зілис паськöдны лöж юöръяс. Но миян разведчикъяс гөгöрволісны враглысь ворсöд-чöмсö да уджалісны зэв стöча. Лондонын сідз жö муніс ас-лыссикас война, но сöмын пушкаыстöг да танкъястöг.

\* \* \*

...Сійö тулыснас Лондон гөгöрын зэв ёна дзоридзалісны каштанъяс. На вылö видзöдігөн позис чайтны, мый некön некутшöм война абу. Но сійö муніс. Öти гуся патераын Титов медбöръяысь аддзысьлас эсійö съöd юрсиа мортыскöд. Торйöд-чигөн найö пöся кутчысьласны — сöветскöй разведчик да британскöй салдат-антифашист.

Тöлысь мысти Николай Титов воас Москваö. Öти праздник дырйи наградитöмаяс лыдын казтыштасны и сылысь овсö. Кывкутана мог олöмö пöртöмысь Николай Титовлы сетасны Краснöй Звезда орден.

❖ ❖ ❖

## Пулемётчик Ветшеслав

БАТЬЛӨН КАЗЫТЫЛӨМЪЯСЫСЬ

Чужлі Ыджыдвидз сиктбердса Джиян грездын. Сэтчөс йө-зыслөн овъясыс — өти кийсы чуңьяс тырмөны: Поповъяс, Павловъяс, Ивановъяс, Игушевъяс.

Ме Попов жө. Рөдным Анна Иван Пилесянь (сідзсө гижсыылөма Порпирийөн) воссьө. Пилеыслөн вөлөма нель пи — Пиле Митрей, Пиле Епим, Пиле Васька, Пиле Порө, да кык ныв — Пиле Сандра, Пиле Васса. Ме Пиле Васькалөн. Налөн Олеш Катякөд чужлөма сизим челядь. Медыджыдыс Ветшеслав жө. Кувлөма дас нель арөсөн. Сэсса Агния да Степан, коді водз кувсьылөма. Сэк челядьыс ёна вөлөм кулөны. Сэсса бара зон чужөма, Степанөн жө шулөмаось. Вошли фронт вылын нелямын өтикөд воө, октябр төлысын, кызь арөсөн. 1940 воын мунліс служитны армияө, да первой война өзьян лунсянныс и ковмис пырны врагкөд тышө. Медбөръя письмөсө гижліс юннын.

Степан бөрын чужи ме, Вечеслав, ме бөрын чужліс Василей, но эз дыр ов. Батьө эз жө дыр ов, куліс 1927 воө 41 арөсөн.

Епим дядь (кувсьыліс 1954 воө 72 арөсөн) да батьө вөлөм кужөны гын сапөг вөчны, вурсьыны. Кык вок ёна ветлөмаось бокө најөвитчыны. Йөзыс висьтавлісны, пыр пө уджалісны, весиг пө сөйөны вөлі уджалігмозыс. Сідзи зільомнас тырмана овмөсаось вөліны, да та вөсна и кулачитісны кыкнаннысө. Мый вөлі керкаас көлуйыс да скөтыс, ставсө мырддисны Епим дядьолысь, а асьсө вөтлісны керкасыс. Миян батьө эз нин вөв ловъя, но ставсө жө мырддисны да вузалісны. Но Пиля Петыр Осип, коді сійө кадас вөлі сиктын избачөн, грамотнөй морт, гижис власьтяслы шыөдчөм, мый неправильно кулачитөмаось, и деньгаөн бөр сетісны, дерт, эз ставсө. Көзяиныс пө эз нин вөв ловъя да оз вөлөм позь сійөс кулакавнысө.

Меным вөлі ар квайт... Көлуйнымөс вузалөны колхоз правлениеын, миян керкалы воча стрөйбаын. Керкаыс Епим Якөлөн вөлі. Гөтырыс, Сандра тьөтка, батьөлөн чой. Найөс сідзжө кулачитісны, керкасыс, вөлі зэв ыджыд, кык судта, вөтлісны, и лои сэні колхоз правление. Вот сэні и вузалөны миянлысь көлуйнымөс. Ми, челядь, сэні бергалам, видзөдам вузасьом вылас. Лэптас вузалысьыд пальто, чышгьян, мукөд көлуй да шуас донсө. Ичөтөс, дерт, коді донасө ньөбас. «Кызь чөлкөвөй!» — горөдас, да ньөбысьыд пыр и петас, а мөдыслы колө жө донтөм вузөсыс: «Кызь өти!» — горөдас.

---

Вузасьыс: «Кызь өти — раз, кызь өти — два!» Оз кө некод донсө водзё кыпөд, сылы сетны, коді вөзйыліс кызь өти шайтсө. Но коді шуліс кызь шайт, сійө бара горзё: «Кызь кык!»

Овліс, мукөд көлуйсө индөм сертиыс дас-дас вит шайт выло водзё кыпөдасны. Дозмук кык шайтсёнь дасөдз кыпавліс. Вот тадзи и вузавлісны миянлысь мырддьөм көлуйнымөс. Керка эз вөрзёдны, но кык жытник куштисны, нуисны гөбөчысь картупель, кык мөс да кык вөв чаньнас нуөдісны. «Зингер» вурсян машина удитөма мамө шыбитны лым пиө, да бөрас дзевим, мөдөдө гуавлім. Колисны морт өтик паньон да кык тасьті. Öти сюртөм чайник виддалісны-виддалісны, да нуисны жө. Та выло пө öти шайт на, колөкө, сетасны. А Поди, ачыс тшөтш коммунист, гөн перина аслыс кольөдіс, но сэсся петігас нин шуис: «Тайө Степан братөлы». Степаныслы сэки вөлі өкмыс арөс. Бөрас висьтавлісны, Ыджыдвиддзын сельсөветса предыс пө шензё вөлі: «Та мында көлуйсө ме некодлысь на эг аддзыв».

Уна и вөлі миян көлуйыс. Чышъяныс кымын пөлөс, дөрөма-паськөма көлуйыс, көр ку паськөмъяс да уна-уна мукөд новлантор.

Но кызди пасйылі нин, Пиля Петыр Öсип, сиктса избач, гижөдъяс коланаинө мөдөдаліс да неуна деньгаон бөр сетісны. Сэки вөлі нин колкоз, мамө пырис сэтчө да öти мөссө да чаньсө бөр сетісны. А кык вөв да мөс колкозө коли. Зэв өд тешкодь вөлі миянлы, челядылы, видзөдны. Кутшөмкө семья кө пырө колкозө, вөвсө и телегасө вайөдө правление дорө. А сэнi век зэв уна мужик чукөрмасны да горзөмөн вежөны вөлыслысь нимсө. Öтка олігад өд вөв нимыд: сьөд кө — Воронко, гөрд кө — Рыжко, карөй кө — Серко, пегана кө — Пеган. И быд семьяын тадзи. А колкозад чукөрмө дас Воронко, сы мында жө Рыжко, Серко. Быть выль нимъяс колө индавны. Пуктөны мужикъяс вөвлы выль ним: «Но, братөяс, мый нө нимсө пуктам?» — юасьö колкозса председатель.

Кодъяскө горөдасны: «Няр!», «Мөгö!», «Лёзь!» — мужик чукөр серөктөны.

Председательлөн медбөръя кыв: «Пуктам «Пролетарий». Сі-дзи и нимтісны. Он өд паныд предлы мун.

А Ыджыдвидз колкозын öти вөвлы пуктөмаөсь «Большевик» ним, но вөлыс вөлөма зэв дыш, мукөддырийыс оз весиг вөрзы, доддяласны да. Кодлы вөвсө наряд сертиыс сетасны, горзө, плеть-нас швачкөдө: «Но-о! Сөтана-а! Тайө «Большевиксьыс» тай он нин мынлы!» Неуна тюрьмаө öтиөс абу пуксьөдөмаөсь тайө кывъяссьыс. Сэсся вөлыслысь нимсө вежасны, «Лодыр» пуктасны.

Ми колкозө пырим Епим дядь бөрын. Сійөс тшөтш кулачитісны. Сылысь ставсө мырддьөмаөсь, нинөм абу кольөмаөсь. Керкасө öти судта тай кольөмаөсь жө. Ми, челядь, ичөтсёнь агсасим вөлөн. Вөлі нель бригадаа колкоз, нимыс «Комсомол». Водзджык эськө «Ленин» пуктылөмаөсь, но вөр лэдзан план абу ыртөмаөсь, да нимсө колкозыслысь вежөмаөсь. Большелут сельсөвет улын вөлі: Джиянын — «Комсомол», Ыджыдвиддзын — «Гөрд Октябрь», Макарсиктын — «Красин», Выхыбын — «Фрунзе». Зулөб сэк вөлі пырө Богородскө, колкоз нимыс — «Ударник». Кор 1950 воө ставсө öтлаалісны, лои Ленин нима колкоз.

Велөдчыны пыри квайт арөсөн. Сійö воас прөстө пукалі, кыдзи вольнослушающöй. Сэк вöлі босьтöны көкъямыс арөссянь. Мөд онас сизим арөсөн школьник нин лои. Примитисны, став буквасö нин тöдi, лыддысьны бура кужи. Коймөд классö вуджи. Джиянысь Ыджыдвиддзö куимөн ветлөдлам. Медбөръя урокнас сумка дась нин. Кок пөв — парта сайын. Звöноккөд тшöтш чепөсьям öдзöсöд уличö.

Ыджыдвидзсаысь полам, вöтчасны да нöйтöны. Ме арлыдөн и тушаөн дзоляник вöлі да оз нöйтны, а кыкнан туй ёртöс дiтшкөдасны. Мөд онас унаөн лоим, локтисны менам годокъяс, да ыджыдвидзсаяс эз нин лысьтны ми вылö воны. Менö, бура велөдчи да, вуджөдiсны нельöд классö. Пуксим партаяс сайö, пырис учитель, тöдмасьö мянкөд. Ме вылö видзöдлiс да шуö: «Тэ нö, татшөм ичöтикыс, кыдзи веськалiн нельöд классас, ноко марш коймөд классö!»

А меным нимкодъ, сэнi менам годокъяс, джиянса ёртъяс. Но колисны, эз вуджөдны! Учителыс тöдмалöма, мый ме коймөд классö помалi нин.

Витөд классö вуджөм бöрын мамö нуөдiс Висер сиктö (Богородскö), сэнi велөдöны сизим классöдз. Велөдчи тöлысь джын, локтi гортö вöскресенньö кежлö, да выльлунас эг мун школаö. Но мамö бөр гирилюкиөн нуөдiс школаö да овмөдiс старик гозъя ордö. Сэк öд интернатыд эз вöv. Зэв шаньöсь вöлины пöрысь гозъя, но кор бара гортö локтi, кулитны найöс кутi, мед мамö Богородскас сэсся оз мөдöд.

Миянын унаөн вöлины, да найö эскисны висьтасьöмö, ме дор сувтiсны.

«Эн лэдз, Катя (мамöс Катяөн шулiсны), нöйтасны питö, немортö вöчасны!»

Мамö найöс кывзысис и эз мөдöд сэсся школаö. Недыр мысти вөрö кайи, маркируйтчысьö босьтiсны Биаизъяö. Висер йылын, сё километр сайын, джиянса, сюзяыбса, выльыбса лэдзисны кер. Кер помö öжынөн пасъяла: «Рудстойка», «Пиловочник...» Быд сортиментлөн аслас пас. Тайö вöлі 1936—1938 воясö.

Кор Ыджыдвиддзын лои семилетка, бөр пыри школаö, витөд классö. Зэв унаөн пырысьыс вöлiм. Медводз босьтiсны найöс, кодъяс тулыснас помалiсны нельöд класс. Кык во эг велөдчы, но менö босьтiсны жö. Куим во сэсся велөдчи.

1941 вося юньын том йöз и гырысьяс Ростагъяын ойdlана видз весалiм. Рытнас локтiм удж вылысь, юөртiсны: «Пансьöма Германиякөд война».

Йöзыс шогысла шöйöвошöмаöсь.

«Оз дыр кыссьы войнаыс, колөкö, оз и нулыны татысь некодöс, салдатыс армияс тырмымөн. 1937 восянь нин массövöя нуисны, служитöны на найö», — унаөн эскисны Гөрд Армия вынлы.

Эз тай сiдзи ло, мөд луннас и повесткаяс воавны кутiсны. Август тöлысьö нелямын вит арөсöдз став шогмана мужичöйсö нуисны. А мянöс, 1923—24 воясö чужлöмаясöс, всеобуч вылö кутiсны быд рыт чукөртны. Чуб ю бокын кер лэдзам, лучкөвöй пилаөн-черөн. Ок и кымыныськö сувтла жö лолыштны. Коскöй мудзö. Пу йылас чатөртчыла, видзöда, шатласьö-ö оз на, көть эськö ки вомлөс на и вундöма пилаыс. Удж бöрын локта кө-

тасьома, мудз. Витсё грамм нянь отчыд сёйны и тырмё. Мудз-вывсьыс брут крөватьё да пыр и унмовся. И друг равөстасны: «Подъём, строиться!»

Всеобуч вылынось. Тэрмасьомён пасьтасям да стройё котөрөн, а сэсся лым пиын по-пластунски кыскасям, оружие велөдам, штыка атакаё усьласям. Дас сизим арөсаяс омөльтчим, да сы мында арлыдсё вөлі некыдзи он сет — сьөдось, няйтось. Мыссьыны весиг некөн. Олам тшыгось, коскысь, пельпомьяс вылысь мудз оз личавлы. Төвнас көдзыд, но он кө пет удж вылө, судитасны прогулысь. Тулыснас ещө на лёк лои, лэччөдісны Нам Вомынё пурьясьны и всеобучысь эг мынөй, быд лун велөдоны, война вылө дасьтоны. Оти вөскресенньё кезлө кайлім Висер вожсаяс да одыбсаяс гортө пывсьыны. Лэччим бөр Нам Вомынё, а сэні мянөс виччысьё нин судья. Полевөй суд нуөдісны. Типө сиктысь вөлі зэв повтөм зонка — Степан Иван, 1924 воын чужлөма, воча сөмын и швачкө мянөс видьсыяскөд. Сійөс сэсся и судитісны дас во кезлө. Война бөрас аддзысьлім, лесникөн Типө сиктас уджалө вөлі. Менө пө тюрьма пыдди фронт вылө нуисны. Сэні веськалөма пленө, да пленын война помөдзыс вөлөма. Миянлы, кодыяс чужлім 1924 воын, повесткаыс воис 1942 вося августө.

Воддзадзык повестка вотөдзыс Джиянысь колхозса пред Онопрей Гриша шуө меным:

«Ветшө, ветланныд кө Висерө Микит Митрей моряккөд (сійө вөлі МТФ-са завөн) өшпила, ме тэн сета вит килограмм сю».

Ветлім, вайөдім бычөсө, да сетіс өд сютө. Косьтім тэрмасьомён, изім, пөжалім, и нянь лои фронт вылө мунны. Рытнас Онопрей Гриша бара шуө:

«Ветшө, сводка кө нуан Ыджыдвиддзө, сельсөветас ме тэн лэччынытө сета көрөба телегаа вөв». Ветлі. Варук Модесткөд, сійөс тшөтш нуоны фронт вылө, көрөба телегаа вөлөн лэччим Сторожевскөдз. Иван Иван ямщикаліс. Сійө 1925 воын чужлөма, да эз на босьтны. Нимкодь, лэччам бариньяс моз, а мукөдыс — одноколкаөн. Лэччытөдзыс Джиянын Фома, сійө вөлі сельсөветса председатель, висьталіс речь. Сёрнитігкостіыс уна вөла матыстчисны, помыс оз тыдав. Август 17 луннас воим Шойнатыө, районса юрсиқтысь военкомат дорө, чукөрмим Аныбсянь — Важкуаөдз, Одыбсянь — Джиянөдз став Сторожевскөй районса призывникис. Военком Трофимов висьталіс зэв кузь речь. Помаліс, помнита, тадз:

«Дерт, товарищи, оз ставыс тіян пиысь бөр бергөдчыны гортас, но Рөдинатө дорйыны колө!»

Сідзи и лои. Газетө гижлісны, медся пө уна усины тайө война вылас 1924 воын чужлөм зоньяс, өкмысдас прөчентыс. Отлаын мунысьяс пиысь, сідзкө, быд сө мортысь бөр воисны сөмын дасөн. И збыль, 1924 восяяссө нуисны медся томөн. Майын нуисны 1923 воын чужлөмаясөс, а кык төлысь мысти — арөн томджыкьясөс пароход вылө сөвтөдісны. Миянөс, Сторожевскөй районсасө, сюйисны трюмас. Выліыс вөлі тырөма Кулөмдін районса призывникьясөн. Чечывтөг нуисны Котласөдз. Сөйим сукар, ва гумлалім Эжваысь. Котласө воём бөрын торйөдалісны. Кодөскө Молотовө (өні Пермь), сэтчө и Варук Модест веськаліс. А ме да Джиянысь нөшта кыкөн веськалім Грязовецө, Вологод-

скöй обласьтö. Воим местаöдзыс август 23 лунö. Сувтöдалісны куим радөн, морт витсё кымын чукöрмим. Локтіс начальство, зэв уна офицер, да кытшлалöмөн бöрйöны, кодöс кутшöм часьтö. Видзöда, коді ыджыд тушаа да сизим либö дас класс помалöма, öти чукөрö сувтöдалöны, а этшаджык велöдчöмаяссö — мöдö. Миян весьтö воисны да, чуньнас ме вылö индöмөн öтик юалö:

«Кымын класс помавлінныд?»

Мекöд орччөн сулалöны джиянса да ыджыдвидзса зонъяс. Ставныс помавлісны нель класс. Сэк öд, окота кө вöлі, позис велöдчыны водзö, а дыш кө, мырдөн оз тшöктыны. Сторожевскын позис шөр школа помавны.

Ёртъяскöд абү окота торйöдчыны, да квайт класс висьталі, öти во чинтöмөн.

«Пет стройсьыс!» — веськалі младшöй командиръясöс дасьтан школаö курсантөн.

Велöдчöм помалöм бöрын мöдöдісны пулемётнöй батальонö. Медся ичöt тушанам, стройын медся бöрын сулала. Первойсö весиг пулемётсö нуны оз вöлі сетны. Ичöt пö да оз вермы. «Максим» пулемёт торйöдсьö куим пельö. Щитыс — көкъямыс килограмм, стволыс — кызь көкъямыс, станокыс — комын квайт. Походын öти пулемётсö куимөн, вежласьöмөн, нуöны. Ачым кори станоксö нуыштны. Миян кадö зонпосниыд ичötсянь уджалісны. Мешökъястö дас нель арöсаяс вöлі кыскалам нин, кыпöдасны да. Дас квайт арöсөн вель сьökыд рудзög мешökъяс вартанінысь складö новлім. Вöлөн Висерöдз рудзög и ид поставкаяс магазейö новлім, вылыс судтаöдзыс аслыным ковмыліс катлыны.

Чуймисны, кор кокныда кыпöді пельпом вылö комын квайт килограмма станоксö. Кодсюрöлы öд весиг лэптынысö вöлі от-салам. Пуктісны менö мöд номерөн. Первой номерыс вöлі Вöлөгда обласьтысь Чубаров, зэв дельнöй зон. Ёна ёртасьлім. Быд рыт косялам пулемёт, весалам, мавтам. Öти-кö, требуйтöны, а мöд-кö, öружиелы мытшасьлытög колö уджавны-луйлыны. Квай-тöд луннас батальонö вайöдісны кык коми зонмös. Великой Ус-тюгö среднöй комсоставö велöдчыны кольöдлöмаös, но тырöма лыдыс. Öтикыс Керчомъяысь Иван Тарабукин. Тарабукинкöд дыр öтлаын служитім-ёртасим. Война вывсьыс локтöма ранитчöмөн, дыр уджаліс главнöй бухгалтерөн совхозын. Бөръяпомыс висьмис. Кайлі видлыны 1976 воын. Висьö нин вöлі.

Мöд зонмыс Скөрöдум сиктысь Модест Спиридонович Курочкин. Киас ранитчöмөн локтöма война вывсьыс. Чужан сиктас велöдіс школаын. Сыкöд öти часьтын регыд вöлім.

Тöлысь кымын велöдчöм бöрын менö да ещö кыкös корисны штабö. Пызан саяс пукалісны куимөн. Öти — лётчик формаа. Лётнöй паськöмаыд шуö (званиесö ог помнит) орччөн пукалысь-ясыслы:

«Тайö ичöt тушаа, шогмас стрелок-радистö».

Ёна и виддалісны, шогмам-ö, а сэсся бөр частьö мунім узыны. Садьми асывнас да сійö кыкыс абуйсь, эг и тöдлы садьмöдöмсö, найös нуöмаös, а ме коли. И зэв бур. Гортын керка вевт вылö кайигөн чатöртча да юрöй бергöдчö, а кысь нин самолётын лэ-бавны да лыйсьыны. А найös кыкнансö самолёт вылö босьтö-маös стрелок-радистъясөн. Велöдчöм помассис декабр 15 лунö. Ёна и сьökыд вöлі велöдчынысö.

Ноябр-декабрыс зэв кӧдзидӧсь воисны. Кучик кӧмкотнас кок кынмаліс. Менам нӧшта кокӧй нӧылӧдӧ. Ывлаас ноксям-кыскасям, да рытнас кокӧс сапӧгысь перйигӧн нямӧдыс сапӧгас и кольӧ, кынмӧма. Нетшышта, да кажмунӧ. Водигӧн прӧстыня улӧ сюя, да сзні мыйтакӧ косьмыштас аслам вир-яй шоныдсьыс. Асывнас блин кодъ небыд. Прӧстыня, дерт, нямӧд дука. Велӧд-чигӧн быдсямаыс вӧлі, пукавлі и гауптвахтаын.

1942 вося декабр 15 лунӧ сетісны младшӧй сержант чин, петлицаӧ ӧшӧдісны треугольникяс. Погонтьяс лоисны да, сэки эссыс кык векнӧйдик лычка вури.

Миянӧс, квайт мортӧс, колісны велӧдны курсантьясӧс. Тӧлысь мысти вайисны содтӧд войтыр, 1925 воын чужломаясӧс. А сэтчӧдз пыр пост вылын лои сулавны. Некод пӧшти эз коль, ми квайтӧнӧсь да нель офицер. Штабын нӧшта куим-нель офицер.

1943 вося январын вайисны пополнение, ставныс 1925 восяяс. Выльӧн воысьяссӧ ме велӧді. Тайӧ эз вӧв кокни удж: вывсынь начальство корӧ уна, и ми пыр вӧзйысим фронт вылӧ. Фронт вывсынь, другъяссянь воӧны письмӧяс, гижӧны, кыдзи воюйтӧны, а ми татӧн сӧмын: «Ать-два» да чучелаяс штыкӧн быгшлалам. Зубритӧдам-велӧдам курсантьясӧс. А войся тревогаыс медся сьӧкыд. Курсантьяс мудзӧсь, унмовсьӧмаӧсь садьмӧдны позьтӧмӧдз. Менӧ, Клыков Толяӧс да нӧшта ӧти лейтенантӧс, взводнӧй вӧлі, индісны салдатъясӧс фронт вылӧ дасьтан ротаӧ. Ротасӧ шӧри юкисны. Ӧти джынсӧ — взвод — мен сетісны, а мӧдсӧ Клыковлы. Лейтенант ротанас ставнас командуйтӧ. Мунім поездӧн Воронеж дорӧдз. Взводъяссӧ бара юклісны. Меным сетісны отделение. Кодйим окопъяс, землянкаяс. Ыджыд тышыс сзні эз вӧв. Самолетъяс да дальнобойнӧй артиллерия сӧмын и дӧзмӧдчӧ лун-лун. Коркӧ юль заводитчигӧн бара петкӧдісны туйӧ, эз висьтавыны кытчӧ. Кывсьыны кутіс, Донбасс дорӧ пӧ. Воим Донбасс дорас, сзні висьталісны, коймӧд лун нин пӧ мунӧ чорыд тыш. Немеч сюрнас и гыжнас кутчысьӧ, оз кӧсйы карсӧ сетны. Ми ставным комсомолецъяс, веськалім гвардейскӧй батальонӧ, кӧні лыда морт нин и кольӧма.

Фронтлань матыстчӧм бӧрын висьталісны: «Тіянлы паныд эсэсовецъяс сулалӧны». А таӧдз кывлім нин: найӧ медбӧръя здукӧдзис водзсасьӧны и пленӧ оз сетчыны.

Лунтыр пӧшти мунім, жар шонді югӧр улын. Туй вылас и бокъясас куйліс лыдтӧм шой, ставыс немечьяслӧн, миянлысь идралӧмаӧсь нин, дзебӧмаӧсь.

Менӧ индісны пулемётнӧй расчӧтӧ командирӧн. «Максим» пулемёт расчӧтлы быдӧнлы ӧшлісны муртса нуны вермана груз: пулемётгысь да личнӧй оружиеысь кындзи, тшӧтш и противотанкӧвӧй гранатаяс. Ӧдва и восьлалам сэтшӧм жар шонді улас.

Кад кольӧм бӧрын чайта: миянӧс тайӧ бояс суйисны тӧлктӧг, кужтӧм командиръяс. Войнас и тшукӧдісны немеч оборонаас. Эг тӧдӧй, кытысянь-мый виччысьны, да том боецъясысь пӧшти джынсӧ воштім, а немец эз и вӧрззы окопъяссьыс. Мӧд луннас найӧс позсьыныс чеччӧдім да нелямын километр бӧрынтьчӧдім. На бӧрысь бара этш петмӧн вӧтчим тайӧ нелямын километрсӧ.

Дыр-ӧ кӧ кад воюитыштӧм бӧрын веськалі Воронежскӧй фронтса штабӧ, охранный отделениеӧ. А вежон мысти бара бойӧ

пыртөдiсны. Дерт, штыкөвöй атакаö эг петавлы, пулемётчикъ-яслөн мөдджык уджыс — шырны врагöс «Максим» донавтөдз. А кодъяс штыкөвöяс петöны, öтлаасясны немечыскöд да сöмын горзём-ойзём и кылö. Кодi ранитчöма, кыссьöны миян расчёт дорö, рочөн горзöны, мед ог лыйöй. Асьтö кызкö öд колö спаситны. А ми сöмын öзтам, ваыс кожухас весиг пуö, стволыс до-налöма да.

1943 вося сентябр 7 лунö, пемдём бöрас, зэв гусьөн ма-тыстчим Сталино (Донецк) кар дорö. Километр вит эг воö, ви-дзöдам, карыс дзоньнас сотчö. Войнад зэв бура тыдалö. Кык час войын, сентябр 8 лунö, качис ракета — тыш вылö сигнал. Петiм атакаö да зурасим зэв джуджыд траншеяö. Судтаыс куим метр, пасьтаыс квайт. Уджалыштöмаöсь тай, мед танкъяс оз прöйдитны. Кутшöм нин танк, ми и то öта-мöд вылö кайöмөн да кыссьöмөн вуджим. Карас пырим, да он гөгөрво, кодi кодöс лыйлö. Кар мөдар боксянныс, вөлөм, кутшöмкö полк локтöма отсөг вылö. Ми, отделениеөн, торъялим йöзсьыс. Öти керка дорын öшиньöдыс чечыштіс ар комына мужичöй.

«Эн лыйö, другъяс!— рочөн горзö.— Ме нинём ог гөгөрво, кытчö веськалі. Пышйи!»

Кодысь пышйöма, сідзи эг и гөгөрво. Ветліс сэсся кытчöкö да таз тыр сёян вайис. Миянлы ичöt делö, кодi сійö да кытысь пышйöма. Карсьыс сэсся мортöс эг аддзылöй, ставныс дзевсьö-маöсь. Пырим öти керкаö, шой кодьöдз мудзöмаöсь, узьтöмöсь. Унмовсим да пöшти сутки джын узим, эз ков и видзысь-часөвöй. Садьмим, петiм, мунам. Көнi пö и батальонным, Енмыс тöдö. Восьлалам, видзöдам, горзö-котöртö дядьö.

«Поссö энö вуджöй, минируйтöма, и эсійö трубасьыс васö энö юй, мыйкö сэтчö немечьяс кисьталісны!»

Аттöалiм дядьöсö и кытшовтім поссö, а юны, горш эз косьмы да, некод юкмöс дорас эз и матыстчыв. Аддзим öд ассьыным батальоннымöс. Но мöд луннас бара торъялим, кутшöмкö сикт босьтём бöрын, кынёмным сюмалö да, öти керка дорö мунiм. Öшиньöдыс видзöда керка пытшкас. Кывъя часi стенсьыс син улö уси, öтарö-мөдарö кывйыс катласьö. Öнi на помнита: кык час нелямын вит минут. Öшинь улас көбрег. Сэнi став сёянторсö видзöны. Лэччыліс кодкö миян пиысь, но нинём пö абу. Керка пытшкас нинём жö сёяныс абу дай морт оз тыдав. Петiм, ог тöдöй, кодарланьö и мунны. Сизимён, станкөвöй пулемөтаöсь, тажъясям-кыскасям. Кутшöмкö салдат чукөр суödіс миянöс. Чай-тім — миян батальонса. Бокөвöйяс вөлöмаöсь. Батальонса коман-дирыс и шуö ок скöрысь:

«Ноко, командир отделения, воы татчö, доложит, кутшöм батальонысь?»

«Третейысь».

«Ещö кө торйöдчанныд!»— вартіс нагана кобураас.

Йöзыс ставыс тöдтöмöсь. Кольчим наысь да овраг бокö во-дiм.

«Бласлö кристос!— мөвпышті.— Мынім тіянысь да мöдысь мед ог паныдасьöй».

Вывлань, оврагланьыс видзöдлім — немечыс кыксё—кыксё ветымын воськов ылнаын. Öти миян вылö весиг чуньнас пет-

көддiс. Мыльк сайö дзебсим. Эг и тöддöй, миян дорö кыссьöмөн ротаысь воис лейтенант-узбек:

«Тi нö кыдзи татчö веськалiнныд?»

Висьтасим, мый муртса мöд батальонö эг веськалöй. А ме лейтенантыскöд лöсъялi. Лейтенантыс зэв радейтлiс разведкаö ветлывлыны и век трофейнöй сигаретөн гöститöддiс менö. Көть и эг куритчы, но босьта, öзта да пöляла тшынсö. Öнi разведкаö жö петöма да миян дорö веськалiс. Висьталi: немечыс, мися, миян дортi мунiс, но весиг öти пуля эз лэдз. Узбекыд висьталiс, көнi батальонным:

«Тi мунöй, ме нöшта кысъялышта».

Мунам, пемдiс нин, нинöм водзысь оз тыдав. Матысмим батальон дорö, а сэнi зэв чорыд тыш мунö öнтая, миян дортi мунöм немечьясыскöд. Ми тожö кутiм стрöчитны пулемётысь. Войнад, пулемётөн лыйлiгөн, биыс ылисянь тыдалö. Кыдз тай сетiсны миянланьö «Катюшаысь» залп. Миян, пемыднад, пырсьöма немеч тылö, со и сюрим би улас. Эз тай ков дыр мöвпавны, пыр и гөгөрвоим, мыйын делöбис, да пышйим боклань сiйö местасыс. Друг кылам, автомат сяркнитiс и вöв шкоркнитiс. Кыссим сыланьö. Вöв куйлö, чужъясьö, а салдат ськöд рочөн сёрнитö. Ас йöз дорö, сiдзкö, воим. Матыстчим, юалам, мый лои:

«Ме кавалерист. Вölöй кутiс турун йирны и автоматö инмöдчис, а сiйö боевöй взвод вылын вölöма... Со тай мый лои!..»

Ми водзö мунам, ассъыным батальон корсям. И аддзим öд! Командирным абу нин ловъя, да миянös некод весиг эз вид вошлöмысь. Узбек-лейтенантыс локтiс да эз жö удтысь, быттö пыр асланым батальонын вöliм.

Матын, висьталiсны, Михайловка ыджыд сикт. Öтчыд войнас квайтөн мунiм разведкаö, тöдмавны, эмöсь-ö сэнi немечьяс. Матыстчим, öтияс шуöны, сикт помöдыс пö пырам, а ме налы паныд:

«Засадасö век сикт помас сувтöддöны», — командирыс ме, да кывзысисны. Пырим сиктас шөрöдыс. Эгö на мунö и кыксё воськов, веськалiм автомат би улö. Зэв öдйö, некодös воштытöг, пышйим сэтысь, колöкö мыйтаөнöсь сэтөн. Тöдмалiм, мый сиктас немеч, а главнöйыс, — некод эз усь и слава богу. Сораси ме сэки. Унаысь на удайтчылiс ветлыны разведкаөн.

Фронт вылын медъяна эг радейтлы самолётсянь бомбитöм. Войнас ещö лэдзас югдöдан бомба. Зэв ньöжйö лэччö парашютөн, гөгөр югыд, лунын кодь. А луннас самолёт-разведчик, «рамаөн» шулiсны, лэбалö. Оз лыйлы сiйö, кыйöдчö, корсьö миянös — танкъяс, пушкаяс... Аддзас кө мыйкö, пыр и бомбардировщикъяс миян юр вылö локтöны. Ми, аддзам кө «рамасö», куйлам вөрзöдчытöг. Пулемётным — ньөрйөн, лыс лаптөн вевттöма. Вывсянь — ми абуöсь.

Кор ковмылiс бöрыньтчыны — нöшта на лёк. Помнита, öтчыд пышйим немечысь. Вöвъясысь весиг огö кольчöй, сiдз котёртам. Бур, мый этшаысь сiдзсö сюрлi котравны. А сэки пулемётным эськö коли нин, да нöшта и джын йöзыс часьтысь усыны тышас. Дзик ныр улöдзыс сибöдiс немечыс миянös. А разведка воöма да висьталöма, мый кызь километр сайöдз пö некод абу. Збыль вылас нель километр ылна и мунiм да со веськалiм. Велöдiсны тай миянös «сюсь» разведчикъясыд. Гымгыны кутiс-

ны став пӧлӧс ӧружиенас. Лун кодъ югыд лои лыйсян бисъыс.

Ставсӧ он вермы висътавны, быдсямаыс вӧвлі. Уна ӓрт менам уси. Мукӧддырийыс бокад мунысьыд шляпмунӧ-усьӧ, ойӧстнысӧ оз удит.

Ӧтчыд миянлы колӧ вӧлі вуджны кӧрт туй насып. А насып саяс немечьяс вӧлӧмаӧсь. Водӧмӧн вӧляникысь воӧдчим насып вылӧдзыс, водзӧсӧ... Коді чеччас, сійӧ и шняп усьӧ. Век жӧ вӧтлім найӧс кӧрт туй дорсьыс, кӧтъ уна ӓртӧс воштім, пышйисны.

Донбасс дорын, колкоз муяс вылын, яблӧк пуяса кузь да паськыд садъяс шылькнитчӧмаӧсь. Матыстчам сэтчӧ. Друг садсьыс ыджыд ӧд вылын легкӧвӧй машина немечьяслӧн пызйыштіс. Шензӧмла да виччысьтӧмла нинӧм эг удитӧй вӧчны, сы ӧдъя усьйисисны яблӧг гусявлысьясыд.

Ӧтчыд миянсянь бура тыдалӧ немечьяслӧн оборонаыс, но найӧ ни ми огӧ панӧ косьсӧ. Видзӧдам, матыстчӧны дас кымын бомбардировщик.

«Нырасны ӧні миянӧс», — майшасям ӓртъяскӧд.

Но самолётъяс воисны немеч оборона весьтӧдз да кыз тай кутісны бомбаяс чӧвтавны. А миянлы нимкодъ, мый сорассисны, ассьыныс йӧзсӧ виӧны. Фронт вылын татшӧмторйыс тшӧкыда овліс. Ӧтчыд шойчигӧн муні орчча подразделениеӧ тӧдса дорӧ, миянсянь метр сӧ ылаӧ. Варгам-сёрнитам быдтор йывсьыс. Пукалі минут кызь кымын да бӧр мӧдӧдчи. Эг на вудж и джын туйсӧ, снаряд на дорӧ уси. Уськӧдчи бӧр сэтчӧ видзӧдлыны, мый лои. Матыстчи, а сәні некод абу ловъя, шӧракостаныс снаряд чашмунӧма. Мӧдысь, орчча отделениеысь пулемётчик пулемёт станоксӧ пельпом вылас кыпӧдӧ, а ми неыліті мунам, снаряд веськыда сы дорӧ шняпкысис. Морттӧ взрывнас ылӧ-ылӧ ӧтарӧ шыбитіс, пулемёт станоксӧ мӧдарӧ. Фронт вылад он тӧд, кӧні смертьыд кыйӧдчӧ.

Воны кутім Днепр ю дорӧ, миянӧс ыстісны водзӧ дозорӧ, а батальон километр куим сайын бӧрын локтӧ. Видзӧдам, шалаш кодъ тыдовтчис. Матыстчим — пывсян ыджда керка. Пытшкас — шы ни тӧв, восьтім ӧдзӧссӧ, а сәні кык зон, ар кызяӧсь, пукалӧны, немеч паськӧмаӧсь.

«Рочьяс ми, паськӧмсӧ пасьталім, мед немечыс, воасны кӧ, асланысӧн чайтасны да оз лыйлыны, пленӧ оз нуӧдны».

Ме ӧти салдаткӧд мӧдӧді найӧс штабӧ, сәні мед разбирайтчӧны. Днепр таладорас кольӧма немеч часть, миянлы, пулемӧта кык отделениелы, тшӧктісны потшны налы туйсӧ. Мунам индӧм местаӧ, лӧсьӧдчам найӧс паныдавны. Куйлам туй бокын, виччысям вель нин дыр, а сәсся коркӧ и мыччысисны. Унаӧн, ыджыд колонна, помыс оз тыдав: и машинаысаӧсь, пехотасӧ танкьяс видзӧны, и вӧлӧн пушкаяс кыскӧны.

Миянлы, дас вит мортлы, сӧмын пехотаыс 100 мортӧн, колӧкӧ унджыкӧн, быдӧн вылӧ воӧ. Найӧ миянӧс казялісны либӧ бӧрынытчан туйсӧ стӧчмӧдӧны, метр куимсӧ эз воны, сувтісны, кутісны чукӧртчыны ӧтилаӧ, мыйкӧ, тыдалӧ, планируйтӧны. Недыр мысти бокыв мӧд туйӧ, веськыдыввлань, кежисны да регыд и саялісны син улысь.

«Вот сволочьясыд, эз татчӧ локны, эськӧ велӧдім!» — зболяӧ миян пиысь ӧти боец. Ог тӧд, чайта миянлань кӧ веськӧдчисны, нырисны эськӧ, танк гусеницяснас ниятас гудралісны.

Пыр этшаджык и этшаджык миян батальонын йöзыс кольö, быд лун чинö и чинö. Менам отделениеын сентябр помын колим кыкөн, а 1943 вося октябр 1 лунö öтнам коли. Чукöртисны ставнымöс, батальонысь — морт комын стройын. Пулемётчикыс на пöвстын кыкөн. Мöдыс Рязаньысь. Тшöктöм воис: не лэдзны таладор Днепр берегас, кутны немечсö пополнение вотöдз. Ми, кык пулемётчик, торйöдчим пехотаысь да котöртим веськыд-вывлань, но миянлысь пулемётнымöс немецкöй наблюдатель, тыдалö, аддзис да восьтис ураганнöй би, юр кыпöдны эгö кутöй вермыны. Мича, шондi луныс лои вой кодь, гөгöр тшын-бус, вит метр сайысь нинöм оз тыдав, муыс сырмö. Рязаньса ёртöй ранитчис. Кöрталi дойсö да тшöктi кыссыны кутшöмкö воронкаöдз. Кыссис, госпитальö веськалис, но ловъя-ö коли, ог тöд.

Немечьяслөн горзöмыс, команда сеталöмыс коркö кылас, да сэтчö и лыйла пулемётысь. А сэсся юрö воис повзёдчана мöвп: «Тадзтö öд ме ачымöс явита», и эг кут сёдас сяргыны. Сэсся быттьö зорйөн вартисны веськыд кокö, снаряд торпыриг кок пöкйöдыс пырöма и петöма. Бинт абу. Рязаньса ёртлысь ранасö кöрталi, пакетöс дзоньнас видзи.

«Мый и вöчны?— мöвпала.— Кыссыны ог вермы, да и кытчö кыссян, кодарланьö? Верма и пленö веськавны...»

Куйла. Коркö шондi лэччигас лыйсьöм лönис. Шум быри, некөн öти лов оз вуджрась. Куимысь горöдi: «Товарищи-и!», но некөн некод оз матыстчы, некод оз шыась.

Синмöй пемыдас велалис. Видзöда, метр сизимдас сайын морт судта кымын бадь куст. Кысси сэтчöдз, öдва вои, водзö кыссыны и сёрни абу, юр садьöй вошласьны кутис: то пемдылö, то югдылö, Сэсся и дзикöдз воши. Кутшöмкö кад мысти бөр садьö вои. Куйлигад дойыс личалöма. Пемдiс. Гожöм, а войыс миян арся вой кодь, нинöм оз тыдав. Друг кыла кок шы. Ляс-кыси му бердас:

«Кутшöм чöртыс бара?»— кывзыся, но локтöны сёрниттöг. Кодъяскö кыкөн дзик дорöдз матыстчисны. Бадь куст пондаыс эз аддзыны менö. Видзöда, немечьяс, разведка либö часьтсьыс кольöмаöсь ю таладорас. Сэтшöм матi мунисны, мися, крукасясны меö. Вой коли, воис асыв. И бара рытланьö шондi лэччыны кутис. Чöv-лөнъ, ни öти морт оз вуджöрт. Друг казяли, телегаа вöла мясянь воськов сё ылнатi мунö. Пукалöны кыкөн, юр лэптi, видзöда, мöвпала:

«Бур йöз али абу?»

Телега вывсяныс казялöмаöсь менö, матыстчисны, öтиыс ар нелямына, мöдыс ме кодь арлыда. Рыжöй уска дядьöйс чеччис телегасыс, матыстчис ме дорö, зэв топыда матькыштiс, эз ме былö, а кодкö былö. Перйис пурт. Гачöс, көмкот гöленьсö шаркнитiс-вундiс, да мен кокныдджык лои. Кокöй вөлöм пыктöма, да гöленьыс топöдö. Лэптiсны телега вылас. Мыйöн вöрзисны, зöркöдöмсьыс садьöс воштi. Вои садьö, пыр на мунам. Воим кутшöмкö хutorö, вайисны, пыртисны керкаö. Сэни морт абу, öшиньясыс стеклötöмсь. Тыдалö, тышыс хutoröдыс мунöма. Водтöдисны джоджас, асьныс мунисны. Час джын кымын мысти локтiсны кык ныв, ме кодь кымын арлыдаöсь. Нимкодь лои сьölöм вылын, ас коддьöмыдкöд тай гажаджык. Пызан вайисны, лэптiсны пызан вылас да кокöс видлалöны, а кокöй дубалöма,

дойсö весиг ог кыв, быттö оз и менсьым видлавны. Бинтöн рана-насö гартисны да мунисны. Бара öтнам коли. Войнас кодъяскö бара локтисны, гөлöс сертиыс — нывъясыс, а накöд ён тушаа олöма мужичöй. Лампа би улын видзöдалис мужикыд кокöс да нывъяссö тэрмöдлöмөн мöдöдис кытчöкö.

Вайисны нöсилка, водтöдисны и кытчöкö нуны кутисны. Лэччöдисны кутшöмкö овраглань, и аддзи некымын брезент палатка. Пыртисны палаткаö, водтöдисны да чужöм вылö дöра пуктисны. Сэсся нинöм ог помнит — наркоз вöлöма. Садьми. Видзöда: орччөн куйлöны ранитчöм кык салдат. Öтикыс, кыла, шуö мöдыслы:

«Эсылысь коксö вундисны».

Киөн нуöдi кок кузя да гөгөрвои: кок пöлöй абу, збыльысь вундöмаöсь. Мöд луннас телегаөн нуисны верст кызь кымын. Гөрöм муяс вывтi, да öдва терпитi, а сэсся водзö машинаөн. Сэки нельөн нин вöлим. Но и муныштiм жö! Немечлөн самолёт казялас да пыр и бомбитны заводитö. Некутшöм туй абу, ставыс гөрлöм му. Сэсся бара телегаөн, вöлөн войнас туй кузя нуисны. Мунiгөн паныдасим кавалериякöд, аминь уна, быдса полк, на-вернö. Воим көрт туй дорö, водтöдисны эжа вылö. Луныс зэв мича. Воис поезд, тöварнöй вагонö мянöс сөлöдисны. Сэни идзас вылын вит морт нин куйлисны. Аминь дука вагонас, буракö, мöсьясöс либö вöвъясöс неважөн нуöмаöсь. Висьталисны, мунны пö ковмас лун нель, Сталино карöдз пö, немеч бомбитö да сувтавны ковмас. Сöмын вөрзим, мянöс бомбитны кутисны. Куйлам, вагон пöтөлöкö видзöдам. Коркö помасис жö бомбитöмыс. Нель лун пыдди мунiм öкмыс лун. Сталино карсö ми босьтiм 1943 вося сентябр 8 лунö. Со, сэтчö пö и воим. Дас вагон пö составас, и быдлаын раненöйяс, а пельшерыс дзик öти. Перевязка йылысь и сёрни абу. Пельшерыс и вердö мянöс. Ог помнит, öкмыс луннас мунiгөн сёйли али эг.

Сталино карын куйли лун дас вит, навернö. Паньöдöмөн вердисны: сэтшöм слаб вöли, кийöй весиг оз вөр. Няняыс зэв ропкысь да, ме сийöс комиён кыдзи сöмын эг вид. Видзöдö ме вылö, нинöм оз гөгөрво, а ме вöзъяла. Сэсся нуисны Ростов-на-Дону карö. Лун дас сэни видзисны, весиг паськөмöс эз пөрччöддыны, гөгөр öшиньыс восьса, а октябр тöлысь, кöдзыд нин. Но сэни быд сёйöм водзвылын 40 грамм спирт сетлисны, мед огö изöймитöй. Ме эг ю, санитаръяслы сетi, а найö сыысь менö крöватьнас и ставнас коридорас петкöдисны. А сэни бöчкаысь вöчöм пач сулалис да шоныдджык. Ноябрь заводитчигөн мянöс бара сөвтöдисны эшелонö, шуöны, Ташкентö пö. А ме сэтшöма нин омöльтчи, и ачым нин кыла: пом воö. Главнöй врачыс, тöдöмысь, эз надейтчы Ташкентöдз ловйөн вайöдны да Саратовö чеччöдис. Меным шуис: «Пырасны пö нöсилкаа санитаръяс да юасыны кутасны, кодлы 16-82? Тэ горöд, ме!»

Сидзи и лои, нуисны нöсилкаөн. Тайö вöли 1943 вося ноябр 16 лунö.

И вот ме Саратовса 16-82 номера госпитальын. Мöд луннас нин кокнöдыштiс. Аттьö поездывса главврачлы сылөн стараньöбысь, не кö сийö, гашкö, эг нин ловъя вöv. 16-82 госпитальыс нель суда. Ми, нель морт, ичöтик комнатаын, коймöд судаас. Сэни мыйтакö ёнмышти да весиг пукавны нин кутi вермыны.

Куйлёмсыйс мышкуй лёмөссёма. Коркө сэсса лэччөдиси первой судтаас, көстыльөн велөдчи ветлыны. Видзөдлi ачымөс рөм-пöштан пыр да повзи аслам öбликыс: синмөй пыдö вöйöма, юрсийö öти-öти. Веситисны — сьöктайö комын куим килограмм, вирöй колана мындасыс комын вит прöчент. Вир содтöд суйöм бöрын лои нелямын нель, а мöдыс суйöм бöрын лои ветымын нель прöчент.

«Сэсса ачыд чöж», — шуисны.

Öтчыд муна коридор кузяыс да друг юрöй бергöдчис. Керкаыс быттьö кутис пöрны. Палялi крöвать вылын.

Саратовын куйлi 1944 вося февраль 2 лунöдз. Луныс да вöйыс сорассёмаось, ог тöд, кор узя, кор ола. Сидзи быдöнлы вöлөм кажитчö, а оз куш меным. Вöли кадыс быдтор йылыс думайтны. Көнöсь менам отделениеыс салдатъяс, кодъясöс велөдi учебкаын? Көнöсь Баев Павел, Быков Васька, Розанов Миша? Быковöс мөдöдiм хуторö, мед неуна сёянтор ваяс, а эз во бöрсö, засадаö, тыдалö, веськалiс, колöкö, пленын. Розанов ранитчис лядвевяс, ачым бинтөн гартлi дойсö. Баев Павелкöд дыр на öтлаын вöлим. Öти хуторын зэв чорыд тыш вöли. Ми öшинь вылас пулемёт сувтöдiм да сэсянь лыйлам. Буракö, казялiсны: снаряд бöрся снаряд миян керка гөгöр потласьö. Пулемётсö бөр лэдзим джоджö. Сэки öти снаряд дзик öшинь дорас потис. Öдзöсланыс уськöдчим. Ме öдзöс бокас сувтi, а Баев кильчö вомөн чеччыштiс, керка бокас, буракö, сувтны көсийс, и бара снаряд потис. Баев уси, ме сы дорö. Кокас веськалöма снаряд торпыригыс. Ме орчча керка дорö уськöдчи. Сэни боецъяскöд ротнöй водзсасис врагкöд. Но меным висьталiсны: ротнöйныс пö ранитчöма. Кор хуторыс дзоньнас миян лои, Баевöс корси эськö да эг нин аддзы.

1944 вося февраль 2 лунö гортö лэдзисны. Сетисны шинель, телогрейка, ватнöй гач, гын сапöг пöв — кок пöла да. Гынкөм мөд пöлыс кодлыкö мөд боецлы, кок пöлалы жö, буретш лöö. Менö со шоныда пасьтöдисины. Врачыслөн кутшöмкö тöдса (Комиыс жö вöли) висьталöма, мый Комиад тöлыс зэв көдзыд. Протезöс көрталисны ноп бокö. Бура сьöкыд нопйöй лои: унатор и сёянсö пукталисны.

Документъяс сетисны. Проезднöй билет — Пенза да Горький пыр, а мекöд орччөн куйлыс боец Иванов көритөмөн велөдö:

«Он жö öд Москва видзöдлытöг мун?»

«Менам туйыс абу Москва пыр».

«А тэ эн чеччы Пензаас, висьтав, узьсис пö, а Москваас Киевскöй вокзалсянныс метро пыр мун Ярославскöй вокзалöдз».

Сидзи и вöчи. Мунигөн зэв ёна мудзи да метроас пукси шойччыны. Матыстчис кутшöмкö военнöй да юалö:

«Мыйла тэнад абу сопровождающöйыс?»

«Мися, öтнамöс мөдöдисины...»

«Пукышт пö танi».

Бурджыка видзöдлi сы вылö — генерал! Недыр мысти локтис танкист формаа офицер.

«Менö аслад карöдз тэнö тшöктисны кольöдны».

Ярославскöй вокзалын сийö меным ставсö лосьöдiс, медым менö лючки поездö пуксьöдны, да мунiс, колö пö аслам часьтöдз ветлыны да висьтасыны.

---

Эз лок или эз лэдзны, а поездыс регыд вöлі вөрзёдчö нин.  
Эг виччысь, öтнам мöдöдчи. Вои Кировöдз, сэсся Котласöдз.  
Котлассянь сэсся муні машинаөн Сыктывкарöдз, көть шоперыс  
эз көйы босытны коктöм морттö.

«Жугалö кө машинай, кыдзи водзöсö мунан?»

Но ки пöла öти вöвлöм боец, мунысь жö, шуис:

«Сöв... Жугалö кө, ме мыш вылын тэнö нуа».

Карсянь сиктысь сиктö локті, быдлаын сельсöветö пыралі и  
бара водзö вöлөн колльöдiсны. Сідзи и вои бөр аслам чужанінö,  
Джиянö, кок пöлөн.

Вот татшöм вöлöма олöмыс батылөн войнаöдыс и война  
дырйиыс.



---

*ПЫДДИ ПУКТАНА АВТОРЪЯС!*

Редакцияö гижöдъяснытö ыстігөн быть колö юöртны:

1. Ассыныд ним, вич, ов; кор да көні чужлöмныд (лун, тöлысь, во).
2. Паспорт юöръяс: номер, серия, кор да көні сетісны, гортса адрес (прописка серти).
3. Индивидуальной налогöвöй номер — ИНН (кодлөн эм).
4. Страховöй свидетельство номер.

**Тайöс юöрттöг редакция гонорар оз вешты.**

---

*Журналын йöзöдтöм гижöдъяс  
редакция оз рецензируют и авторыслы найöс оз мöдöд.  
Редакция оз век во öти кывйö авторъяскöд.*

---

Комп. набор и верстка **Н.Кузнецова**. Корректор **Н.Габова**.

---

Адрес редакции: 167982. ГСП-2, г. Сыктывкар, Дом печати, каб. 202.  
Телефоны редакции: 24-47-52 (гл. редактор), 24-51-52 (общ. отд./факс).

**E-mail: kodzuv@mail.ru**

---

Подписано к печати 12.05.2008. Формат 70x108<sup>1</sup>/<sub>16</sub>. Печать офсетная. Усл. печ. л. 7; усл. кр.-  
отг. 8,4; учетно-изд. л. 7,54. Тираж 970. Заказ № . Регистр. ПИ № ФС 3 - 0226.  
Выпуск осуществлён при финансовой поддержке Агентства Республики Коми по печати и  
массовым коммуникациям. Отпечатано в ОАО «Кировская областная типография»,  
610000, г. Киров, проезд Динамо, 4.